

RI LEB'ITIKO

Keb' oxib' tzij puwi' ri Wuj Leb'itiko

Ri wuj Leb'itiko jun wuj che are sib'alaj kuk'utu ri pixab' puwi' ri kik'aslemal ri winaq. Pa ri kapitulo 1-7 kuya ub'ixik keb' oxib' tzij puwi' ri jetaq tab'al taq toq'ob'. Chiwila' 7,37: *“Are wa' ri pixab' puwi' ri holokausto, puwi' ri jetaq sipanik, puwi' ri tab'al toq'ob' rech sachb'al makaj, puwi' ri tab'al toq'ob' rech tojb'al makaj, puwi' ri k'ak' chuchqajaw kokik e puwi' ri riqoj ib'.”* Pa ri kapitulo 8-10 are kuya ub'ixik ri rajawaxik kab'anik arechi' kokik jun k'ak' chuchqajaw. Pa ri kapitulo 8-15 are kuya ub'ixik ri pixab' puwi' ri ch'ajch'ob'enik e ri man ch'ajch'oj taj. EK'o jujun chikop man ech'ajch'oj taj rumal rech che keokisaxik pa ri kiq'ijilaxik enik'aj taq dyoses chik. Ri eq'axal utzij ri Dyos are kakaj che ch'ajch'oj ri kanima' ri winaq, chiwila' Amos 5,21: *“21Ri in, kinpaqchi'j, kinwetzelay uwach taq ri inimaq'ij, itzel kinwil ri nimalaj taq mulin iwib' kib'ano.”* Xoquje' Mateo 15,10-20.

Pa ri kapitulo 16 are kuya ub'ixik ri q'ijlanik kab'anik pa ri Unimaq'ij ri Tojb'al Makaj, e pa we tojb'al makaj ri' nim ri uchak ri nimalaj chuchqajaw. Ri wuj xtz'ib'ax chkecxh ri eajheb'reo, kuya ub'ixik che ri Jesus are are' ri nimalaj Chuchqajaw che kuchi'j rib' pa ri tab'al toq'ob' pa ri tyoxlaj k'olb'al rech ri kaj. Man rajawaxik taj che kab'an chi jun tab'al toq'ob'.

Pa ri kapitulo 17-26 chila' k'o wi ri jetaq pixab' puwi' ri Tyoxlaj Pixab'. Pa ri kapitulo 23 chila' k'o wi ri pixab' puwi' ri jetaq nimaq'ij kok'owik pa jun junab'. Pa ri kapitulo 25 chila' k'o wi ri jetaq pixab' puwi' ri jun junab' che kok'owisaxik chi k'ate pa wuqub' junab'. E aretaq chi' kok'owisaxik kawinaq lajuj junab', ri jetaq ulew ktzalex chkech ri ekajaw. Pa ri kapitulo 27 chila' kariqitaj wi ri jetaq pixab' puwi' ri rajil ri jastaq.

RI LEB'ITIKO

Ri jetaq holokosto

¹Ri Yahweh xusik'ij uloq ri Mo'ises pa ri Tz'um ja uloq che rech riqoj ib', xch'aw uloq ruk' e jewa' xub'ij chech:

²Cha'ch'ab'ej ri e'ajisra'el e kab'ij weri' chkech: Aretaq chi' jun chiwech ix ku'ya'a' jun sipan chuwach ri Yahweh, loq' kisipaj jun chikop, ju nim chikop on jun ko'lik chikop.

³We jun holokosto ri isipanik e jun nim chikop, kichi'j ri' jun ama' che man k'o ta uyab'; kichi'j ri' pa ri rokb'al ri tz'um ja rech ri riqoj ib', arech utz kril ri Yahweh. ⁴Kikoj ri' ri iq'ab' puwi' ri ujolom ri awaj kkamsaxik e kk'am ri' weri' rech tojb'al imak. ⁵K'atek'uri', kukamisaj na k'uri' ri ama' wakax chuwach ri Yahweh; ri e'uk'ojol ri A'aron, ri echuchqajawib' kkichi'j na ri' ri ukik'el. Kkitixej ri' chrij ri ab'aj rech ri tab'al taq toq'ob' che k'o pa ri rokb'al ri Tz'um Ja. ⁶Kich'ol ri awaj xkamisaxik e kib'an taq ch'qeta'q ri' chrech. ⁷Ri e'uk'ojol ri A'aron, ri echuchqajawib' kkikoj ri' ri q'aq' puwi' ri ab'aj rech ri tab'al taq toq'ob' e kkikoj ri' ri si' puwi' we q'aq' ri'. ⁸K'atek'uri', ri e'uk'ojol ri A'aron, ri echuchqajawib', kkiya ri' ri jetaq ch'aqap, ri ujolom e ri xepo puwi' ri si' che k'o cho ri q'aq' rech ri ab'aj tab'al toq'ob'. ⁹Are ri jun achi ri' kch'ajow ruk' joron ri upam e ri jetaq raqan, e are ri chuchqajaw ri' kuporoj ronojel puwi' ri ab'aj rech tab'al toq'ob'.

Weri' jun holokosto, jun wa che ksa'ik cho rachaq q'aq', jacha jun k'ok'alaj jororsab'al chrech ri Yahweh.

¹⁰We ri isipanik jun ko'lik chikop, jun alaj chij on jun alaj k'isik rech jun holokosto, kichi'j ri' jun ama' che man k'o ta uyab'. ¹¹Kich'ol ri' chutz'altmal ri urox uxkut ri ab'aj rech tab'al toq'ob' chuwach ri Yahweh; e ri e'uk'ojol ri A'aron, ri echuchqajawib', kkiq'ejej ri' ri ukik'el chrij ronojel ri ab'aj rech ri tab'al toq'ob'. ¹²K'atek'uri', kuq'at ri' pa taq ch'qeta'q e ri chuchqajaw kub'an ub'anik ri', ri ujolom e ri xepo kuya cho ri si' che k'o puwi' ri q'aq' cho ri ab'aj rech ri tab'al toq'ob'. ¹³Ri jun achi ri' kuch'aj ri' ruk' ja' ri jetaq upam e ri raqan e ri chuchqajaw kuchi'j ri' ronojel weri', kuporoj ri' cho ri ab'aj rech tab'al toq'ob'.

Weri' jun holokosto, jun sa'om wa che k'jororik ri ruxlab'al chuwach ri Yahweh.

¹⁴We ri isipanik chuwach ri Yahweh jun holokosto ruk' alaj taq chikop ajuwokaj, kichi'j na ri' jun ut o jun palomax. ¹⁵Ri chuchqajaw kuchi'j na ri' cho ri ab'aj rech ri tab'al toq'ob', kub'oq ub'i ri' ri ujolom e kuporoj ub'i ri' cho ri ab'aj rech tab'al toq'ob', ri ukik'el kuyitz'ej ub'i ri' pa ri utzaltmal ri ab'aj rech tab'al toq'ob'. ¹⁶K'atek'uri', kresaj ub'i ri' ri upumpu'x e ri rismal, kuk'yaq ub'i ri' weri' putz'altmal ri relb'alq'ij chrech ri ab'aj rech tab'al toq'ob' jawi' kkya wi ri nima'q taq chaj. ¹⁷Kupir ri' ri chikop panik'aj, k'atek'ut man kujach ta uwach. K'atek'uri', ri chuchqajaw kuya ri' ri chikop cho ri ab'aj rech tab'al toq'ob', cho ri si' che k'o pa ri q'aq'.

Weri' jun holokosto, jun sa'om wa che k'joror ri uk'ok'al chuwach ri Yahweh.

Ri Sipanik ruk' taq q'ayes ichaj

²¹Aretaq chi' jun winaq kuchi'j jun sipanik ruk' q'ayes chrech ri Yahweh, ri usipanik are ri utzalaj k'aj, kuq'ej ase'ite puwi' xoquje' kukoj k'ok' q'ol puwi'. ²Kuk'am ub'i ri' chkech ri e'uk'ojol ri A'aron, chkech ri echuchqajawib'; kuk'am ukoq jumuq' k'aj ri' che xolom ruk' ri ase'ite ruk' uq'ab' e ronojel ri pom; ri chuchqajaw kuporoj ri' weri' cho ri ab'aj rech tab'al

toq'ob' jeri' jacha natisab'al, jun wa ri' che sa'om e che kJOROR ri ruxlab' chuwach ri Yahweh.

³Ri kto'taj kanoq chrech we sipanik ri', kech ri' ri A'aron e ri e'uk'ojol, weri' tyoxlaj ub'antajik ri' rumal rech che petinaq chuxo'l ri wa che xsa'ik chuwach ri Yahweh.

⁴Aretaq chi' kachi'j jun sipanik b'anom ruk' q'or che chaq'arisam pa ri utuj kaxlanwa, b'anom ri' ruk' utzalaj k'aj che ksuk'ub'axik jacha k'axlanwa tek'ut ma k'o ta uch'amilal kokisaxik, kyob'ik ruk' ase'ite, on are ne jetaq lej kb'an chrech che man kya ta uch'amilal e ksu' rij pa ase'ite.

⁵We ri asipanik kaya'o, jun chaq' q'or che kachaq'ejsaj pa xot, rajawaxik che are ri utzalaj k'aj, kyob' ruk' ase'ite e ma k'o ta uch'amalil kya'ik. ⁶Kab'an pa taq ch'qeta'q e kaq'ejej ase'ite puwi'. We jun sipanik ri', jun sipanik rech q'ayes ichaj.

⁷We ri asipanik kaya'o, xachaq'ejsaj pa jun kasu'el, kab'an ri' ruk' utzalaj k'aj e ruk' ase'ite. ⁸We jun sipanik ri' che jewa' usuk'umaxik xab'ano, kak'am ub'i ri' chuwach ri Yahweh. Kaya ri' chuwach ri chuchqajaw, ri are' kuk'am ub'i ri' cho ri ab'aj rech tab'al toq'ob'. ⁹Ri chuchqajaw kutas jub'iq' ri' chrech we sipanik ri', k'utb'al rech che natisa'b'al, e kuporoj ri' puwi' ri ab'aj rech tab'al toq'ob', jacha jun sa'om wa ri' che kJOROR ri ruxlab'al chuwach ri Yahweh.

¹⁰Ronojel ri xto'taj kanoq kech ri' ri A'aron e ri e'uk'ojol, jacha nak'uri' jun tyoxlaj uch'aqapil ri' ri wa che sa'om chrech ri Yahweh.

¹¹Ronojel sipanik che kichi'j chrech ri Yahweh, man k'o ta uch'amalil ri' kiya'o, rumal rech che man k'o ta jun wa sipojinaq uwach on ya'om uwa'lche' ruk' kiporoj chuwach ri Yahweh. ¹²Kuya' ri' kichi'j weri' chrech ri Yahweh, we are sipanik rech ri nab'e taq uwach ulew, k'atek'ut man kuya taj kapaqi' cho ri ab'aj rech tab'al toq'ob' jacha jun utzalaj sipanik che kJOROR ri ruxlab'al. ¹³Katz'ayij ri' ruk' atz' am ronojel sipanik che kachi'j e man k'o ta jun sipanik ri' kab'ano che mata kna'taj chawech ri atz'am che rech ri chapb'al uq'ab' ri Adyos; pa ronojel ri sipanik kaya'o qas rajawaxik kasipaj ri atz'am chrech ri Adyos.

¹⁴Aretaq chi' kachi'j ri nab'e taq uwach tiko'n chuwach ri Yahweh, kachi'j ri' ri triko che ak'ilim cho q'aq' on kachi'j ri' uwach ri triko che maja' kq'anarik, kajok' nak'uri' we sipan kab'ano ri'. ¹⁵Kaq'ej ase'ite ri' puwi' xoquje' kakoj k'ok' q'ol ri' puwi', jewa' nak'uri' ub'anik ri asipanik kab'an chuwach ri Yahweh; ¹⁶ri chuchqajaw, kuporoj na jub'iq' chrech ri jok'om triko, ri ase'ite e ronojel ri k'ok' q'ol arech na'tisab'al rech ronojel weri', jun sa'om wa ri' chuwach Yahweh.

Ri tab'al toq'ob' rech ri riqoj ib'

³We k'o jun chiwech kuchi'j ri usipanik e jun tab'al toq'ob' rech ri riqoj ib'; we kuchi'j jun nim awaj, ama' on ati't, kuchij ri' chuwach ri Yahweh jun awaj che man k'o ta uyab'il. ²Kuya ri uq'ab' ri' cho ri ujolom ri awaj e kukamisaj ri' pa ri rokb'al ri Tz'um Ja rech ri Riqoj ib'. K'atek'uri', ri e'uk'ojol ri A'aron, ri echuchqajawib', kkiq'ejej ri' ri ukik'el chrij ronojel ri ab'aj rech ri tab'al toq'ob'. ³Ri are', kuchi'j ri' chuwach ri Yahweh pa we tab'al toq'ob' ri', jun uch'aqapil we sa'om wa ri': ri xepo che uchuqum rij ronojel ri upam e ronojel ri xepo k'o puwi' ri upam, ⁴ri keb' ukinaq', ri xepo che k'o chrij e ri k'o chub'ojal taq rij; ri xepo che k'o cho ri useseb' ktz'aqatisax ri' ruk' ri ukinaq'. ⁵Ri e'uk'ojol ri A'aron kkiporoj wa' weri' cho ri ab'aj rech tab'al toq'ob' puwi' ri holokosto, che k'o puwi' ri si' che ya'om pa ri q'aq'. Weru' jun sa'om wa ri' kJOROR ri' ri ruxlab' chuwach ri Yahweh.

⁶We ri kuchi'j chrech ri Yahweh, jun alaj chikop, rech tab'al toq'ob' puwi' ri riqoj ib', kuchi'j na ri' jun ama' on jun ati't che man k'o ta uyab'.

⁷We are kuchi'j jun chij, kuk'am b'i ri' chuwach ri Yahweh, ⁸kukoj ri' ri uq'ab' cho ri ujolom ri chikop kkamisaxik, tek'uri', kukamisaj ri' chuwach ri Tz'um Ja rech ri Riqoj Ib', k'atek'uri' ri e'uk'ojol ri A'aron, kkiq'ejej ri' ri ukik'el chrij ronojel ri ab'aj rech tab'al toq'ob'. ⁹Chrech we tab'al toq'ob' ri' che rech riqoj ib', kuchi'j na ri' ri xepo, jacha jun sa'om wa chuwach ri Yahweh: kuchi'j na ri' ronojel ri uje', kuqupij uloq ri' chi pa ri uk'iyb'al uloq ri b'aq, ri xepo che uch'uqum rij ri upam, e ronojel ri xepo che k'o chrech, ¹⁰ri keb' ukinaq', ri xepo k'o chrij e ri k'o chub'o'jalrij, ri xepo che uch'uqum rij ri useseb'. ¹¹Ri chuchqajaw kusa' ri' pa ri q'aq' cho ri jun ab'aj rech tab'al toq'ob', jun sa'om wa ri' che kporox chrech ri Yahweh.

¹²We ri usipanik jun ati't k'isik, kuk'am ub'i ri' chuwach ri Yahweh, ¹³kuya ukoq ri' ri uq'ab' cho ri ujolom e kukamisaj ri' chuwach ri Tz'um Ja rech ri Riqoj Ib'; ri e'uk'ojol ri A'aron kkiq'ejej na k'uri' ri ukik'el chrij ri ab'aj rech tab'al toq'ob'. ¹⁴Xoquje' kuchi'j nak'uri' jacha jun sa'om wa chrech ri Yahweh: ri xepo che uch'uqum rij ri upam e ronojel ri xepo che k'o ajsik chrech, ¹⁵ri keb' ukinaq', ri xepo k'o ajsik chrech e xoquje' pa ri k'o ub'o'jal rij, ri xepo che uch'uqum rij ri useseb', kuresaj wa' ronojel weri' ruk' ri keb' ukinaq'. ¹⁶Ri chuchqajaw kuporoj wa' weri' pa ri q'aq' jacha jun sa'om wa che kjeroj ruxlab' chuwach ri Yahweh, kuporoj ri' cho ri ab'aj rech tab'al toq'ob'. Ri xepo rech ri Yahweh, kya chrech ronojel.

¹⁷Weri' jun junalikalaj pixab' ya'tal chkech konojel ri mayilq'ijsaq, xaq jawije' k'olb'al kixjeqi' wi: man k'o ta uxepo e man k'o ta ukik'el kitijo.

Ri tab'al toq'ob' rech kuyb'al ri makaj

Ri nim chuchqajaw

⁴Ri Yahweh xuch'ab'ej ri Mo'ises, jewa' xub'ij chrech ri'. ²Chatch'aw b'a' kuk' ri e'ajisra'el e jewa' kab'ij chkech ri': We k'o jun winaq kmakunik rumal rech che man uch'ob'om ta ri upixab' ri Yahweh e xub'an jun jas uwach che man ya'tal taj kb'anik:

³We are ri chuchqajaw che ji'onsam ri ole'o cho ri ujolom ri kmakunik e ke'ukoj ri siwantinimit chuxe' ri makaj, kuchi'j ri' chech ri Yahweh rumal ri mak xub'ano, jun ama' wakax che man k'o ta uyab', jun tab'al toq'ob' ri' rumal ri mak xub'ano. ⁴Kuwa'lisaj ri' ri ama' wakax chuwach ri Yahweh pa ri rokb'al ri Tz'um Ja rech ri Riqoj Ib', kuya ri' ri uq'ab' cho ri ujolom, k'atek'uri', kukamisaj ri' chuwach ri Yahweh. ⁵K'atek'uri', ri chuchqajaw che tyoxrisam rumal ri ole'o, kuk'am ukoq ri' jub'iq' chrech ri ukik'el ri ama' wakax e kuk'am ub'i ri' pa ri Tz'um Ja rech ri Riqoj Ib'. ⁶Kunim ri' ri uwi'uq'ab' pa ri kik' e wuqub' mul ri' kuchikij ri' chuwach ri Yahweh chuwach ukolb'al ri payu' rech ri tyoxlaj k'olb'al. ⁷Ri chuchqajaw kuya jub'iq' kik'el ri' pa taq ri ruk'a' wakax ri k'o cho ri ab'aj rech tab'al toq'ob', jawi' kya wi ri k'ok'alaj q'ol chuwach ri Yahweh pa ri Tz'umal Ja rech ri Riqoj Ib', k'atek'uri', kuq'ejej ub'i ri' ronojel ri ukik'el ri ama' wakax chuxe ri ab'aj rech ri holokostos, che k'o pa ri rokb'al ri Tz'um Ja rech ri Riqoj Ib'.

⁸Ronojel ri uxepo ri ama' wakax che kchi'xik tab'al toq'ob' rumal rech ri makaj, kutas ri' ri uxepo k'o chrij ri upam e ronojel ri xepo k'o ukoq chutzal, ⁹ri keb' ukinaq' e ri xepo k'o chrij are', xoquje' ri k'o chub'o'jal rij e ri xepo che uch'uqum rij ri useseb', kresaj wa' ronojel weri' ruk' ri taq ukinaq' ¹⁰-jeri' jacha ri ktas apan chrech ri kchi'x pa ri tab'al toq'ob' rech ri Riqoj Ib'- e ri chuchqajaw kuporoj wa' weri' cho ri ab'aj rech ri holokosto.

¹¹Ri utz'umal ri ama' wakax, ronojel uti'ojal, ri ujolom, ri raqan e ri upam ruk' ri jetaq utz'ilal ¹²ronojel ri ub'aqil ri jun ama' wakax, kresaj ub'i ri' pa ri tz'um ja, kk'am ub'i ri' pa jun ch'ajch'oj k'olb'al, pa ri k'yaqb'al uchajil ri xepo. Kuporoj ri' cho ri si', pa ri uk'yaqb'al uchajil ri xepo.

Ri tab'al toq'ob' rumal

ri makaj pa ri mulin ib' rech ri Isra'el

¹³We konojel ri e'ajisra'el kimulim kib' xemakunik rumal rech che xkib'an jun jas uwach che q'ilom pa ri upixab' ri Yahweh e xkib'ano rumal rech che man kich'ob' taj e man keta'm taj che xemakunik, ¹⁴aretaq chi' ri mulin ib' kreta'maj che xmakunik, kuchi'j na ri' jun tab'al toq'ob' arech kkuytaj ri makaj, kuchi'j jun ama' wakax ri' che man k'o ta uyab'. Kkik'am ub'i ri' ri wakax chuwach ri Tz'um Ja rech ri Riqoj Ib'; ¹⁵chuwach ri Yahweh ri enim taq winaq ek'o pa ri mulin ib' kkikoj kiq'ab' ri' cho ri ujolom ri ama' wakax ri' e kkamisax ri' chuwach ri Yahweh.

¹⁶K'atek'uri', ri tyoxlaj chuchqajaw che ji'onsam ruk' ri ole'o, kuk'am ub'i jub'iq' ri' chrech ri ukik'el ri wakax pa ri Tz'um Ja. ¹⁷Kujut ri' ri uwi'uq'ab' pa ri kik'el e wuqub' mul ri' kuchikij chuwach ri Yahweh chuwach ri payu'. ¹⁸Kukoj jub'iq' ri' chrech ri kik'el pa ri ruk'a' taq wakax k'o cho taq ri ab'aj rech tab'al toq'ob', che k'o chuwach ri Yahweh pa ri rokb'al ri Tz'umal Ja rech ri Riqoj Ib'. E ri nik'aj kik' chik, kuq'ej ub'i ri' chuxe' ri ab'aj rech ri holokosto, che k'o pa ri rokb'al ri Tz'um Ja rech ri Riqoj Ib'.

¹⁹Kresaj ri' ronojel ri uxepo ri chikop e kuporoj ri' cho ri ab'aj rech tab'al toq'ob'. ²⁰Kub'an wa' ruk' we ama' wakax ri' jacha kb'an ruk' ri ama' wakax rech tab'al toq'ob' rumal ri kuyb'al makaj. Junam ri' kb'an chrech; ri chuchqajaw kuta kuyb'al mak ri' pakiwi' ri winaq kimulin kib' e kkuytaj ri' ri kimak.

²¹Kresaj ub'i ri' ri ama' wakax pa ri tz'um ja e ku'poroj ri' jacha uporoxik xub'an ri jun nab'e kanoq. Are wa ri tab'al toq'ob' rech ri sachb'al kimak ri riqoj ib'.

Ri tab'al toq'ob' rech sachib'al umak

jun k'amalb'e

²²We jun k'amalb'e xmakunik, rumal rech che xub'an jun jas uwach che q'ilom pa ri upixab' ri Yahweh ri Udyos e xmakunik rumal man reta'm taj weri' e xqaj chuxe' ri umak; ²³we kya ub'ixik chrech ri mak xub'ano, jun ama' k'isik' ri' che man k'o ta uyab' kuk'am ub'ik. ²⁴Kuya ri' ri uq'ab' cho ri ujolom ri ama' k'isik e kukamisaj ri' pa ri jun k'olb'al jawi' kekamisax ri holokosto chuwach ri Yahweh. Wa' weri' jun tab'al toq'ob' rumal ri mak xb'anik. ²⁵Ri chuchqajaw kuch'aeqisaj na ri' ri uwi'uq'ab' pa ri ukik'el ri awaj e kupil ri' chkij ri jetaq ruk'a' wakax che k'o pa ri uk'olb'al tab'al toq'ob' rech ri holokosto. K'atek'uri' kuq'ej ub'i ri' ronojel ri kik'el chuxe' ri ab'aj rech ri holokosto. ²⁶E kuporoj ub'i ri' ronojel ri xepo cho ri ab'aj rech tab'al toq'ob' jacha kb'an chrech ri uxepo ri tab'al toq'ob' che rech ri riqoj ib'. Je' nak'uwa' kub'an ri chuchqajaw arech kkuytaj ri are', ksach ri umak e xas kkuytaj ri' ri are'.

Ri tab'al toq'ob' rumal ri umak kub'an

jun winaq che xaq winaq pa ri tinimit

²⁷We xaq apanchinchike winaq pa ri tinimit kmakunik e man reta'm taj che q'ilom weri' pa ri upixab' ri Yahweh; ²⁸we kkib'ix chrech che xmakunik, kuk'am uloq ri' jun sipan rumal rech ri mak xub'ano, jun ati't k'isik, che man k'o ta uyab'. ²⁹Kuya ri' ri uq'ab' cho ri ujolom ri awaj e kukamisaj ri' pa ri k'olb'al jawi' kkamisaj ri jetaq holokosto. ³⁰Ri chuchqajaw kut'in ri' ri uwi'uq'ab' pa ri kik'el e kupil ri' chrij ri ruka' wakax k'o cho ri ab'aj rech ri jetaq

holokosto. K'atek'uri', kuq'ejej ub'i ri' ronojel ri kik'el chuxe' ri ab'aj rech tab'al toq'ob'.³¹Kutas apan ri' ronojel ri uxepo jacha kb'an che utasik ri uxepo ri tab'al toq'ob' rech ri mulin ib' e ri chuchqajaw kuporoj na ri' cho ri ab'aj rech tab'al toq'ob', kJOROR ri' ri ruxlab' chuwach ri Yahweh. Ri chuchqajaw jeri' nak'uwa' kub'ano ri sachb'al mak puwi' we achi ri' e kkuytaj ri' ri umak.

³²We ri are', are kraj kuk'am ub'i jun alaj chij arech kuya pa ri sipanik chrech ri tab'al toq'ob', kuk'am ub'i ri' jun ati't chij che man k'o ta uyab'.³³Kuya ri' ri uq'ab' cho ri ujolom ri chij e kukamisaj ri' arech jun tab'al toq'ob' rumal ri umak, kuya ri' pa ri k'olb'al jawi' kekamisax wi ri jetaq holokosto.³⁴Ri chuchqajaw kujut ri uwi'uq'ab' ri' pa ri ukik'el ri awaj ri' e kupilej ri' chrij jetaq ruk'a' wakax k'o cho ri ab'aj rech ri jetaq holokosto. K'atek'uri', kuq'ejej b'i ri' ronojel ri kik'el chuxe' ri ab'aj rech tab'al toq'ob'.³⁵Kutas apan ri' ronojel ri uxepo ri chij jacha kb'an chrech ri tab'al toq'ob' rech ri riqoj ib' e ri chuchqajaw kuporj na ri' cho ri ab'aj rech tab'al toq'ob', ruk' ri sa'om wa che kya chrech ri Yahweh. Ri chuchqajaw jeri' utayik ri sachb'al umak ri achi kub'ano, arech kkuytajik e xas kuytaj ri'.

Nik'aj taq tab'al toq'ob' chik che rech utayik sachb'al mak

⁵We k'o jun winaq kmakunik, kub'an jun chkech we jetaq mak ri':

Aretaq chi' utom ri pixab' tzij, -k'atek'ut xrilo on utom ri xb'anik-, rajawaxik kuya ub'ixik; we man kuya ta ub'ixik, are ri are' kreqaj ri umak ri jun chik winaq; ²on jun winaq kuchap ukoq jun tz'ilob'inaq jastaq, wene' are ub'aqil jun kaminaq chikop che man ch'ajch'ojtaj, on ub'aqil jun kaminaq awaj k'iyinaq choja che man ch'ajch'oj taj, on ub'aqil jun kumatz che man ch'ajch'oj taj, man xuch'ob' ta weri', ri are' xtz'ilob' wi e k'o umak xkanajik; ³on kuchap ukoq ri usalpi'ch (uk'qetal) jun winaq, che kuya'o koqinaq chrij; man xuch'ob' ta weri', k'atek'uri', aretaq chi' kreta'maj, ri are' k'o ri umak kkanajik; ⁴on wene' jun winaq kujikib'a ub'ixik ri utzij, k'atek'uri', wene' utz on ma utz taj, xaq apachinchike ri jastaq che ri winaq kujikib'a' utzij chrech; arechi' xujikib'a' ub'ixik ri utzij man kuch'ob' taj, tek'ut, arechi' kreta'maj, k'o ri umak kkanajik.

⁵Ri jun che kreqaj jun chkech we mak ri', rajawaxik ri' kuya ub'ixik chkiwach ri winaq, ⁶e kuk'am ub'i ri' chuwach ri Yahweh ri tab'al toq'ob' rech sachb'al ri umak xub'ano, jun ati't chkixo'l ri eko'koj chikop, jun chij on jun k'isik, rech tab'al toq'ob' rumal ri umak; k'atek'uri' ri chuchqajaw kuta na ri' ri sachb'al mak puwi' ri are'.

Ri tab'al toq'ob' rech ri umak jun winaq che xaq winaq pa ri tinimit

⁷We man kkowin taj kuloq' jun alaj chikop, kuk'am ub'i ri' jun tab'al toq'ob' chuwach ri Yahweh rech sachb'al ri umak xub'ano, kuk'am ub'i keb' saqko'r ri' on keb' palomax, jun rech ri tab'al toq'ob' rumal ri umak e ri jun chik rech ri holokosto. ⁸Kuk'am ub'i ri' weri' chuwach ri chuchqajaw, ri are' nab'e ri' kuchi'j ri rech ri tab'al toq'ob' rumal ri mak xb'anik. Kub'iy ri' chuqul, k'atek'ut man kresaj ta ub'i ri' ri ujolom. ⁹Pa ri utzaltmal ri ab'aj rech tab'al toq'ob', kuchikej ri' chech ri ukik'el ri alaj chikop xkamisaxik, e ri nik'aj ukik'el chik che kto'taj kanoq, kuq'ejej b'i ri' chuxe' ri ab'aj rech ri tab'al toq'ob'. Weri' jun tab'al toq'ob' arech ksachtaj ri makaj. ¹⁰Ruk' ri jun chik alaj chikop ajuwokaj, kub'an na jun holokosto jeri' jacha kub'ij ri pixab'. Ri chuchqajaw kuta ri' arech ksachitaj ri umak xub'an ri jun winaq e xas ksachitaj ri' ri umak.

¹¹We man kkwonik ta che uloq'ik ri keb' saqko'r on chech ri keb' palomax, kuk'am ub'i ri' rech ri tab'al toq'ob' arech ksachtaj ri umak xub'ano, jun ulajuj uch'aqapil ri utzalaj k'aj; man kuya ta ase'ite ri' ruk' e man kukoj ta k'ok' q'ol ri' puwi', rumal rech che jun tab'al toq'ob' arech ksachtaj ri makaj. ¹²Kuk'am ub'i ri' chuwach ri chuchqajaw e ri chuchqajaw kuk'am ukoq ri' jumuq' chrech ri k'aj rech na'tisab'al, junam ri' kuporoy ub'i ruk' ri jetaq sa'om wa che kya chuwach ri Yahweh, kuporoy ub'i ri' cho ri ab'aj rech tab'al toq'ob'. Wa' weri' jun tab'al toq'ob' rumal ri makaj xb'anik. ¹³Ri chuchqajaw kuta ri' ri kuyb'al mak puwi' ri achi ri' rumal ri mak xub'ano, xaq apachinchike chech ri jastaq che q'ilom e kkuytaj ri' ri umak. Ri chuchqajaw, xoquje' ri' k'o ri ch'aqap uwa ri are', jacha pa ri sipanik kb'anik, ruk' ri jetaq uwach tiko'n, ichaj, q'ayes.

Ri tab'al toq'ob' rech tojb'al mak

¹⁴Ri Yahweh xuch'ab'ej ri Mo'ises e jewa' kub'ij chrech:

¹⁵We k'o jun winaq kuya ri usipanik e rumal man kuch'ob' taj man kuya ta chech ri Yahweh ronojel ri rajawaxik kuya chrech, kuk'am na ub'i ri' chrech ri Yahweh arech kuta nimalaj toq'ob', jun chkech ri uchij chkixo'l ri ujupuq k'olik, jun che man k'o ta uyab', kchomax na ri' ri rajil pa saq pwaq taq siklos, kpaj na ri' ri ra'lal pa ri tyoxlaj k'olb'al. ¹⁶Ri jun winaq kutoj uk'axel ri' ri sipanik che xujik' kan uwi' e xa jeri' xmakunik chuwach ri tyoxlaj taq jastaq; ri uwi' kuya'o jun uro' uch'aqapil ri', kuk'am ub'i ri' chuwach ri chuchqajaw. Ruk' we jun ama' chij ri' che rech tab'al toq'ob', ri chuchqajaw kuta ri' ri kuyb'al mak puwi' ri jun winaq ri', e ri winaq ri' kkuytaj ri' ri umak.

¹⁷We k'o jun winaq, che man kuch'ob' taj, kmakunik rumal rech che kub'an nik'aj jastaq che q'ilom pa ri upixab' ri Yahweh, xmakun na k'uri' e kreqaj ri' ri umak. ¹⁸Kuk'am ub'i ri' chuwach ri chuchqajaw jun tab'al toq'ob' rumal che xmakunik, kuk'am ub'i jun chkech ri ama' taq uchi'j chkixo'l ri ujupuq, jun chij che man k'o ta uyab', kchomax rij ri' ri rajil. Ri chuchqajaw kuta ri' ri kuyb'al mak puwi' ri are' rumal rech che xsachik, e kkuytaj na k'uri' ri umak. ¹⁹Wa' weri' jun tab'al toq'ob' rech tojb'al makaj, rumal rech che qastzij nak'ut che k'o ri umak chuwach ri Yahweh.

²⁰Ri Yahweh xuch'ab'ej ri Mo'ises, jewa' xub'ij chrech ri'.

²¹We k'o jun winaq kmakunik e kujik' uwi' jun jas uwach chuwach ri Yahweh aretaq chi' kusub' ri uk'ulja puwi' ri uk'olik jun pwaq, on puwi' jun jas uwach che xkub'a'x k'u'x chrij e xya puq'ab', on xrelaq'aj ub'i jun jas uwach rech ri winaq, on we man utz utojik kub'ano ri uchak ri uk'ulja, ²²on we xusik' jun jas uwach che xtzaqik e kub'ij che man k'o ta xrilo, on we kujikib'a' utzij chrech jun jas uwach che man tzij taj, jawi' qas keqaj wi konojel winaq; ²³we jeri' ri umak kub'ano e kqaj pa ri umak, rajawaxik ri' che kutzalejisaj ri xrelaq'aj on ri xutoq'ij ruk' k'ax, on ri pwaq che xya puq'ab' rumal rech che xkub'isax k'u'x chrij, on ri xtzaqik k'atek'uri' xusik' are', ²⁴on ronojel ri jastaq che xujikib'a' utzij puwi' e man tzij taj. Kutoj na ri' tz'aqat ri uk'axel ronojel e kuya apan uwi' jun uro' chrech job' uch'aqapil, kutzalejisaj wa' weri' chrech ri rajaw kanoq pa ri jun q'ij aretaq chi' xok umak ri are'. ²⁵Kujach ri' chrech ri Yahweh ri tab'al toq'ob' rech tojb'al umak, kujach jun ri' chkech ri ama' taq uchi'j chkixo'l ri ujupuq, jun chij che man k'o ta uyab'; kchomax rij ri' ri rajil, jeri' jacha jun tab'al toq'ob' rech tojb'al makaj, kujach ri' chrech ri chuchqajaw. ²⁶Ri chuchqajaw kuta ri' ri kuyb'al mak puwi' ri are' chuwach ri Yahweh, e kuytaj ri' ri umak, xaq apachinchike ri umak xqaj wi'.

Ri chuchqajawinik e ri jetaq tab'al toq'ob'

6¹Ri Yahweh xuch'ab'ej ri Mo'ises, jewa' xub'ij chrech ri':

²Chattaqan b'a' chrech ri A'aron e chkech ri e'uk'ojol:

Are wa' ri pixab' puwi' ri holokosto.

Are wa' ri holokosto che kk'oji' cho ri q'aq', puwi' ri ab'aj rech tab'al toq'ob', jun aq'ab' chi k'ate' aq'ab'il, e ri q'aq' puwi' ri ab'aj rech tab'al toq'ob' xas amaq'el ri' kk'atik.

³Ri chuchqajaw are kukoj ri' ri saqtuntuj ratz'yaq e kuch'uq ri' ri ub'aqil ruk' ri usaka'w che b'anom ruk' saqtuntuj. Kresaj ukoq ri' ri uchaj ri xepo rech ri holokosto che xportaj rumal ri q'aq' cho ri jun ab'aj rech tab'al toq'ob' e kutix ukoq ri' chunaqaj ri tab'al toq'ob'.

⁴Kresaj kan ri' ri ratz'yaq; kukoj chi ub'i nik'aj atz'yaq ri' arech kuk'am ub'i ri chaj pa jun ch'ajch'ojalaj k'olb'al, chrij ri tz'um taq ja.

⁵Ri q'aq' kleb'letik ri' cho ri ab'aj rech tab'al toq'ob', man k'o ta uchupik ri'. Ronojel taq aq'ab'il, ri chuchqajaw kuya' nik'aj si' ri' pa ri q'aq'. Kuya ri' puwi' we q'aq' ri' ri holokosto e puwi' weri' kuporoj ub'i ri' uxepo ri tab'al toq'ob' rech mulin ib'. ⁶Xas man kchup ta wi ri' ri q'aq' cho ri ab'aj rech tab'al toq'ob'.

Ri jetaq sipanik

⁷Are wa' ri pixab' puwi' ri jetaq Sipanik:

Ri e'uk'ojol ri A'aron, kkik'am ub'i ri' ri sipanik chuwach tab'al toq'ob'; chuwach ri Yahweh, ⁸jun chkech ri e'are' kuk'am ukoq ri' jumuuq' chrech ri utzalaj k'aj che k'o ase'ite ri' ruk' e ronojel ri k'ok' q'ol che kya ruk', kuporoj ri' cho ri ab'aj rech tab'al toq'ob' jacha jun na'tisab'al, kJOROR ruxlab' ri' chuwach ri Yahweh, ⁹ri A'aron e ri e'uk'ojol kkitij ri' ri kto'taj kanoq, man k'o ta uch'amilal ri' ri kaxlanwa ktijowik. Kkitij ri' pa jun tyoxlaj k'olb'al, pa ri uwoja rech ri Tz'um Ja pa kb'an wi ri Riqoj Ib'. ¹⁰Man kchaq'ejisax ta ri' ruk' uch'amilal; are ri' ri uch'aqapil sa'om nuwa kinya chkech ri e'are'. Werri' jun tyoxlaj ch'aqap wa ri', tab'al toq'ob' rech kuyb'al makaj e tab'al toq'ob' rech tojb'al makaj. ¹¹Konojel ri achijab' chkixo'l ri e'ralk'uwa'l ri A'aron kuya ri' kkitij ri uch'aqapil ri uwa ri Yahweh. Werri' jun junalik pixab' kkanaj kanoq chkech ri iwija'al. Ronojel ri kchapow ukoq we jastq ri', tyox kkanaj kanoq.

¹²Ri Yahweh xuch'ab'ej ri Mo'ises, jewa' xub'ij chrech ri':

¹³Are wa' ri sipanik kkiya na ri A'aron e ri e'uk'ojol chrech ri Yahweh, pa ri uq'ij che xokisaj ri ole'o cho ri kijolom: jun ulajuj chrech ri lajuj uch'aqapil ri utzalaj k'aj, kkisipaj ri' jacha jun junalik sipanik, panik'aj aq'ab'il e panik'aj chik b'enaq'ij. ¹⁴Ksuk'umaxik ri' pa ri' kaswe'l, kxol ri' ruk' ase'ite, kk'am ub'i ri' jacha jun sipanik, kb'an ub'i ch'qeta'q ri' chrech e kachi'x na ri' chuwach ri Yahweh jacha jun kJOROR ruxlab'al. ¹⁵Jachin ri chuchqajaw chkixo'l ri e'uk'ojol che xokisax ri ole'o cho ri ujolom, are kb'anow wa' weri'. Jun junalik pixab' wa' weri'.

Ri sipanik chrech ri Yahweh ronojel ri' kporox ub'ik pa ri q'aq'. ¹⁶Ronojel ri sipanik kub'an jun chuchqajaw, ronojel ri' kya b'i pa ri tab'al toq'ob'. Man loq' taj k'o ktijow chrech.

Ri tab'al toq'ob' rech sachb'al makaj

¹⁷Ri Yahweh xuch'ab'ej ri Mo'ises, jewa' kub'ij chrech: ¹⁸Che'ach'ab'ej ri A'aron e ri e'uk'ojol, e chab'ij jewa' chkech ri':

Are wa' ri pixab' puwi' ri tab'al toq'ob' rech sachb'al makaj.

Pa ri k'olb'al jawi' kkamisax wi ri holokosto chuwach ri Yahweh, xoquje' chila' ri' kkamisax wi ri chikop rech sachb'al makaj. Wa' weri' tyoxlaj ub'antajik ri'. ¹⁹Ri chuchqajaw che kuchi'j we tab'al toq'ob' ri' are ktijow ri' weri'. Ktij ri' pa jun tyoxlaj k'olb'al, pa ri uwoja cho ri Tz'um Ja che rech ri Riqob'al Ib'. ²⁰Ronojel ri jastaq che kuchap ukoq we ti'j ri', tyox ri' kkanaj kanoq, e we kchikin ri kik'el cho taq ri atz'yaq, kch'aj ri' ri xtz'ilob'ik pa jun tyoxlaj k'olb'al. ²¹Ri t'u'y jawi' xchaq'ejisaxik ri ti'j kpaxix ri', k'atek'uri' we xchaq'ejsaxik pa jun ch'ich tu'y, utzalaj uq'utik ri' kb'anik e kch'aj b'i ri' ruk' nimalaj joron. ²²Konojel ri achijab' ek'o chkixo'l ri echuchqajawib', loq' ri' kkitij kech we ti'j ri'. Weri' tyoxlaj ub'anik; ²³k'atek'ut, man loq' taj kktijik ri chikop kkamisaxik arech kchi'xik rech ri sachb'al makaj e che xk'am ub'i ukikik'el pa ri Tz'um Ja rech ri Riqo'al Ib' arech ktayik ri kuyb'al makaj pa ri Tyoxlaj K'olb'al: Kporox ub'i ri' pa ri q'aq'.

Ri tab'al toq'ob' rech tojb'al makaj

⁷Are wa' ri pixab' che ri tab'al toq'ob' rech tojb'al makaj:

Weri' sib'alaj tyoxlaj ri ub'antajik. ²Kch'ol ri' ri awaj pa ri k'olb'al jawi' kech'ol wi ri holokosto e ri chuchqajaw kuq'eje' ri' ri ukik'el cho taq ri utzal ri ab'aj rech tab'al toq'ob'. ³Kchi'x ri' ronojel ri uxepo: ri uje', ri xepo k'o cho taq upam, ⁴ri keb' uki'naq', ri xepo k'o ruk', we uki'naq' ri' e ri k'o chub'o'jal taq rij, ri xepo k'o ruk' ri useseb'; kesax wa' we xepo ri' ruk' ri uki'naq'. ⁵Ri chuchqajaw kuporoj wa' weri' cho ri ab'aj rech tab'al toq'ob', jacha jun sa'om uwa' ri' ri Yahweh. Wa' weri' jun tab'al toq'ob' rech tojb'al makaj. ⁶Konojel ri achijab' chkixo'l ri echuchqajawib' kuya ri' ktij we ti'j ri'. Ktijow wa' pa jun tyoxlaj k'olb'al. Weri' sib'alaj tyox ub'antajik.

Ri jastaq taqal chkij ri echuqajawib'

⁷Ri tab'al toq'ob' rech sachb'al makaj junam ruk' ri tab'al toq'ob' rech tojb'al makaj junam ri pixb'anik chrech. Ri awaj xkamisaxik rech ri chuchqajaw che xb'anow ri tayij toq'ob' rech sachb'al makaj. ⁸Ri chuchqajaw che xuchi'j ri holokosto rech jun winaq, kkanaj kan ri ruk' ri utz'umal ri awaj xch'olik. ⁹Xoquje', ronojel sipanik che chaq'ejisam pa ri orno tuj, ri sipanik che xk'ilix pa ri kasu'el, ri chuchqajaw che xuchi'j, rech ri' ri are' kkanaj kanoq. ¹⁰Ronojel ri jetaq sipanik che yob'om ruk' ase'ite on ri chaqi'j sipanik, ronojel ri' kya chkech ri e'uk'ojol ri A'aron.

Ri tab'al toq'ob' rech Riqoj Ib'.

Tab'al toq'ob' arech nim kilix wi ri Dyos

¹¹Are wa' ri pixab' puwi' ri tab'al toq'ob' rech ri Riqoj Ib' che kchi'j ri' chrech ri Yahweh:

¹²We jun tab'al toq'ob' arech nim kil wi ri Dyos, kya ri' ruk' ri sipanik, nik'aj utzalaj taq kaxlanwa che man k'o ta uch'amilal e che yob'om ruk' ase'ite, xoquje' nik'aj kaxlanwa chik che man k'o ta uch'amilal e che pilom ase'ite chrij. ¹³We tab'al toq'ob' ri' che rech riqoj ib', ruk' tab'al taq toq'ob' e ruk' q'ijilanik, ktz'aqatisax ruk' kaxlanwa che k'o uch'amilal. ¹⁴Jun chkech we je'lik taq kaxlanwa ri' kto' kanoq arech kchi'xik rech tojb'al chrech Yahweh e rech ri' ri chuchqajaw che kuq'eje' ri kik' pa ri tab'al toq'ob' che rech riqoj ib'. ¹⁵Ri uti'ojal ri awaj xkamisax rech ri tab'al toq'ob' xas ktijow ri' pa ri jun q'ij ri' che xchi'xik, man k'o ta kto' kan ri' rech ri jun q'ij chik.

Ri tab'al toq'ob' rech moloj ib'

Ri tab'al toq'ob' che kk'iy pa ri ranima' ri winaq

¹⁶We kchi'x jun awaj rech tab'al toq'ob' puwi' ri xjikib'axik ri tzij chrij on kchi'xik rumal xk'iy uloq pa ri anima', ri ti'j ktijow ri' pa ri jun q'ij xkamisaxik e ri kto'taj kanoq ktijow chi ri' pa ri jun q'ij chi aq'anoq, ¹⁷k'atek'ut, ri kto'taj kanoq che we ti'j ri', kya ub'i ri' pa q'aq' pa ri urox q'ij chik.

Nik'aj taq pixab' chik

¹⁸We ktijowik pa ri urox q'ij ri ti'j che xya pa jun tab'al toq'ob' rech riqoj ib', man k'o ta kupatanij ri' chrech ri xchi'n rech e man kk'am ta ri' ri tab'al utoq'ob'. Tz'il ri' we ti'j ri' e jachin ktijowik xumol umak ri'.

¹⁹We xt'intajik ukoq ri ti'j rumal jun jas uwach che man ch'ajch'oj taj, we ti'j ri' man loq' ta ri' ktijowik, kporox ub'i ri' pa ri q'aq'.

Ronojel winaq che ch'ajch'oj, ya'tal ri' chrech kutij ri ti'j, ²⁰k'atek'ut, we jun winaq che man ch'ajch'oj taj, kutij ri uti'j jun tab'al toq'ob' che rech riqoj ib' che xchi'x chrech ri Yahweh, ri are' kesax ub'i ri' chkixo'l ri erachalal. ²¹Xaq apachinchike winaq kuchap ukoq jun jas uwach che man ch'ajch'oj taj, utz'ilal winaq, utz'ilal chikop, on utz'ilal jun jas uwach, k'atek'uri' kutij chi ri uti'j jun tab'al toq'ob' rech riqoj ib' che xchi'x chrech ri Yahweh, kesax ub'i ri' chkixo'l ri erachalal.

²²Ri Yahweh xch'aw ruk' ri Mo'ises, jewa' xub'ij chrech ri': ²³Chatch'aw kuk' ri e'ajisra'elita e jewa' kab'ij chkech ri':

Man kitij taj ri' uxepo jun ama' wakax, jun chij on jun k'isik. ²⁴Ri uxepo jun kaminaq chikop on jun che xq'ajik kuya ri' kib'an ruk' ri kiwaj, are man ya'tal taj che kitijo. ²⁵Rumal rech che jachin ri kutij ri uxepo jun chikop che kchi'x chrech ri Yahweh, kesax b'i ri' chkixo'l ri erachalal.

²⁶Xoquje' man ya'tal taj kitij uk'ik'el jun chikop ajuwokaj, on jun chik awaj pa ronojel ri jetaq k'olb'al jawi' kixjeqi' na wi. ²⁷Ronojel winaq che kutij xaq apachinchike uk'ik'el awaj, kesax ub'i ri' chkixo'l ri erachalal.

Ri jastaq che kech ri echuchqajawib'

²⁸Ri Yahweh xuch'ab'ej ri Mo'ises, jewa' xub'ij chech ri': ²⁹Chatch'aw kuk' ri e'ajisra'el e jewa' kab'ij chkech:

Ri winaq che kuchi'j jun tab'al toq'ob' rech riqoj ib' chuwach ri Yahweh, chrech we tab'al toq'a'ob' ri' chuk'ama' b'a' ub'i ri are' jun uch'aqapil chuwach ri Yahweh. ³⁰Kuk'am ub'i ri' puq'ab' ri sa'om wa che rech ri Yahweh: are are' ri' kuchi'j ri xepo e ri uwo'uk'u'x. Ri uwo'uk'u'x, rajawaxik ri' che are sipanik ksilo'b'isaxik e kk'ut chuwach ri Yahweh. ³¹Ri chuchqajaw are kporon ri' ri xepo cho ri ab'aj rech tab'al toq'ob' e ri uwo'uk'u'x kech ri A'aron e ri e'uk'ojol. ³²Rech utojb'alil ri itab'al toq'ob' rech mulin ib' kib'ano, kiya' ri' chrech ri chuchqajaw ri rikyaq'ab' raqan ri awaj. ³³We rikyaq'ab' raqan ri awaj ri' rech ri' ri jun uk'ojol ri A'aron che xuchi'j ri kik'el e ri xepo pa ri tab'al toq'ob' rech riqoj ib'. ³⁴Rumal rech che ri in kinwesaj chkech ri eralk'uwa'l ri Isra'el, pa ri tab'al taq toq'ob' rech riqoj ib' kkib'ano, ri uwo'uk'u'x ri awaj e ri rikyaq'ab' raqan, tojb'al rech: ri in kinya' weri' chkech ri A'aron e ri e'uk'ojol. Wa' weri' jun junalikalaj pixab' chkixo'l ri e'ajisra'el.

K'isb'al ub'ixik taq tzij

³⁵Are wa' ri ch'aqap rech ri A'aron e ri ch'aqap kech ri e'uk'ojol, chrech ri sa'om taq wa che kchi'x chuwach ri Yahweh, xas pa ri q'ij ub'ik aretaq chi' ri e'are' ke'ok che upatanixik ri Yahweh pa ri chuchqajawinik. ³⁶Are wa' ri ktaqan ri Yahweh chkech ri e'ajisra'el arech kkiya' chkech ri e'are' xas pa ri q'ij ub'ik che ri are' xe'utyoxrisaj ruk' ri ase'ite che xokisax cho ri kijolom. Weru' jun junalikaj pixab' chkech konojel ri mayilq'ijsaq.

³⁷Are wa' ri pixab' puwi' ri holokosto, puwi' ri jetaq sipanik, puwi' ri tab'al toq'ob' rech sachb'al makaj, puwi' ri tab'al toq'ob' rech tojb'al makaj, puwi' ri k'ak' chuchqajaw kokik e puwi' ri riqoj ib'. ³⁸Are wa' ri xtaqan ri Yahweh chrech ri Mo'ises puwi' ri juyub' Sina'i, pa ri jun q'ij che xtaqan chkech ri e'ajisra'el che rajawaxik kkikoj ri tab'al toq'ob' chrech ri Yahweh pa ri tz'inalik ulew Sina'i.

Ri ucholajil ri kb'anik aretaq chi' kokik jun k'ak' chuchqajaw

8¹Ri Yahweh xuch'ab'ej ri Mo'ises, jewa' xub'ij chrech:

²«Che'ak'ma' ub'i ri A'aron e ri e'uk'ojol, xoquje' chak'ama' ub'i ri jetaq atz'yaq, ri ase'ite kokisax pa ji'onsa'nik, ri b'oyix rech ri tab'al toq'ob' arech kkuytaj ri makaj, ri keb' ama' chij, ri jun chakach kaxlanwa che man k'o ta uch'amilal. ³K'atek'uri' cha'sik'ij konojel arech kkimulij kib' pa ri rokb'al ri Tz'um Ja rech ri Riqoj Ib'.

⁴Ri Mo'ises xub'ano ri xtaqan ri Yahweh chrech, ri winaq xkimulij kib' pa ri rokb'al ri Tz'um Ja rech ri Riqoj Ib'. ⁵K'atek'uri' ri Mo'ises xub'ij chkech: «Are wa' ri jastaq rajawaxik kb'anik che xtaqan ri Yahweh chrech».

⁶Xtaqanik arech keqeb' uloq ri A'aron e ri e'uk'ojol e xe'uch'ajch'ob'ej ruk' ja'.

⁷Xukoj jun ratz'yaq chik ri A'aron puwi' ri ratz'yaq e xuximo ruk' jun upas, xukoj chi chrech jun uq'u' e puwi' weri' xukoj ri efod. Xoquje' xuximo ruk' ri uk'amil ri efod. ⁸Xukoj chi chrech ri jun uwo'uk'u'x (pectoral) e chila' xukoj ukoq ri Urim e ri Tummim. ⁹Puwi' ri ujolom xuxim ri jun su't e chuwach ri su't xukoj ri jun kotz'ij b'anom ruk' q'an pwaq; are wa' ri k'utb'al rech ri tyoxlaj patan, jeri' jacha xtaqan ri Yahweh chrech ri Mo'ises.

¹⁰Ri Mo'ises xuk'am chi ukoq ri ase'ite rech ri ji'onsa'nik, xuq'ej chupam ri Rachoch ri Yahweh e chrij ronojel ri jastaq che k'o chupam arech kutyoxrisaj kanoq. ¹¹Wuqub' mul xuchikej ri ase'ite puwi' ri ab'aj rech tab'al toq'ob' e xoquje' xuchikej ri ase'ite puwi' ri chakub'al k'o chila', ri uk'olb'al ri ja' chemelik e ri utikb'alil, arech kutyoxrisaj weri'. ¹²K'atek'uri', xuq'ej ri ase'ite rech ri ji'onsa'nik cho ri ujolom ri A'aron, arech kutyoxrisaj kanoq ri are'.

¹³K'atek'uri', ri Mo'ises xtaqanik arech keqeb' uloq ri e'uk'ojol ri A'aron, xukoj jun katz'yaq chik puwi' ri katz'yaq, xuxim kipam e xukoj ri uwiqb'al kijolom, jeri' jacha xtaqan ri Yahweh chrech ri Mo'ises.

¹⁴K'atek'uri' xtaqanik arech kk'am uloq ri b'oyix rech ri tab'al toq'ob' arech kkuytaj ri makaj. Ri A'aron e ri e'uk'ojol xkikoj ri kiq'ab' puwi' ri ujolom ri ama' wakax che kkamisaxik; ¹⁵ri Mo'ises xuch'olo, xut'in ukoq ri uwi'uq'ab' pa ri ukik'el e xusu' chrij ri ruk'a' wakax k'o apan chuwach ri ab'aj rech ri tab'al toq'ob' arech kuch'ajch'ob'ej kanoq. K'atek'uri', xuq'ej chi ub'i ri kik'el chuxe' ri ab'aj rech tab'al toq'ob', xa jek'uri' xutyoxrisaj rumal rech che xutayij ri sachb'al makaj. ¹⁶K'atek'uri', xuk'am chi ukoq ronojel ri xepo che uch'uqum ri upam ri b'oyix, ri xepo che k'o ruk' ri useseb', ri keb' ukinaq' ruk' uxepo k'olik, tek'uri' xuporoj weri' cho ri ab'aj rech tab'al toq'ob'. ¹⁷K'atek'uri', ri utz'umal ri b'oyix, ri uti'ojal e ri utz'ilal, xuporoj apan pa jun k'olb'al chrij ri tz'um taq ja, jeri' jacha xtaqan ri Yahweh chrech ri Mo'ises.

¹⁸Xtaqan chik arech kqib'saxik uloq ri jun ama' wakax rech ri holokosto. Ri A'aron e ri e'uk'ojol xkikoj ri kiq'ab' cho ri ujolom ri b'oyix ri', ¹⁹e ri Mo'ises xuch'olo. Xchikej ri ukik'el chrij ronojel ri ab'aj rech ri tab'al toq'ob'. ²⁰K'atek'uri', xuq'at ri ama' wakax pa taq ch'qeta'q e xuporoj ri ujolom, ri jetaq uch'aqapil e ri uxepo. ²¹Aretaq chi' xch'ajtaj pa ri ja' ri upam wakax e ri raqan, xuporoj ronojel ri jun ama' chi cho ri ab'aj rech tab'al toq'ob'. Weri' jun holokosto che kyoror ri ruxlab'al, jun sa'om wa rech ri Yahweh, jeri' jacha xtaqan ri Yahweh chrech ri Mo'ises.

²²K'atek'uri', xtaqan chik arech kqib'isax uloq ri ukab' ama' chij, che rech ri tab'al toq'ob' puwi' ri k'ak' chuchqajaw. Ri A'aron e ri e'uk'ojol xkikoj ri kiq'ab' cho ri ujolom ri ama' chij ri', ²³k'atek'uri', xuch'ol ri Mo'ises. Xuk'am ukoq ri ukik'el e xupil cho ri rikyaq'ab' uxikin ri A'aron, cho ri chom rikyaq'ab' uwi'uq'ab' e cho ri chom rikyaq'ab' uwi'raqan. ²⁴K'atek'uri', xtaqanik arech keqib' ukoq ri e'uk'ojol ri A'aron e xupil ri kik'el cho ri kikyaq'ab' kixikin, cho ri chom kikyaq'ab' kiq'ab' e cho ri chom kikyaq'ab' uwi'kaqan. K'atek'uri', xuq'eje ub'i ri kik'el cho ri ab'aj rech tab'al toq'ob'; ²⁵xoquje' xuk'am chi ukoq ri xepo, ri uje', ronojel ri xepo k'o chrij ri upam, ri xepo k'o chunaqaj ri useseb', ri keb' ukinag' ruk' ri uxepo, rachi'l ri rikyaq'ab' ra'. ²⁶Pa ri jun chakach kaxlanwa che man k'o ta uch'amilal, che ri k'o ukoq chuwach ri Yahweh, xuk'am ukoq jun je'likalaj kaxlanwa, jun chik tyoxlaj kaxlanwa che yob'om ruk' ase'ite e jun kaxlanwa chik che pilom ri ase'ite chrij, xukoj cho ri xepo e cho ri rikyaq'ab' ra'. ²⁷Xujach ronojel weri' puq'ab' ri A'aron e pa ri kiq'ab' ri e'uk'ojol e xkisilob'isaj jeri' jacha ri usilob'asaxik kb'anik ri sipanik chuwach ri Yahweh. ²⁸Ri Mo'ises xuk'am chi weri' pa kiq'ab' e xupoj b'i cho ri ab'aj rech tab'al toq'ob' puwi' ri holokosto. Are wa' ri tab'al toq'ob' arech kokik jun k'ak' chuchqajaw, kyoror ruxlab', jun sa'om wa rech ri Yahweh. ²⁹Xoquje', ri Mo'ises xuk'am ukoq ri uwo'uk'u'x e xusilob'isaj jacha kb'an che usilob'isaxik ri sipanik chuwach ri Yahweh. Are wa' ri uch'aqapil ri ama' wakax rech ri Mo'ises, uch'aqapil ri tab'al toq'ob' arech kokik jun k'ak' chuchqajaw, jeri' jacha xtaqan ri Yahweh chrech ri Mo'ises.

³⁰K'atek'uri', ri Mo'ises xuk'am ukoq ri ase'ite rech ri ji'onsa'nik, xoquje' xuk'am ukoq ri kik'el che k'o cho ri ab'aj rech tab'al toq'ob'; xuchij puwi' ri A'aron e cho taq ri ratz'yaq e xoquje' xuchikij pakiwi' ri e'uk'ojol e cho taq ri katz'yaq. Jewa' utyoxrisaxik xub'an ri A'aron e ri ratz'yaq, xoquje' ri e'uk'ojol e ri katz'yaq.

³¹K'atek'uri', ri Mo'ises xub'ij chrech ri A'aron e chkech ri e'uk'ojol: «Chisa'ta' b'a' ri ti'j pa ri rokb'al ri Tz'um Ja rech ri Riqoj Ib'; e xas chitija' b'a' chila', xoquje' chitija' b'a' ri kaxlanwa che k'o pa ri jun chakach rech tab'al toq'ob' che rech kokik jun k'ak' chuchqajaw, jeri' jacha xintaqanik aretaq chi' xinb'ij: "Ri A'aron e ri e'uk'ojol ketijow ri' we kaxlanwa ri'". ³²Ri ch'qeta'q taq ti'j e ri ch'qeta'q taq kaxlanwa kkanaj kanoq, kiporoj ub'i ri' pa ri q'aq'. ³³Wuqub' q'ij kixkanaj kan pa ri rokb'al ri Tz'um Ja rech ri Riqoj Ib', rumal rech che rajawaxik wuqub' q'ij kuq'i' ri ityoxrisaxik ix. ³⁴Are ri Yahweh xtaqanik che kqab'ano jacha we xqab'an kamik ri', arech kqata ri kuyb'al mak piwi' ri ix, ³⁵xa jek'uri' wuqub' q'ij kixkanaj kan pa ri rokb'al ri Tz'um Ja rech ri Riqoj Ib', chi paq'ij chi chaq'ab' arech kichajij ri upixab' ri Yahweh, e xa jek'uri' man kixkam ta ri'. Are wa' ri taqanik xya chwech ri in». ³⁶Ri A'aron e ri e'uk'ojol xkib'ano ronojel ri xtaqan ri Yahweh chrech ri Mo'ises.

Ri chuchqajawib' kkich'ik ub'ik ri k'ak' kichak kipatan

⁹Pa ri uwajxaq q'ij ri Mo'ises xe'usik'ij ri A'aron e ri e'uk'ojol, xoquje' ri enim taq winaq kinimal ri Isra'el; ²xub'ij chrech ri A'aron: «Chak'ama' uloq jun alaj wakax arech kab'an jun tab'al toq'ob' rech sachb'al mak e jun ama' chij rech ri holokosto, rajawaxik che man k'o ta

kiyab', arech kachi'j chuwach ri Yahweh». ³Katch'aw ri' kuk' ri e'ralk'uwa'l ri Isra'el e kab'ij ri' chkech: «Chik'ama' ukoq jun ama' k'isik arech kisipaj pa ri tab'al toq'ob' rech sachb'al makaj, jun alaj wakax e jun alaj chij che jun kijunab' k'olik, xoquje' man k'o ta kiyab', rech ri holokosto; ⁴jun ama' wakax e jun ama' chij kiya'o pa ri tab'al toq'ob' rech riqoj ib', weri' kch'olik chuwach ri Yahweh; xoquje' kiya jun sipanik che xyob' ruk' ase'ite. Qastzij wa' che pa we jun q'ij kamik ri' kuk'ut rib' ri' ri Yahweh chiwach».

⁵Xk'am uloq chuwach ri Tz'um Ja rech ri Riqoj Ib' ri jastaq che xtaqan ri Mo'ises chrech; konojel ri moloj ib' xeqeb' ukoq e xetak'i' ukoq chuwach ri Yahweh. ⁶K'atek'uri', xub'ij ri Mo'ises: «Are wa' ri xtaqan ri Yahweh chrech; chib'ana' b'a' arech kk'uttaj na ri uq'ijil chiwach». ⁷K'atek'uri', ri Mo'ises xub'ij chik chrech ri A'aron: «Chatqeb' ukoq ruk' ri ab'aj rech tab'al toq'ob' e chachi'j ri atab'al toq'ob' rech sachib'al amak e ri aholokosto e chata b'a' paw'i ri at ri sachib'al amak e sachib'al kimak ri e'ejupa'awachoch. Xoquje' kakoj chik ri sipanik kech ri tinimit e kata pakiwi e'are' ri sachib'al kimak, jeri' jacha xtaqa n ri Yahweh».

⁸Ri A'aron xqet ukoq ruk' ri ab'aj rech tab'al toq'ob', xuch'ol ri alaj wakax rech tab'al toq'ob' rumal ri umak. ⁹K'atek'uri', ri e'uk'ojol ri A'aron xkiya' ukoq chrech ri ukik'el; xujut ri uwi' uq'ab' pa ri kik'el e xupil chrij ri ruk'a' wakax k'o ukoq cho ri ab'aj rech ri tab'al toq'ob', k'atek'uri', xuq'eje ub'i ri kik'el chuxe' ri ab'aj ri'. ¹⁰Ri xepo, ri ukinaq' e ri xepo k'o chrij ri useseb', rech tab'al toq'ob' arech kta ri sachb'al makaj, xuporoj cho ri ab'aj rech tab'al toq'ob', jeri' jacha xtaqan ri Yahweh chrech ri Mo'ises; ¹¹ri uti'ojal e ri utz'umal xuporoj apanoq chrij ri tz'um taq ja.

¹²K'atek'uri', xuch'ol chi ri awaj rech ri holokosto e ri e'uk'ojol ri A'aron xkik'am uloq ri ukik'el chuwach; e ri are' xuq'ej ub'ik chrij ri ab'aj rech tab'al toq'ob'. ¹³Xk'am uloq chuwach ri jetaq uch'aqapil ri kaminaq awaj, xoquje' xk'am uloq ri ujolom e xuporoj weri' cho ri ab'aj rech tab'al toq'ob'. ¹⁴Xuch'aj ri jetaq rixko'l e ri raqan e xuporoj ruk' ri holokosto cho ri tab'al toq'ob'.

¹⁵K'atek'uri', xukoj chik ri sipanik rech ri siwantinimit: xuk'am ukoq ri ama' k'isik' rech ri tab'al toq'ob' sachib'al kimak ri siwantinimit, xuch'olo e xuchi'j rech sachib'al makaj, xub'ano jacha xub'an chech ri nab'e. ¹⁶Xtaqanik arech kqib'isax uloq ri holokosto e xuchi'j jeri' jacha ri pixab' b'im kanoq. ¹⁷Aretaq chi' xqib'isax ukoq ri sipanik, xuk'am ukoq jumuq' chrech ri k'aj e xuporoj pa ri q'aq' cho ri ab'aj rech tab'al toq'ob', puwi' ri holokosto xb'an aq'ab'il.

¹⁸Xoquje' xuch'ol ri ama' wakax e ri ama' chij arech kub'an ri tab'al toq'ob' rech ri riqoj ib' pakiwi' ri siwantiniit. Ri e'uk'ojol ri A'aron xkijach chrech ri kik'el e ri are' xuq'ej ub'i chrij ri ab'aj rech tab'al toq'ob'. ¹⁹Ri uxepo ri ama' wakax e ri uxepo ri ama' chij ri', ri uje', ri xepo k'o chunaqaj ri upam, ri ukinaq', ri uxepo k'o chrij ri useseb', ²⁰xuya cho ri uwokik'u'x ri kaminaq taq awaj e xuporoj cho ri ab'aj rech tab'al toq'ob'. ²¹Ri uwokik'u'x e ri jetaq ra', xusilob'isaj ri A'aron chuwach ri Yahweh jeri' jacha xtaqan ri Yahweh chrech ri Mo'ises.

²²Ri A'aron xuwa'lisaj ri uq'ab' pakwi' ri siwantinimit e xe'utewchi'j. K'atek'uri', aretaq chi' xb'antajik ri tab'al toq'ob' rech ri sachib'al mak, xb'antaj ri holokosto e ri tab'al toq'ob' rech ri riqoj ib', xqaj uloq; ²³K'atek'uri' ekeb' ruk' ri Mo'ises xok ub'i pa ri Tz'um Ja rech ri Riqoj Ib'. E aretaq chi' xe'el uloq xkitewchi'j ri siwantinimit. Ri uq'ijil ri Yahweh xq'alajinik chkiwach konojel ri siwantinimit, ²⁴jun ujuluw q'aq' xel uloq chuwach ri Yahweh e xub'ujuwisaj ub'i ri holokosto e ri taq xepo k'o cho ri ab'aj rech tab'al toq'ob'. Aretaq chi' xilitaj weri' konojel winaq xkiraq kichi' rumal kik'otomal e konojel xkijupab'a' ri kiwach pulew.

Utz'aqatil taq pixab':**Ri awas puwi' ri Nadab' e Ab'ihu**

10¹Ri Nadab' e ri Ab'ihu che e'uk'ojol ri A'aron, chkijujunal xkik'am koq ri kichukub'al porob'al rech ri k'ok' q'ol. Xkikuch ri q'aq' chupam e xkikoj k'ok' q'ol chupam e xkisujaj chuwach ri Yaheh jun q'aq' che man tyox q'aq' taj e che man xe'utaq ta chrech. ²K'atek'uri', xel uloq xas chuwach ri Yahweh jun ujuluw q'aq' che xe'uporoj ub'i ri e'are' e xekam ub'i chuwach ri Yahweh.

³K'atek'uri' ri Mo'ises xub'ij chrech ri A'aron: «Are wa' ri xub'ij ri Yahweh ri':

Chkixo'l ri jachintaq ek'o naqaj chwech in, kink'ut na ri nutyoxil e chkiwach konojel ri siwantinimit kink'ut na ri nuq'ijil». Ri A'aron man k'o ta xub'ij, xutz'apij ri uchi'.

Ri kiwa'lisaxik ri jetaq kaminaqib'

⁴Ri Mo'ises xe'usik'ij ri Misa'el e ri Elsafan, ri e'uk'ojol ri Ussi'el, che rikan ri A'aron rumal ri utat e xub'ij chkech: «Chixqet uloq e naj che'iwesaj ub'ik ri e'iwachalal chech ri tyoxlaj k'olb'al, naj che'ika'ma' ub'ik chech ri tz'um taq ja». ⁵Xeqeb' ukoq e ruk' ri ketz'yaq kikojom xekik'am ub'ik pa jun k'olb'al naj chech ri uk'olb'al ri tz'um taq ja, jeri' jacha xub'ij ri Mo'ises.

Pixab' puwi' ri oq'ej kb'an pakiwi'**ri echuchqajawib' kekamik**

⁶Ri Mo'ises xub'ij chrech ri A'aron e chkech ri e'uk'ojol, ri Ele'asar e ri Itamar: «Man patzka'r ta ri iwi' kib'ano e mib'it' ri jetaq iwatz'yaq, arech man kixkam ta ri ix, rumal rech che ri royowal ri Yahweh kpe ri' piwi' iwonojel ri imulim iwib'; ronojel ri rachoch ri Isra'el, konojel ri iwachalal ke'koq'ej ri' ri iwachalal che xekam ub'ik rumal ri q'aq' xutaq uloq ri Yahweh. ⁷Kixkanaj kanoq pa ri rokb'al ri Tz'um Ja rech ri Riqoj Ib', wene' rumal xib'rikil kixkam chi ub'i ri ix, rumal rech che ri ix xixji'onsaxik ruk' ri ase'ite rech ri Yahweh». Ri e'are' xkib'an ri tzij jacha ri xub'ij ri Mo'ises.

Ri uq'ilik ri amaja'

⁸Ri Yahweh xuch'ab'ej ri A'aron:

⁹«Aretaq chi' kixok ub'i pa ri Tz'um Ja rech ri Riqoj Ib', ri at e ri e'ak'ojol, mitij b'a' ri amaja' on jun chik tzam kixq'ab'ar rumal, xa jeri' k'uri', ri ix man kixkam ta ri'. Weri' jun junalik pixb'anik kanoq chkech konojel ri iwija'al, ¹⁰arech ri ix kitas uwach jachinchike ri tyoxlaj k'olb'al e ri man tyoxlaj k'olb'al taj, jachinchike ri man ch'ajch'oj taj e ri ch'ajch'oj, ¹¹e arech kik'ut chkiwach ri e'ajisra'el ronojel ri jetaq pixab' che xub'ij ri Yahweh chqech rumal ri Mo'ises».

Ri ch'qeta'q kech ri chuchqajawib' ruk'**ri sipanik kya'ik**

¹²Ri Mo'ises xub'ij chrech ri A'aron e chkech ri e'uk'ojol Ele'asar e Itamar, ri xekanaj na kanoq ruk': «Chik'ama' ukoq ri sa'om taq wa' che xkanaj na kanoq chech ri sipanik xb'an chrech ri Yahweh. Chitija' ri kaxlanwa che man k'o ta uch'amilal chunaqaj ri ab'aj rech tab'al toq'ob', rumal rech che sib'alaj tyox weri'. ¹³Ri ix, chitija' weri' pa jun tyoxlaj k'olb'al: are wa' ri ch'aqap che awech at e kech ri e'ak'ojol, are wa' ri uch'aqapil ri sa'om wa rech ri Yahweh, jewa' ri taqanik xya chwech ri in.

¹⁴Ri at e ri e'ak'ojol awuk' e ri e'ami'al, kkitij ri' pa jun tyoxlaj k'olb'al ri uwo'uk'u'x che xsilob'isax chuwach ri Yahweh, e ri ra' rech tojb'al; are wa' ri ch'aqap awech at e kech ri e'ak'ojol, uch'aqap ri xkiya ri e'ajisra'el pa ri tab'al taq toq'ob' rech riqoj ib'. ¹⁵Ri ra' che are tojb'al, ri uwo'uk'u'x che xsilob'isax chuwach ri Yahweh e ri xepo che xsa'ik cho q'aq' chrech ri Yahweh, awech at ri', xoquje' kech ri' ri ak'ojol che ek'o awuk', jeri' jacha ri junalik pixab' xinutaq ri Yahweh chrech».

Nik'aj taq pixab' chik puwi'

ri tab'al toq'ob' rech sachb'al makaj

¹⁶Ri Mo'ises xuk'ot kichi' puwi' ri ama' k'isik che tab'al toq'ob' xkichi'j rech sachb'al makaj; k'atek'uri' portajinaq chi kumal. Ri Mo'ises xpe royowal chkech ri Ele'asar e ri Itamar, ri e'uk'ojol ri A'aron che xekanaj na kanoq ruk'. ¹⁷Xub'ij: «¿Jasche man xitij ta ri kaminaq awaj pa ri tyoxlaj k'olb'al che rech sachb'al makaj? Xane sib'alaj tyox ub'antajik weri' che xya' chiwech ix arech kesaxik ri kimak ri moloj ib' aretaq chi' xita pakiwi' ri sachb'al mak chuwach ri Yahweh. ¹⁸Rajawaxik xitijo pa ri tyoxlaj k'olb'al, rumal rech che man xk'am ta ub'i ri ukik'el pa ri tyoxlaj k'olb'al jeri' jacha xintaqanik». ¹⁹Ri A'aron xub'ij chrech ri Mo'ises: «¿Pa we jun q'ij che xink'ulmaj weri', ri e'are' xkichi'j ri tab'al toq'ob' rech sachb'al mak e ri holokosto chuwach ri Yahweh! Weta xintij ri in pa we jun q'ij ri' ri kaminaq awaj rech sachb'al makaj, ¿la utz k'uri' weri' chuwach ri Yahweh?». ²⁰Aretaq chi' ri Mo'ises xuta' weri', xjororik chrech ri ranima'.

Ri q'ilik pakiwi' ri chikop che man

ech'ajch'oj taj e pakiwi' ri ech'ajch'oj

11¹Ri Yahweh xe'uch'ab'ej ri Mo'ises e ri A'aron, jewa' xub'ij chkech: ²Chixch'aw kuk' ri e'ajisra'elita e chib'ij b'a' chkech:

Chkixo'l konojel ri echikop che ek'o pulew, loq' ri' kitijo we nik'aj ri': ³Ronojel chikop che ujachom rib' ri raxk'yaq, che keb' uwach ub'anom, e che kkach'inik, loq' ri kitijo we awaj ri'. ⁴K'atek'uri', chkixo'l ri kekach'inik che ujachom rib' ri rixk'yaq, man loq' ta ri' kitijo ri kameyo, we awaj ri man ch'ajch'oj ta ri' chiwach, rumal rech che we are' kkach'inik, k'atek'uri' man keb' taj ub'anom ri razk'yaq; ⁵man ch'ajch'oj ta ri' chiwach ri imul, rumal rech che kkach'inik, k'atek'ut, man keb' taj ub'anom ri raxk'yaq; ⁶xoquje' man ch'ajch'oj ta ri' chiwach ri nimalaj imul, rumal rech che ri are' kkach'inik, k'atek'ut, man keb' taj ub'anom ri raxk'yaq; ⁷man ch'ajch'oj ta ri' chiwach ri aq, kne'b'a' keb' ub'anom ri raxk'yaq, ri are' man kkach'in taj. ⁸Man kitij ta ri' ri uti'j e man kichap ta ukoq aretaq chi' kaminaq chik, ri jetaq aq man ech'ajch'oj ta ri' chiwach.

Ri jetaq chikop erech ja'

⁹Chkixo'l ri jetaq chikop che ek'o pa taq ri ja', loq' ri' kitijo we nik'aj ri': Konojel ri k'o alaj taq kixk' e che' kij, kne'b'a' erech ri polow on erech taq nimaja', loq' ri' kitijo. ¹⁰Tek'ut, konojel ri ma k'o ta alaj taq kixik' e ri man che' ta kij, chkixo'l konojel ri kqotej kib' pa taq ri polow, pa taq ri nimaja', e chkixo'l konojel ri echikop chik che erech ri taq ja', man ech'ajch'oj ta ri' chiwach. ¹¹Man kitij ta ri' ri kiti'j, itzel ri' ri kaminaq kib'aqil chiwach. ¹²Konojel ri ek'o pa ja' che man k'o ta alaj taq kixik' e che man che' ta kij, man ech'ajch'oj ta ri' chiwach.

Ri echikop ajuwokaj

¹³Chkixo'l ri chikop ajuwokaj, are wa' ri man ech'ajch'oj ta chiwach; man kitij taj rumal rech che man e'utz taj:

Ri xik, ri ajq'ipilb'aq, ri xik k'o pa ri polow, ¹⁴ri k'uch, ronojel uwach halkon (chikop ajtijil ti'j), ¹⁵ronojel uwach joj, ¹⁶ri avestruz, ri xoch', ri gavi'ota, ronojel uwach xik, ¹⁷ri k'uyk'uy, ri tukur, ri xoch', ¹⁸ri sisne, ri pelikano, ri saq k'uch, ¹⁹ri sigueña, ronojel uwach garsa, ri ab'ub'illa e ri sotz'.

Ri inlaj taq chikop che k'o kixik'

²⁰Konojel ri inlaj taq chikop che k'o kixik' e che k'o kijeb' kaqan, man ech'ajch'oj taq ri' chiwach. ²¹K'atek'ut, konojel we inlaj taq chikop ri' che k'o kixik' e k'o kijeb' kaqan, k'atek'uri' k'o chi na nik'aj kaqan che kuya'o kech'oplin ruk' cho ri ulew. ²²Loq' ri' ki'tijo we nik'aj ri': Ronojel uwach sak', ronojel uwach solam, ronojel uwach jargol, jagab'. ²³Xaq apachinchike inlaj taq chikop chik che k'o kixik' e kijeb' kaqan, man ech'ajch'oj ta ri' chiwach e man ki'tij ta ri'.

We xchap ukoq jun chikop che ma ch'ajch'oj taj

²⁴Kumal we nik'aj chikop ri', ri ix kixtz'ilob' kan ri'. Jachin kuchap ukoq ri kaminaq kib'aqil, xutz'ilob'isaj kan rib' ri' chi k'ate' na b'enaqij. ²⁵Jachin kuwa'alisaj ri kaminaq ub'aqil, rajawaxik ri' kuch'aj ri jetaq ratz'yaq e tz'il ri' kkanaj kan ri are' chi k'ate' na b'enaq'ij. ²⁶Xoquje', konojel ri chikop che xa jun ub'anom ri kixk'yaq, che man pirtajinaq taj e man kekach'in taj, man ech'ajch'oj ta ri chiwach; jachin ke'uchap ukoq tz'il ri' kkanaj kanoq. ²⁷Chkixo'l ri chikop che ko kijeb' kaqan e keb'in ruk' ri upakaqan, man ech'ajch'oj ta ri' chiwach; jachin kuchap ukoq ri kaminaq kib'aqil, xutz'ilob'isaj kan rib' ri' chi k'ate' na b'enaq'ij, ²⁸e jachin kuwa'lisaj jun kaminaq kib'aqil, rajawaxik ri' kuch'aj ri ratz'yaq e xutz'ilob'isaj kan rib' ri' chi k'ate' b'enaq'ij. We chikop ri' man ech'ajch'oj ta ri' chiwach.

Ri inlaj taq chikop che ek'o pulew

²⁹Chkixo'l ri inlaj taq chikop che kkijuruj kib' pulew, ri man ech'ajch'oj ta chiwach, e'are ri nik'aj ri': ri kux, ri ch'o, ronojel uwach ayin, ³⁰ri par, ri ayin, ri kamele'on, ri salamandra e ri b'a.

**Nik'aj taq pixab' chik puwi', aretaq
chi' kutz'ilob'isaj rib' jun kumal ri chikop**

³¹Chkixo'l konojel ri inlaj taq chikop, are wa' ri man ech'ajch'oj ta chiwach. Konojel winaq che kkichap ukoq ri kaminaq kib'aqil, ktz'ilob'isaj kib' ri chi k'ate' na b'enaq'ij.

³²We ktzaq ri kaminaq ub'aqil jun chikop puwi' jun jas uwach, xaq apas uwach ne', xas xtz'ilob' ri', kne'b'a' jun chakub'al b'anom ruk' che', on jun atz'yaq, on jun tz'um, jun chake't, ronojel uwach chakub'al. Kich'aj ri' ruk' ja' e zas tz'il wi kkanaj kanoq chi k'ate' na b'enaq'ij na. ³³We ktzaq jun chkech ri kaminaq b'aqilal pa jun b'amb'ala', kipaxij ub'i ri' ri b'amb'ala', e ri k'o chupam ma ch'ajch'oj ta chi ri'. ³⁴Ronojel wa che xb'an ruk' we joron ri', xoquje' man ch'ajch'oj ta chi ri'; e ronojel uk'ya' ktijow pa ri jetaq k'olb'al ri', ma ch'ach'oj ta ri'. ³⁵Ronojel jas uwach jawi' ktzaq ukoq jun kaminaq b'aqilal ri', man ch'ajch'oj ta chi ri': ri nim tuj e ri inlaj tuj kipuk'ij b'i ri' rumal rech che man ch'ajch'oj ta chik e man ch'ajch'oj ta chi wi ri' chiwach, ³⁶k'atek'ut, ri jetaq k'uwa', ri jetaq cho, saq ri' kkanaj kanoq; jachin k'u chi winaq kuchap ukoq ri kaminaq kib'aqil, man ch'ajch'oj ta chik kkanajik. ³⁷Xoquje' junam weri' we ktzaq jun kaminaq b'aqil puwi' ri ija' che rech ktikik, ch'ajch'oj ri' kkanaj kanoq, ³⁸k'atek'ut, we ch'aqalik ri ija' e ktzaq jun kaminaq b'aqilal puwi', man ch'ajch'oj ta chi ri' chiwach.

³⁹We kkam jun chkech ri chikop che loq' ktijowik, jachin ri winaq kuchapo, ri are' xutz'ilob'isaj rib' ri' chi k'ate' na b'enaq'ij, ⁴⁰jachin ktijow ri uti', rajawaxik ri' kuch'aj ri jetaq ratz'yaq e xutz'ilob'isaj rib' ri' chi k'ate' b'enaq'ij na; jachin kuwa'lisaj ri kaminaq chikop ri', rajawaxik che kuch'aj ri jetaq ratz'yaq e xutz'ilob'isaj rib' ri' chi k'ate' chaq'ab' na.

Nik'aj taq chomanik che rajawaxik kch'ob'ik

⁴¹Ronojel inlaj chikop che kmäch'q'a'yik pulew, xas ma ch'ajch'oj ta ri', man loq' taj ktijowik. ⁴²Ronojel chikop che kusan rib' chupam kb'inik on che kb'in ruk' kijeb' raqan on kb'in ruk' k'i taq raqan, wa' kub'ij ri', che konojel ri inlaj taq chikop che kemäch'q'ay pulew, ma loq' taj kketijowik rumal rech che man ech'ajch'oj taj. ⁴³Mitz'ilob'isaj iwib' xaq ruk' apachinchike we inlaj taq chikop ri' che kemäch'q'a'yik, mitz'ilob'isaj iwib' rumal jun chkech e'are'; arech ri ix, ix ch'ajch'oj. ⁴⁴Rumal rech che in ri in Yahweh che Inidyos; chityoxrisaj iwib' e ix tyox nak'uri' rumal rech che tyox ri nub'antajik ri in; mitz'ilob'isaj iwib' ruk' jun chkech we inlaj taq chikop ri' che kemächq'a'yik pulew. ⁴⁵Je' nak'ut, in ri in Yahweh che xixinwesaj uloq chi pa ri Egipto uloq, arech kinnuxik in Idyos. Chib'ana b'a' ix tyoxlaj taq winaq rumal rech che tyox ri nub'antajik ri in.

K'isb'al taq tzij

⁴⁶Are wa' ri pixab' pakiwi' ri echikop, ri e'ajuwokaj, e ronojel ri ek'ask'oj e kisilob' pa ri jetaq ja' e konojel ri kemächq'ay pulew; ⁴⁷arech ch'ob'talik chiwach jachinchike ri man ch'ajch'oj taj e jachinchike ri ch'ajch'oj, jachinchike ri loq' ktijowik e ri ma loq' taj ktijowik.

**Ri uch'ajch'ob'exik
ri ixoq che ku'tzir ruk' ak'al**

12¹Ri Yahweh xuch'ab'ej ri Mo'ises e jewa' xub'ij chrech ri':

²Che'ach'ab'ej ri e'ajisra'el e chab'ij we tzij chkech ri': Aretaq chi' jun ixoq, yawab' ixoq chik e aretaq chi' ku'tzirik, we ala ri ral, ri are', kkanaj wuqub' q'ij ri' man ch'ajch'oj taj, jeri' nak'uri' jacha pa taq ri uq'ij uch'ajo'n. ³Pa ri uwajxaq q'ij, kq'at na ri' ri uwi' ri ukowil ri ak'al; ⁴k'atek'uri' ri ixoq, juwinaq oxlajuj q'ij kkanaj na kanoq arech kuch'ajch'ob'ej rib' chrech ri kik'el. Man k'o ta jun jas uwach che tyoxlaj ub'antajik kuchapo, xoquje' man ya'tal taj kb'e pa ri tyoxlaj k'olb'al, chi k'ate' na ktz'aqat ri jetaq q'ij che kuch'ajch'ob'ej rib'

⁵We aretaq chi' ku'tzirik, ali ri ral, ri are' kkanaj keb' xmano ri' man ch'ajch'oj taj, jeri' jacha pa taq ri q'ij che k'o ri uch'ajo'n, e kkanaj chi na kanoq oxk'al waqib' q'ij arech kuch'ajch'ob'ej rib' chrech ri kik'el.

⁶Aretaq chi' ktz'aqatik ri q'ij rech kuch'ajch'ob'ej rib', kne'b'a' ala on ali ri ak'al, kuk'am ub'i ri' jun alaj chij jun unjab' rech ri holokosto e jun palomax on jun alaj ut rech ri tab'al toq'ob' sachb'al makaj, kuk'am ub'i chuwach ri chuchqajaw pa ri rokb'al ri Tz'um Ja rech ri Riqoj Ib'. ⁷Ri chuchqajaw kuchi'j ri' weri' chuwach ri Yahweh, kuta ri' puwi' ri ixoq ri sachb'al umak e ri are' ch'ajch'oj ri' kkanajik chrech ri uk'ik'el xutzaqo.

Are wa' ri pixab' puwi' ri ixoq che ku'tz ir ruk' ak'al, ala on ali ne'. ⁸We ri ixoq man kuriq ta ri pwaq che uloq'ik jun ko'lik awaj, chuk'ama' ub'i keb' taq ut on keb' taq palomax, jun rech ri holokosto, ri jun chik rech ri tab'al toq'ob' sachb'al makaj. Ri chuchqajaw kuta ri' sachb'al mak puwi' ri ixoq e ri are' ch'ajch'oj ri' kkanaj kanoq.

Ri yab'il che kq'iyik utz'umal ri winaq

13¹Ri Yahweh xe'uch'ab'ej ri Mo'ises e ri A'aron, jewa' xub'ij chkech ri': ²We kk'iy uloq cho ri utz'umal jun winaq jun t'ort'ik awas, jun ch'a'k on jun salpi'ch che kq'ilq'atik, k'atek'uri' kujal ub'ik che kq'iy ri utz'umal ri winaq, ri winaq ri' kk'am ub'i ri' chuwach ri A'aron, on chuwach jun chkech ri eralk'uwa'l, ri echuchqajawib'. ³Ri chuchqajaw kunik'oj ri' ri ch'a'k k'o cho ri utz'umal. We saq chik ri wi'aj k'o pa ri uk'olb'al ri ch'a'k, we k'o chi jun jul pa ri utz'umal, weri' are ri yab'il che kq'iy utz'umal ri winaq; aretaq chi' xilitaj rumal ri chuchqajaw, kusqarisaj ri' che ri jun winaq ri' che man ch'ajch'oj ta chik. ⁴Tek'ut, we k'o jun saq salpi'ch cho ri utz'umal che kq'ilq'atik, k'atek'ut man k'o ta jul ub'anom cho ri utz'umal ri winaq e man saq ta ri wi' k'o chupam, ri chuchqajaw kutz'apij ri' ri yawab' wuqub' q'ij. ⁵Pa ri uwuq q'ij kunik'oj chi jumul ri' ri sin winaq. We krilo che ri ch'a'k xtani'k, man xoqan taj pa ronojel ri utz'umal, kutz'apij chi na wuqub' q'ij; ⁶aretaq chi' kok'ow ri wuqub' q'ij kunik'oj chi na jumul ri'. Ri are', e we krilo che ri ch'a'k man xoqan ta chrij ri utz'umal, ri chuchqajaw kusaqarisaj ri' che ri are' ch'ajch'oj winaq; weri' xaq jun ch'a'k. Aretaq chi' ri are' xch'ajtaj rumal ri jetaq ratz'yaq, ch'ajch'oj winaq ri' kkanaj kanoq.

⁷K'atek'ut, we ri salpi'ch koqanik pa ri utz'umal, aretaq chi' xilitaj rumal ri chuchqajaw e xb'itajik che ch'ajch'oj ri winaq ri', kk'am chi b'i jumul ri' chuwach ri chuchqajaw. ⁸Aretaq chi' kril ri chuchqajaw che ri ch'a'k tajin koqanik cho taq ri utz'umal, kuq'alajisaj ri' che we winaq ri' man ch'ajch'oj taj: weri' jun yab'il che kq'iy ri utz'umal.

Ri nimatajinaq uq'iyik utz'umal jun winaq

⁹Aretaq chi' k'o jun salpi'ch cho ri utz'umal jun winaq jeri' jacha tajin kq'iy ri uti'ojal, kk'am ub'i ri' ri are' chuwach ri chuchqajaw. ¹⁰Ri chuchqajaw kunik'oj ri' ri are' e we krilo che saq ub'anom jun t'ort'ik cho ri utz'umal e saq chi ri wi'aj e sipojinaq ri cha'k, ¹¹weri' are ri yab'il che kq'iy ri utz'umal e nimatajinaq chik. Ri chuchqajaw kusaqarisaj ub'ixik ri', che ri are', man ch'ajch'oj taj. Ma kutz'apij ta ri' rumal rech che man ch'ajch'oj taj.

¹²K'atek'ut, we ri uq'iyik utz'umal oqinaq chi chuwach ronojel ri utz'umal, kmajtaj ub'ik cho ri ujolom e kopan cho taq raqan, aretaq chi' xilitaj rumal ri chuchqajaw, ¹³ri chuchqajaw kunik'oj na ri' ri yawab', e we krilo che ri yab'il b'enaq chuwach ronojel ri utz'umal, kuq'alajisaj ri' che ch'ajch'oj ri yawab': ri jetaq ch'a'k, saq b'enaq ronojel, ri yawab' ch'ajch'oj ri'. ¹⁴K'atek'ut, we ri chuchqajaw krilo che tajin kpujinik ri jetaq ch'a'k, ri yawab' man ch'ajch'oj ta ri'. ¹⁵Aretaq chi' kilitaj ri ch'a'k kpujinik, ri chuchqajaw kuq'alajisaj ri' che ri yawab' man ch'ajch'oj taj. Man ch'ajch'oj ta ri' ri ch'a'k kpujinik; are ri yab'il che kq'iy ub'aqil ri winaq. ¹⁶K'atek'ut, we kjaltajik ri ch'a'k kpujinik e kujal saq, ri yawab' kb'e chi jumul ri' chuwach ri chuchqajaw, ¹⁷kunik'oj chi jumul ri', e aretaq chi' krilo che xujal saq ri ch'a'k che kpujinik kanoq, kusaqarisaj ri' che ch'ajch'oj ri yawab'. Ri are' ch'ajch'oj ri' kkanajik.

Ri ch'a'k kpujinik

¹⁸Aretaq chi' jun winaq xu'tzir ri ch'a'k kpujinik k'o chutz'umal, ¹⁹e pa uk'exwach ri ch'a'k ri' xel uloq jun saq t'ort'ik on xel uloq jun salpi'ch che saqsoj e kyaqkoj, we winaq ri' kuk'utu' rib' chuwach ri chuchqajaw. ²⁰Ri chuchqajaw kunik'oj ri' ri are'; we ri are' krilo che job'jik ub'anom ub'i chuwach ri utz'umal e saq chik ri wi'aj, ri chuchqajaw kuq'alajisaj ri' che ri winaq ri' man ch'ajch'oj taj: weri' jun ch'ak che kuq'iyisaj ri b'aqilal. ²¹We kilitajik rumal ri chuchqajaw che man saq ta ri wi'aj e man job'jik taj ub'anom ub'i chuwach ri utz'umal, e qajinaq chi ri uwach, kutz'apij kan ri' ri yawab' wuqub' q'ij. ²²K'atek'uri', we ri yab'il koqanik pa ronojel utz'umal, ri chuchqajaw kuq'alajisaj ri' che ri yawab' man ch'ajch'oj taj, k'o chrech ri yab'il che kq'iy ri ti'ojal. ²³K'atek'ut, we ri salpi'ch man kb'in taj, junam kkanajik, weri' xa tajin kchaqijirik ri ch'a'k; ri chuchqajaw kuq'alajisaj ri' che we winaq ri' ch'ajch'oj.

Aretaq chi' xk'at utz'umal jun winaq

²⁴Aretaq chi' xk'at jun winaq, e cho ri k'atinaq kk'iy uloq jun awas che saqsoj e kyaqkoj, ²⁵ri chuchqajaw kunik'oj ri' weri'. We krilo che saq chik ri wi'aj e job'jik ub'anom ub'i chuwach ri utz'umal, wa' weri' xujal ub'i ri yab'il che kuq'iyisaj ri ti'ojal jawi' ri xk'atik wi ri winaq. Ri chuchqajaw kuq'alajisaj ri' che ri winaq man ch'ajch'oj taj, k'o ri yab'il chrech che kq'iy ri utz'umal. ²⁶K'atek'ut, we ri chuchqajaw, krilo che man k'o ta saq wi'aj pa ri saqsoj e kyaqkoj e man job'jik taj ub'anom ub'ik chuwach ri utz'umal e qajinaq chi ri uwach, ri chuchqajaw kutz'apij ri' ri yawab' wuqub' q'ij. ²⁷Pa ri uwuq q'ij kunik'oj chi jumul ri' e we oqinaq chi cho ri utz'umal, kuq'alajisaj ri' che man ch'ajch'oj ta ri winaq ri', ri uyab'il are ri kq'iy ub'aqil. ²⁸E k'ut, we ri awas man k'iyinaq taj, junam ub'anom e qajinaq chi ri uwach, wa' weri' xa xsipoj uwach ri utz'umal rumal che xk'atik. Ri chuchqajaw kuq'alajisaj ri' che we winaq ri' ch'ajch'oj, xa tajin kchaqijik ri uk'olb'al utz'umal che xk'atik.

Ri jetaq yab'il cho ri utz'umal ujolom jun winaq

²⁹We jun winaq, chi achi chi ixoq, kel uloq jun ch'a'k cho ri ujolom on cho ri ukakte', ³⁰ri chuchqajaw kunik'oj ri' ri ch'a'k ri', e we job'jik ub'i chuwach ri utz'umal, e q'an chik ri jetaq wi'aj e tajin ktzaq ub'ik, kuq'alajisaj ri' che man ch'ajch'oj ta ri winaq. Wa' weri' are ri yab'il che kq'iy ri utz'umal rech ujolom e ri ukakte'.

³¹Aretaq chi' ri chuchqajaw kunik'oj we yab'il ri', e krilo che job'jik ub'i chuwach ri utz'umal e man k'o q'an taq wi'aj, kutz'apij ri' ri yawab' wuqub' q'ij. ³²Pa ri uwuq q'ij kunik'oj chi jumul ri' ri ch'a'k, e we krilo che job'jik chi na chuwach ri utz'umal e man k'iyinaq taj, man q'an ta ri wi'aj, ³³ri yawab' winaq ri', kusokaj na ri' ri uwi', k'atek'ut xuwi man kusokaj ta ri' jawi' k'o wi ri ch'a'k, e ri chuchqajaw kutz'apij chi na wuqub' q'ij ri'. ³⁴Pa ri uwuq' q'ij, kril chi na jumul ri' ri chuchqajaw, e we krilo che man k'iyinaq taj pa nik'aj taq utz'umal chik e man job'jik taj ub'anom chuwach ri utz'umal, ri chuchqajaw kuq'alajisaj ri' che ch'ajch'oj we yawab' winaq ri'. Kuch'aj ri' ri jetaq ratz'yaq e ch'ajch'oj ri' kkanaj kanoq.

³⁵K'atek'uri', we aretaq chi' xch'ajch'ob'etajik, ri ch'a'k xk'iy chi na uloq e koqanik pa ri utz'umal, ³⁶ri chuchqajaw kunik'oj ri'; we krilo che tajin koqanik ri ch'a'k pa ri utz'umal, man kunik'oj ta chi ri' we k'o q'an wi'aj, ri yawab' winaq ri' man ch'ajch'oj taj. ³⁷K'atek'ut, krilo che ri ch'a'k junam ub'anom e tajin kk'iy uloq jujun qeq' taq wi'aj, xa tajin kutzir ri'. Ri yawab' winaq ri', ch'ajch'oj ri' e ri chuchqajaw kuya ub'ixik ri' che ch'ajch'oj ri are'.

Ri kq'ilq'atik salpi'ch

³⁸We kq'ilq'atik ri salpi'ch k'o cho ri utz'umal jun achi on jun ixoq e saq we salpi'ch ri', ³⁹ri chuchqajaw kunik'oj na k'uri' weri'. We krilo che saq we jetaq salpi'ch ri', wa' weri' xaq jun salpi'ch ri' xk'iy uloq cho ri utz'umal: ri yawab' winaq ch'ajch'oj ri'.

Ri tz'antz'oj jolomaj

⁴⁰We jun achi ktzaq ub'i ri uwi' e tz'an tz'oj ujolom kkanaj kan chrij, ri are' ch'ajch'oj winaq ri'. ⁴¹We ktzaq ub'i ri uwi' chuwach, tz'antz'oj nak'uri' kkanaj chuwach, e ch'ajch'oj ri'. ⁴²K'atek'ut, pa ri tz'antz'oj wi, chrij on chuwach, kel uloq jun saqsoj ch'a'k, wa' weri' are ri yab'il che kq'iy uti'ojal. ⁴³Ri chuchqajaw kunik'oj ri' ri are' e we krilo jawi' ri tz'antz'oj wi che k'o jun saqsoj e kyaqkoj t'ort'ik, jacha ri yab'il che kq'iy ri b'aqilal, ⁴⁴we achi ri' tajin kq'iy ri' ri ub'aqil; man ch'ajch'oj ta ri'. Rajawaxik che ri chuchqajaw kuya ub'ixik che ri are' ma ch'ajch'oj taj, tajin kq'iy ri ujolom.

Ri rajawaxik kub'an jun winaq che tajin kq'iy ub'aqil

⁴⁵Ri winaq che tajin kq'iy ub'aqil, rach'atajinaq ri' ri ratz'yaq kukojo e patzkar ri' ri uwi'; kuch'uq ri' ri rismachi' e kuraqaqej uchi ri': «;Man in ch'ajch'oj taj!, ;man in ch'ajch'oj taj!>. ⁴⁶Chi k'ate' jampa na kk'oji' ri ch'a'k chrij, ri are' man ch'ajchoj ta ri', e utukel ri' kk'oji' apanoq: ri rachoch man kk'oji' ta ri' chkixo'l ri tz'um taq ja.

Ri retal ri yab'il kq'iy b'aqilal kriqitaj chrij ri jetaq atz'yaq

⁴⁷Aretaq chi' kriqitaj chrij ri atz'yaq retal ri yab'il kq'iy b'aqilal, rismal chij on lino ri atz'yaq, ⁴⁸jun kemom atz'yaq, jun k'ul rismal chij on lino, on jun tz'um on jun jas uwach che chakum ruk' tz'um, ⁴⁹we ri salpi'ch chrij ri atz'yaq, ri tz'um, ri kem, on ri k'ul, on ri jas uwach che chakum ruk' tz'um, kq'alajinik che raxroj on kyaqkoj, wa weri' yab'il che kq'iy ri b'aqilal e rajawaxik ri' kkik'ut chuwach ri chuchqajaw. ⁵⁰Ri chuchqajaw kunik'oj ri' e

kutz'apij ri' wuqub' q'ij. ⁵¹Pa ri uwuq q'ij kunik'oj chi jumul ri' e we krilo che ri salpi'ch tajin xknimarik pa ri kem, on pa ri k'ul, on pa ri tz'um, on pa ri jas uwach chakum ruk' tz'um, wa' weri' are ri yab'il che kq'iy b'aqilal: we jun jas uwach ri' man ch'ajch'oj ta chi ri'. ⁵²Kporox ri' ri atz'yaq, ri kem, ri k'ul che rismal chij on lino, ri jun jas uwach che chakum ruk' tz'um, rumal rech are ri yab'il che kq'iy ri b'aqilal e rajawaxik che kporox b'i pa ri q'aq'.

⁵³K'atek'ut, we ri chuchqajaw krilo che man nimarinaq taj, cho ri atz'yaq, ri kem, ri k'ul, on cho ri jun jas uwach cheh chakum ruk' tz'um, ⁵⁴ktaqan ri' arech kch'ajik e kutz'apij chi na jumul wuqub' q'ij. ⁵⁵Aretaq chi' xch'ajtajik, k'atek'uri' kril ri chuchqajaw che junam kka'yik, kne'b'a man nimarinaq ta ri salpi'ch, ri jun jastaq ri' man ch'ajch'oj taj. Kporox ub'i ri' pa ri q'aq': are ri yab'il ri', xas chuwach e chusal uloq.

⁵⁶K'atek'ut, we ri chuchqajaw krilo, che aretaq chi' xch'ajtajik, ri salpi'ch xqaj uwach, kumich'ej na ri' cho ri atz'yaq, ri tz'um on cho ri kem on cho ri k'ul. ⁵⁷K'atek'ut, we kel chi uloq jumul cho ri atz'yaq ri', ri kem, ri k'ul, on cho ri chakum ruk' tz'um, wa' we yab'il ri' koqanik, kaporoj ri' pa ri q'aq' weri'. ⁵⁸K'atek'uri' ri atz'yaq, ri kem, ri k'ul on ri jas uwach chakum ruk' tz'um, che xel ri salpi'ch chrij aretaq chi' xch'ajtajik, kcha'j chi na jumul ri' e ch'ajch'oj ri' kkanajik.

⁵⁹Are wa' ri pixab' puwi' ri salpi'ch che rech ri yab'il che kq'iy b'aqilal, kk'ojji' cho taq ri atz'yaq b'anom ruk' rismal chij, on lino, on jun kem, jun k'ul, on jun jas uwach che tz'um, arech kch'ob'tajik e rajawaxik kya ub'ixik we ch'ajch'oj on man ch'ajch'oj taj.

Ri uch'ajch'ob'exik ri winaq che tajin kq'iy ri ub'aqil

14¹Ri Yahweh xuch'ab'ej ri Mo'ises, jewa' xub'ij chrech:

²Are wa' ri pixab' rajawaxik kb'an ruk' ri winaq che tajin kq'iy uyab'il, pa ri q'ij che kch'ajch'ob'exik. Kk'am ub'i ri' chuwach ri chuchqajaw, ³e ri chuchqajaw kel ub'i ri' pa ri k'olb'al jawi' k'o wi ri jetaq tz'um ja. We xnik'ojisatajik rumal e krilo che utzirinaq chi ri yab'il chrij, ⁴ktaqan ri' che uk'amik uloq, rech ri winaq che kch'ajch'ob'exik, keb' palomax che ek'aslik e ech'ajch'oj; xoquje' kk'am uloq ri' jetaq tz'alam che tak'ar ri uche'al, jun kyaq manta e nik'aj taq chikb'al kik'el.

⁵K'atek'uri', ktaqan ri' arech kkamisax jun chkech ri inlaj taq chikop ajuwokaj puwi' jun b'o'j che nojinaq chrech k'ak' joron. ⁶Kuk'am chi ukoq ri' ri jun chik chikop ajuwokaj che k'aslik na, xoquje' kuk'am ukoq ri' ri tz'alam rech tak'ar, ri kyaq manta e ri jetaq chikb'al kik'el, kunim ri' pa ri ukik'el ri inlaj chikop ajuwokaj che xkamisaxik puwi' ri k'a'k joron. ⁷K'atek'uri', wuqub' mul kuchikej ri' puwi' ri winaq che rajawaxik kch'ajch'ob'exik chrech ri yab'il che kq'iy ri ub'aqilal. E aretaq chi' xuya ub'ixik che ri are' ch'ajch'oj chik, kutzoqopij ub'i ri' ri inlaj chikop ajuwokaj che k'aslik kanoq. ⁸Ri winaq che xuch'ajch'ob'ej rib', kuch'aj na ri' ri jetaq ratz'yaq, kusokaj ri' ri uwi', karatinsaj rib' ri' pa k'ak' joron e ch'ajch'oj ri' kkanajjik. K'atek'uri', ktzalej ri' pa ri k'olb'al jawi' k'o wi ri jetaq tz'um ja; xuwi loq' kub'an weri' we wuqub' q'ij xkanaj kan utukel pa ri tz'um rachoch. ⁹Pa ri uwuq q'ij kusokaj ri' ronojel ri uwi', ri kiykik uwi', ri rismachi', ri rismal uwoqoch; rajawaxik kusokaj ronojel uwi'. Aretaq chi' xch'ajtaj ri jetaq ratz'yaq e xch'ajanik ri are' pa ri k'ak' ja, ch'ajch'oj winaq ri' kkanajjik.

¹⁰Pa ri uwajxaq q'ij, kuk'am ub'i ri' keb' ama' alaj taq chij che man k'o ta kiyab', jun ati't chij che jun ujunab', xoq man k'o ta uyab', chrech lajuj uch'aqapil jun pajb'al utzalaj k'aj, kruk'aj ub'i oxib' uch'aqapil yob'om ruk' ase'ite, weri' rech ri sipanik kb'anik, xoquje' kuk'am b'i jun pajb'al ase'ite. ¹¹Pa ri rokb'al ri Tz'um Ja, ri chuchqajaw che kb'anow ri

ch'ajch'ob'enik, kuya ri' chuwach ri Yahweh ri jun winaq che kch'ajanik e ronojel ri jastaq che rech ri sipanik. ¹²Kuk'am ukoq ri' jun chkech ri alaj taq ama' chij. Kuchi'j jun tab'al toq'ob' ri' rech tojb'al makaj, xoquje' kuchi'j ri' ri ase'ite. Ruk'am ri' puq'ab', kusilob'isaj k'uri' chuwach ri Yahweh. ¹³Kuch'ol ri' ri alaj ama' chij pa ri tyoxlaj k'olb'al jawi' kech'ol wi ri chij rech tab'al toq'ob' arech ksachitaj ri makaj e xoquje' jawi' kb'an ri holokosto. We ch'olom chij ri' che rech sachb'al makaj e ri rech tojb'al makaj, rech ri' ri chuchqajaw kkanaj kanoq; wa' weri' sib'alaj tyox ub'antajik.

¹⁴Ri chuchqajaw kuk'am ukoq ri' ri ukik'el ri kaminaq chij rech tojb'al makaj. Kupil ri' chrij rikyaq'ab' uxikin ri winaq che tajin kuch'ajch'ob'ej rib', cho chom uwi'uq'ab' rech ri rikyaq'ab' e cho ri chom uwi'raqan rech ri rikyaq'ab'. ¹⁵E kuk'am ukoq ri' ri ase'ite e kuq'ej ub'i jub'iq ri' pa ri umox uq'ab'.

¹⁶Kujut jun uwi' uq'ab' ri' rech ri rikyaq'ab' pa ri ase'ite che ruk'am pa ri umox uq'ab' e ruk' we uwi'uq'ab' ri', wuqub' mul ri' kuchikej chuwach ri Yahweh. ¹⁷Ruk' ri ase'ite che k'o na puq'ab', ri chuchqajaw kupil jub'iq' ri' pa ri rikyaq'ab' uxikin ri winaq che tajin kuch'ajch'ob'ej rib', xoquje' ruk' ri ukik'el ri tab'al toq'ob' rech tojb'al makaj kupil ri' ri chom uwi'uq'ab' rech rikyaq'ab' e ri chom uwi'raqan rech ri rikyaq'ab'. ¹⁸Ri ase'ite che k'o na puq'ab' ri chuchqajaw, kukoq na ri' cho ri ujolom ri winaq che tajin kuch'ajch'ob'ej rib'. Jewa' utayik ri' ri tojb'al umak kub'an ri chuchqajaw puwi' ri are' chuwach ri Yahweh.

¹⁹Ri chuchqajaw kub'an ri' ri tab'al toq'ob' sachb'al makaj e kub'an ri' ri tojb'al puwi' ri winaq che tajin kuch'ajch'ob'o'ej rib'. K'atek'uri' kuch'ol chi ri' ri awaj rech ri holokosto. ²⁰Kuchi'j ri' cho ri ab'aj tab'al toq'ob' rech holokosto e rech ri sipanik. Aretaq chi' ri chuchqajaw xb'an taj rumal ri tojb'al puwi' we winaq ri', ri winaq ri' ch'ajch'oj ri' kkanaj kanoq.

²¹We meb'a' ri winaq e man kub'ana' ta ri urajil, xaq jun alaj ama' chij ri' kuk'am b'ik rech ri tab'al toq'ob' tojb'al makaj, e aretaq chi' kchi'xik, ksilo'b'isax ri' jacha usilob'isaxik kb'anik ri sipanik arech ktojtajik ri umak ri winaq. Xoquje' kuk'am ub'i xa jun pajb'al chech lajup upajb'al utzalaj k'aj che yob'om ruk' ase'ite, ²²xoquje' kuk'am b'i keb' ut on keb' palomax –jacha ri kkowin ri urajil chrech– jun rech ri tab'al toq'ob' sachb'al makaj e ri jun chik rech ri holokosto. ²³Pa ri uwajxaq q'ij, kuk'am ub'i ri' weri' pa ri rokb'al ri Tz'um Ja rech ri Riqoj Ib' chuwach ri Yahweh, arech kch'ajch'ob'exik ri winaq. ²⁴Ri chuchqajaw kuk'am ukoq ri' ri chij rech tab'al toq'ob' tojb'al makaj e ri ase'ite. Kuchi'j e kusilob'isaj wa' weri' chuwach ri Yahweh.

²⁵Aretaq chi' xch'oltajik ri alaj ama chij rech ri tab'al toq'ob' tojb'al makaj, kuk'am ukoq jub'iq' ukik'el ri' e kupil ri' cho ri rikyaq'ab' uxikin ri tajin kuch'ajch'ob'ej rib', xoquje' kupil ri' cho ri rikyaq'ab' chom uwi'uq'ab' e cho ri rikyaq'ab' chom uwi'raqan. ²⁶Kuq'ej na ri' ri ase'ite pa ri umox uq'ab', ²⁷pa we ase'ite ri' che xq'ejtajik pa ri umox uq'ab', kut'in ukoq ri' jun uwi'uq'ab' e wuqub' mul kuchikej na ri' chuwach ri Yahweh. ²⁸Kupil jub'iq' cho ri rikyaq'ab' uxikin ri winaq che tajin kuch'ajch'ob'ej rib', cho ri rikyaq'ab' chom uwi'uq'ab', cho rikyaq'ab' chom uwi'raqan, weri' kub'ano jawi' xya wi ri ukik'el ri tab'al toq'ob' tojb'al makaj.

²⁹Ri ase'ite che k'o na puq'ab', kuya cho ri ujolom ri tajin kuch'ajch'ob'ej rib', e kuta ri' ri tojb'al umak chuwach ri Yahweh. ³⁰K'atek'uri', kuchi'j ri' jun chkech ri ut on ri palomax –jachinchike ne' xkowin ub'i ri winaq xuk'am ub'ik– kuchi'j ri' ³¹ri tab'al toq'ob', jun rech ri sachb'al makaj e ri jun chik rech ri holokosto, xoquje' kuchi'j ri' ri sipanik. Xa jek'uri' ri' ri chuchqajaw kub'an ri' chuwach ri Yahweh ri tojb'al makaj puwi' ri winaq che tajin kuch'ajch'ob'ej rib'.

³²Are wa' ri pixab' rech uch'ajch'ob'exik ri winaq che q'iyinaq ri utz'umal e che man k'o ta ri umeb'il.

Ri yab'il che kq'iyik ri jetaq ja

³³Ri Yahweh xe'ucha'b'ej ri Mo'ises e ri A'aron, jewa' xub'ij chkech:

³⁴Aretaq chi' ixokinaq chik pa ri tinimit Kana'an che kinya' na in chiwech e kiwechb'ej na, e we ri in kink'ajisaj kiwach jun e'ajupaja pa ri tinimit ruk' ri yab'il che kq'iyik ri ja, ³⁵ri rajaw ri ja kb'e ri' chu'b'ixik chrech ri chuchqajaw, jewa' ri' kub'ij chrech: «Ri in xinwilo che xk'iy uloq pa ri wachoch jun yab'il che tajin kuq'iyisaj ri wachoch».

³⁶Ri chuchqajaw ktaqan ri' arech kjamik ri ja aretaq chi' maja' kpe ri are' chunik'oxik ri yab'il; arech man k'o jun jas uwach che k'o chupam ri ja kya ub'ixik che man ch'ajch'oj taj. K'atek'uri', ri chuchqajaw kpe ri' che unik'oxik ri ja, ³⁷k'atek'uri', we aretaq chi' kunik'oj, krilo che ri yab'il raxroj e kyaqkoj taq jul ub'anom pa taq ri uxanal ri ja, e job'jik ub'anom ub'ik; ³⁸ri chuchqajaw kel uloq ri' pa ri uchi'ja e kutz'apij kan ri' wuqub' q'ij. ³⁹Ktzalej ulqo ri' pa ri ja pa ri uwuq q'ij e we aretaq chi' kunik'oj krilo che ri yab'il nimarinaq chi ub'i cho taq ri xan, ⁴⁰ktaqan ri' che uk'otik ub'i ri jetaq ab'aj jawi' k'o wi ri yab'il arech ksetex ub'ik naj chrech ri tinimit e pa jun tz'il k'olb'al. ⁴¹K'atek'uri' ktaqan ri' che ujosik upam ri ja e kesax ub'i ri' ri poqlaj xjos ub'ik, kk'am ub'i ri' pa jun tz'il k'olb'al naj chrech ri tinimit. ⁴²Ktzukux chi nik'aj taq ab'aj ri' arech kokisax kan pa uk'exwach ri nab'e taq ab'aj xesax ub'ik, e ktz'aj kan ri' ri ja ruk' k'ak' tz'ajb'al.

⁴³We ri yab'il kk'iy chi na uloq aretaq chi' xesatajik ri jetaq ab'aj, xjostajik ri jetaq xan e xtz'ajtaj chi jumul ri ja, ⁴⁴ri chuchqajaw kpe chi na jumul ri' che unik'oxik; e we krilo che ri yab'il xoqanik chupam ri ja, wa' we ja ri' man ch'ajch'oj ta chi ri'. ⁴⁵Kqasax ri' we ja ri'; ri jetaq ab'aj, ri jetaq tem, ri upoqlajil kk'am ub'i ri' e ksetax ri' pa jun tz'il k'olb'al, naj chrech ri tinimit.

⁴⁶Ronojel winaq che kok pa ri ja ri' pa taq ri q'ij che tz'apatalik, ri are' xutz'ilob'isaj ub'i rib' ri' chi k'ate' na kok chaq'ab'. ⁴⁷Jachin kwar chupam ri ja, rajawaxik ri' kuch'aj ri jetaq ratz'yaq. Jachin kwa' chupam, xoquje' rajawaxik kuch'aj ri jetaq ratz'yaq. ⁴⁸K'atek'ut, we ri chuchqajaw, aretaq chi' kpe chi jumul che unik'oxik, krilo che ri yab'il man xk'iy ta chik pa ri ja aretaq chi' tz'apim kanoq, kuya ub'ixik ri' che ch'ajch'oj ri ja rumal rech che xkuntajik ri yab'il.

⁴⁹Arech kb'an ri tab'al toq'ob' puwi' ri ja rech sachb'al makaj, kk'am ub'i ri' keb' palomax, jun tz'alam uche'al tak'ar, ri kyaq utinta kochiniya e ri chikb'al kik'el. ⁵⁰Kuch'ol jun ri' chkech ri inlaj taq palomax puwi' jun b'o'j che nojinaq che k'ak' joron. ⁵¹K'atek'uri', kuk'am ukoq ri' ri tz'alam uche'al tak'ar, ri chikb'al kik'el, ri utinta ri kochiniya e ri jun chik palomax, kunim wa' weri' pa ri ukik'el ri palomax xuch'olo e pa ri k'ak' ja' k'o pa ri b'o'j. E wuqub' mul ri' kuchikej weri' pa ri ja, ⁵²k'atek'uri', aretaq chi' xb'antaj ri tab'al toq'ob' sachb'al makaj puwi' ri ja, rumal ri ukik'el ri palomax, rumal ri palomax che k'as na, rumal ri tz'alam uche'al tak'ar, rumal ri chikb'al e rumal ri utinta ri kochinilla, ⁵³kutzooqopij b'i ri' ri jun chik palomax che k'as na, pa jun k'olb'al naj chech ri tinimit, pa taq juyub'. Xa jek'uri', kub'an ri tojb'al makaj puwi' ri ja, e we ja ri' ch'ajch'oj ri' kkanaj kanoq.

⁵⁴Are wa' ri pixab' puwi' ronojel yab'il che salpi'ch, ⁵⁵ri pixab' puwi' aretaq chi' kq'iy jetaq atz'yaq e kq'iy ri ja, ⁵⁶puwi' ri t'ort'ik taq yab'il, ri ch'a'k kpujinik e ri salpi'ch. ⁵⁷Ri pixab' puwi' aretaq chi' kya ub'ixik che ch'ajch'oj on man ch'ajch'oj ta jun jas uwach.

Are wa' ri pixab' puwi' ri yab'il che kq'iy b'aqilal, atz'yaq on ja.

Ri awas pa ri ub'antajik,

chi achi on chi ixoq.

Ri awas chech ri achi:

15¹Ri Yahweh xub'ij jun tzij chrech ri Mo'ises e ri A'aron je' jas weri':

²Chi'ch'ab'ej ri e'ajisra'elita, chib'ij weri' chkech: Aretaq chi' jun achi kuchuluj uloq ri saq uchul rech ukowil, rumal we saq uchul ri', man ch'ajch'oj ta ri' kkanajik. ³Jewa' ri man ch'ajch'oj ta wi rumal ri saq kchulunik:

Ri ub'aqil kuya' b'e arech kb'elelik ri saq uchul on wene' kuq'i'ej kuk'olo, xas man ch'ajch'oj ta ri'.

⁴Ri ch'at jawi' kkotz'i' wi ri achi ri' man ch'ajch'oj ta ri', e ronojel kulb'al jawi' kt'uyi' wi man ch'ajch'oj ta chi ri' kkanajik.

⁵Xaq jachin kuchap ukoq ri uch'at ri achi, rajawaxik ri' kuch'aj na ri jetaq ratz'yaq, kratinsaj rib' ri' pa ri ja', e man ch'ajch'oj ta ri' kkanajik chi k'ate' b'enaq'ij na. ⁶Jachin kt'uyi' cho jun t'uyb'al jawi' xt'uyi' wi ri achi ri', rajawaxik ri' kuch'aj ri jetaq ratz'yaq, kratinsaj rib' ri' pa ri ja' e man ch'ajch'oj ta ri' kkanajik chi k'ate' b'enaq'ij na.

⁷Jachin kuchap ukoq ri ub'aqil ri achi ri', rajawaxik ri' kuch'aj ri jetaq ratz'yaq, kuch'ajch'ob'ej rib' ri' pa ri ja', e ri are' man ch'ajch'oj ta ri' chi k'ate' b'enaq'ij na.

⁸We ri achi ri' kuchub'aj jun winaq che ch'ajch'oj, rajawaxik ri' che we winaq ri' kuch'aj ri jetaq ratz'yaq, kch'ajan pa ri ja', e man ch'ajch'oj ta ri' kkanajik chi k'ate' b'enaq'ij na.

⁹Ri xalma jawi' xaq'anik e xt'uyi' wi ri jun achi ri', man ch'ajch'oj ta chi ri'.

¹⁰Jachin kuchap ukoq jun jas uwach che xk'o'ji' chuxe' ri achi ri', man ch'ajch'oj ta chi ri' chi k'ate' b'enaq'ij na. Jachin kruk'aj ub'i we jastaq ri', rajawaxik ri' kuch'aj ri jetaq ratz'yaq e man ch'ajch'oj ta ri' kkanajik chi k'ate' b'enaq'ij na.

¹¹Xaq apachinoq ri winaq che kchap ukoq rumal we achi ri' aretaq chi' man uch'ajom ta ri uq'ab', rajawaxik che kuch'aj ri jetaq ratz'yaq, kch'ajan pa ri ja', e ri are' man ch'ajch'oj ta ri' chi k'ate' b'enaq'ij na.

¹²Ronojel b'oj che kuchap ukoq we achi ri' kpaxix ub'i ri' e ronojel jun jas uwach che', kch'aj na ri' pa ri ja'.

¹³We kutzir we achi ri' chrech we yab'il uriqom ri', kejalaxik wuqub' q'ij chi aq'anoq arech ch'ajch'oj kkanaji kanoq. K'atek'uri', rajawaxik ri' che kuch'aj ri jetaq ratz'yaq e katin ri' pa k'ak' ja' e ch'ajch'oj ri' kkanaj kanoq. ¹⁴Pa ri uwajxaq q'ij, kuk'am ub'i keb' ut on keb' palomax e kuk'utu' rib' ri' chuwach ri Yahweh pa ri rokb'al ri Tz'um Ja rech ri Riqoj Ib', arech ke'ujach chrech ri chuchqajaw. ¹⁵Jun chkech ri inlaj taq chikop, kuchi'ij ri' ri chuchqajaw tab'al toq'ob' sachb'al makaj e ri jun chik rech ri holokosto. Xa jek'uwa', ri chuchqajaw kuchi'ij ri' ri tojb'al makaj puwi' ri achi ri' rumal che kuchuluj saq ri ukowil.

¹⁶Ri achi che kuchuluj uloq ri ukowil saq ija', rajawaxik che kuch'aj ronojel ri ub'aqil e man ch'ajch'oj ta ri' kkanaj kanoq chi k'ate' b'enaq'ij na. ¹⁷Ronojel atz'yaq e ronojel tz'um che xuriq we usaqil kowil ri', rajawaxik che kch'aj pa ri ja' e ri are' e man ch'ajch'oj ta ri' kkanajik chi k'ate' b'enaq'ij na.

¹⁸Aretaq chi' jun ixoq kkotz'i' ruk' jun achi jacha uk'ulaj, rajawaxik che sas ekeb' ke'atinik pa ri ja' e man ech'ajch'oj ta ri' kekanaj kanoq k'ate' b'enaq'ij na.

Ri awas chrech ri ixoq

¹⁹Aretaq chi' jun ixoq k'o ri uch'ajo'n chi ik', kkanaj kanoq wuqub' q'ij man ch'ajch'oj taj. Jachin kchapow ukok ri are', kutz'ilob'isaj rib' ri' chi k'ate' b'enaq'ij na.

²⁰Ronojel ch'at jawi' kkotz'i' wi aretaq chi' k'o ri uch'ajo'n, man ch'ajch'oj ta chi ri'; ronojel t'uyb'al jawi' kt'uyi' wi ri ixoq ri', man ch'ajch'oj ta chi ri'.

²¹Jachin kchapow ukoq ri uch'at, rajawaxik ri' kuch'aj ri jetaq ratz'yaq, katin ri' pa ri ja' e man ch'ajch'oj ta ri' kkanaj kanoq chi k'ate' b'enaq'ij na.

²²Jachin kchapow ukoq ronojel tem jawi' ktuyi' wi ri ixoq, rajawaxik che kuch'aj ri jetaq ratz'yaq e katin pa ri ja' e man ch'ajch'oj ta ri' kkanaj kanoq chi k'ate' b'enaq'ij.

²³Jachin kchapow ukoq jun uwach che k'o cho ri uch'at ri are' on cho ri tem jawi' xt'uyi' wi, man ch'ajch'oj ta ri' chi k'ate' b'enaq'ij na.

²⁴We k'o jun achi kkotz'i' ruk' we ixoq ri', koqanik ri' chrij ri utz'ilal ri uch'ajo'n. We achi ri', wuqub' q'ij ri' man ch'ajch'oj taj. Ronojel ch'at jawi' kkotz'i' wi ri achi' ri', man ch'ajch'oj ta chi ri' kkanaj kanoq.

²⁵We k'o jun ixoq kutzaq ukik'el, k'atek'uri' man uq'ijil ta ri uch'ajo'n, on we knajtajik k'i q'ij ri uch'ajo'n, we ixoq ri', pa ronojel ri q'ij che kutzaq ukik'el, man ch'ajch'oj ta ri' jacha pa taq ri uq'ijil ri uch'ajo'n. ²⁶Ri uch'at jawi' kkotz'i' wi aretaq chi' tajin kutzaq ukik'el, man ch'ajch'oj ta ri', je' nak'uri' jacha pa taq ri uq'ijil ri uch'ajo'n. Ronojel t'uyb'al jawi' kt'uyi' wi ri are', man ch'ajch'oj ta chik kkanaj kanoq jacha pa taq ri uq'ijil ri uch'ajo'n. ²⁷Jachin kuchap ukoq, man ch'ajch'oj ta chi ri', rajawaxik kuch'aj na ri jetaq ratz'yaq e katin pa ri ja' e man ch'ajch'oj ta ri' chi k'ate' b'enaq'ij na.

²⁸Aretaq chi' ri are' xu'tzir ruk' ri uch'ajo'n, krejalaj na wuqub' q'ij, k'atek'uri' ch'ajch'oj ri' kkanajik. ²⁹Pa ri uwajxaq q'ij, ri are' ke'uk'am ub'i keb' ut on keb' palomax chuwach ri chuchqajaw pa ri rokb'al ri Tz'um Ja rech ri Riqoj Ib'. ³⁰Jun chkech ri inlaj taq chikop ri', ri chuchqajaw kuchi'j ri' tab'al toq'ob' rech sachb'al makaj e ri jun chik rech ri holokosto ri'. Ri chuchqajaw kutayij ri' ri tojb'al makaj puwi' we ixoq ri' chuwach ri Yahweh, rumal rech ri utz'ilal ri ukik'el xutzaqo.

K'isb'al taq tzij

³¹Kib'ij na ri' chkech ri e'ajisra'elita che rajawaxik kkirawasij ri jetaq kitz'ilal e xa je'nak'uri' man kekam taj rumal weri' we xkitz'ilob'isaj ri Wachoch che k'o chkixo'l.

³²Are wa' ri pixab' puwi' ri achi che amaq'el kuchuluj ri saq rech ukowil, on che kresaj ri usaqil ukowil rumal xk'oji' ruk' ixoq. ³³Xoquje' puwi' ri ixoq che k'o ri uch'ajo'n, puwi' chi achi on chi ixoq che kutzaq usaqil ukowil on ukik'el, puwi' ri achi che kkotz'i' ruk' jun ixoq aretaq chi' tajin ri uch'ajo'n.

Ri nimalaj q'ij rech tojb'al makaj

16¹Ri Yahweh xuch'ab'ej ri Mo'ises aretaq chi' xekamtaj ub'ik ri keb' uk'ojol ri A'aron, ri xekamik aretaq chi' xeqib' ukoq chuwach ri Yahweh.

²Ri Yahweh xub'ij chrech ri Mo'ises:

Chab'ij b'a' chrech ri A'aron ri awachalal: Man amaq'el taj kok ub'i pa ri tyoxlaj k'olb'al che k'o chrij ri payu', chuwach ri uk'olb'al ri sachb'al makaj che k'o puwi' ri arka. Wene' kkamik, rumal rech che in kink'ut wib' pa ri sutz' che k'o puwi' ri uk'olb'al ri sachb'al makaj.

³Ri ub'e'al che kuya'o kok ri are' pa ri tyoxlaj k'olb'al are weri': kok ub'ik, ruk'am ub'i jun ama' wakax rech tab'al toq'ob' sachb'al makaj e jun ama' chij rech ri holokosto. ⁴Are kukoj ub'i ri tyoxlaj ratz'yaq b'anom ruk' lino, kukoj ub'i ri lino usaka'w, kukoj ub'i ri lino upas, kukoj ri' cho ri ujolom ri wiqb'al rech, che xoquje' b'anom ruk' lino. Are wa ri tyoxlaj taq atz'yaq kukojo aretaq chi' xch'ajtaj ronojel ri ub'aqil.

⁵Ri mulin ib' kech ri e'ajisra'el kkiya ri' chrech are' keb' ama' k'isik' rech ri tab'al toq'ob' sachb'al makaj e kkiya ri' jun ama' chij rech ri holokosto. ⁶Aretaq chi' kuchi'j ri ama' wakax rech sachb'al makaj, kuta ri' ri sachb'al umak ri are' e ri sachb'al kimak ri e'ajuparachoch, ⁷k'atek'uri' ri A'aron, ke'uk'am ukoq ri' ri keb' ama' k'isik' e ke'uya ri' chuwach ri Yahweh

pa ri rokb'al ri Tz'um Ja rech ri Riqoj Ib'. ⁸Kretz'b'ej ucha'ik ri keb' k'isik', jun kya chrech ri Yahweh e ri jun chik kya chech ri Asasel. ⁹Ri A'aron kuchi'j ri' ri ama' k'isik' xucha'o che kuya «chrech ri Yahweh» e kuchi'j ri' tab'al toq'ob' rech sachb'al makaj. ¹⁰K'atek'uri' ri ama' k'isik' xcha'ik kya «chrech ri Asasel», k'aslik ri' kya' chuwach ri Yahweh arech kuta puwi' ri are' ri tojb'al makaj, k'atek'uri', kutzaqopij ub'ik chrech ri Asasel pa ri tz'inalik ulew.

¹¹Ri A'aron kuchi'j chi ri' ri ama' wakax rech tab'al toq'ob' sachb'al umak ri are' e sachb'al kimak ri e'ajuparachoch e kukamisaj ri' ri ama' wakax. ¹²K'atek'uri', kuk'am ukoq ri' jun uk'olb'al k'ok' q'ol che nojinaq ri' chrech rachaq q'aq' che k'amom ukoq cho ri ab'aj rech tab'al toq'ob' k'o chuwach ri Yahweh, xoquje' kuk'am ukoq ri' keb' jumuq' k'ok'alaj q'ol. Kuk'am ub'i ri' weri' chrij ri payu', ¹³e kuya ri' ri k'ok' q'ol pa ri q'aq' che k'o chuwach ri Yahweh, arech ri usib'al ri k'ok' q'ol kunojisaj ri uk'olb'al ri sachb'al makaj che k'o puwi' ri Tzib'atalik, e xa jeri' man kkam ta ri' ri are'. ¹⁴K'atek'uri', kupil ri' ri uwi'uq'ab' pa ri ukik'el ama' wakax e ruk' we uwi' uq'ab' ri' wuqub' mul kuchikej ri' ri kik'el pa ri relb'alq'ij chech ri sachb'al makaj.

¹⁵K'atek'uri', are kuch'ol chi ri' ri ama' k'isik' rech ri sachb'al kimak ri winaq e kuk'am ub'i ri' ri ukik'el chrij ri payu'. Junam ri' kub'an ruk' jacha xub'an chrech ri ukik'el ri jun ama' wakax, kuchikej ri' chuwach ri sachb'al makaj. ¹⁶Xa je'k'uri' kuch'ajch'ob'ej ri tyoxlaj k'olb'al chrech ri kitz'ilal ri e'ajisra'el, chrech ronojel ri xeq'aj puwi' ri man xkirawasij taj e chrech ri jetaq kimak.

Xoquje' junam wa' kub'ano ruk' ri Tz'um Ja rech ri Riqoj Ib' che jeqel kuk', chuxo'l ri kitz'ilal. ¹⁷Man k'o ta jun winaq kkanaj kan pa ri Tz'um Ja rech ri Riqoj Ib' aretaq chi' kok ub'i ri A'aron che ub'anik ri sachb'al makaj pa ri tyoxlaj k'olb'al, chi k'ate' kel na uloq.

Aretaq chi' xb'antaj ri tojb'al makaj puwi' ri are', pakiwi' ri e'ajuparachoch e pakwi' ri muloj ib' kech ri Isra'el, ¹⁸kel ub'ik e kb'e ri' ruk' ri ab'aj rech tab'al toq'ob' che k'o chuwach ri Yahweh e kub'an cho ri ab'aj ri tab'al toq'ob' rech tojb'al makaj. Kuk'am ukoq ri' ri ukik'el ri ama' wakax e ri ukik'el ri ama' k'isik' e kupil ri' cho taq ri ruk'a' wakax k'o chrij ri tab'al toq'ob'. ¹⁹Ruk' ri uwi'uq'ab', wuqub' mul kuchikej ri kik'el cho ri ab'aj rech tab'al toq'ob'. Xa je' k'uri' kuch'ajch'ob'ej we tyoxlaj k'olb'al ri' chrech ri kitz'ilal ri e'ajisra'el.

²⁰Aretaq chi' xb'antaj ri ch'ajch'ob'enik pa ri tyoxlaj k'olb'al k'o pa ri Tz'um Ja jawi' kb'an wi ri Riqoj Ib' e cho ri ab'aj rech ri tab'al toq'ob', ktaqan ri' kqib'isax uloq ri k'aslik ama' k'isik. ²¹Ri A'aron kuya ri' ri keb' uq'ab' cho ri ujolom e kub'an ri' ri mesoj wi' arech kreqaj ronojel ri ketzalal ri e'ajisra'el, ronojel ri xeqax puwi' e ronojel kimak. Aretaq chi' xkojtaj ri eqa'n cho ri ujolom ri ama' k'isik', ktaqan ri' chrech ri to'l rech arech kuk'am ub'i pa ri tz'inalik ulew, ²²xa jek'uri', ri ama' k'isik' kruk'aj ub'i ri' ronojel ri ketzalal pa jun chaq'ij k'olb'al e ri achi kutzaqopij kan ri' pa ri tz'inalik ulew.

Aretaq chi' xk'amtaj ub'i ri ama' k'isik pa ri tz'inalik ulew ²³ri A'aron kok ub'i ri' pa ri Tz'um Ja rech ri Riqoj Ib', kresaj ri' ri lino ratz'yaq che xukoj ub'ik aretaq chi' xok pa ri tyoxlaj k'olb'al. Kuya kan ri' chila', ²⁴kuratinsaj ri' ronojel ri ub'aqil pa ri ja' pa jun tyoxlaj k'olb'al. Tek'uri', kukoj uloq ri' ri jetaq ratz'yaq e kel uloq ri' arech kuchi'j ri holokosto rech are' e ri holokosto kech ri siwantinimit. Kub'an ri' ri tojb'al makaj puwi' are' e pakiwi' ri siwantinimit; ²⁵kuporoj ri' cho ri ab'aj ri uxepo ri tab'al toq'ob' rech sachb'al makaj.

²⁶Ri jun achi che xtaq ub'i che utzoqopisaxik ri ama' k'isik' rech ri Asasel, rajawaxik che kuch'aj ri jetaq ratz'yaq e kratinsaj ri ub'aqil pa ri ja'; aretaq chi' xb'antaj weri', kuya ri' kok ub'i pa ri tz'um taq ja. ²⁷K'atek'uri', ri ama' wakax e ri ama' k'isik' che xchi'xik tab'al toq'ob' rech ri sachb'al makaj, che xk'am ub'i ri kikik'el pa ri tyoxlaj k'olb'al arech kb'an ri

tojb'al makaj, ke'esax uloq ri' pa ri k'o wi ri tz'um taq ja e kporox ri' ri kitz'umal, ri kiti'ojal e ri kitz'ilal pa q'aq'. ²⁸Ri winaq che kuporoj weri', rajawaxik ri' kuch'aj ri jetaq ratz'yaq, kratinsaj rib' ri' pa ri ja'; aretaq chi' xb'antaj weri' loq' ri' kok ub'i pa ri tz'um taq ja.

²⁹Weri' jun junalikaj pixab' wa' chiwech. Pa ri uwuq ik', pa ri ulajuj q'ij che ri ik', kixmewajik e man k'o ta jun chak ri' kib'ano, chi winaq xa'lax cho we ulew ri', chi winaq che kaxlan winaq k'o chixo'l. ³⁰Rumal rech che pa we jun q'ij ri' kb'an ri' piwi' ri tojb'al makaj arech ch'ajch'oj kixkanaj kanoq. Ix ch'ajch'oj ri' kixkanaj chuwach ri Yahweh chrech ronojel ri jetaq imak. ³¹Kixuxlan wa' pa we jun q'ij ri', pa ri q'ij sab'ado, kixmewajik ri': Weri' jun junalik pixab' chiwech.

³²Ri chuchqajaw che xji'onsaxik ri ujolom ruk' ri ase'ite e xokisaxik arech kpatanajik pa ri uk'olb'al ri utat, are kb'anow ri' ri tojb'al makaj. Are kukoj ri' ri lino taq atz' yaq, ri tyoxlaj taq atz'yaq; ³³kub'an na ri' ri tojb'al makaj puwi' ri tyoxlaj k'olb'al, puwi' ri Tz'um Ja e puwi' ri Riqoj Ib' e puwi' ri ab'aj rech tab'al toq'ob'. Xoquje' kub'an ri tojb'al makaj pakiwi' ri chuchqajawib' e puwi' ronojel ri siwantinimit che umulim rib'. ³⁴Weri' jun junalikaj pixab' chiwech: chjujunal junab' kib'an ri tojb'al kimak ri eralk'uwa'l ri Isra'el.

K'atek'uri', xb'anik jeri' jacha xtaqan ri Yahweh chrech ri Mo'ises.

Ri Tyoxlaj Pixab': Leb'itiko 17-25

Ri kich'olik ri jetaq awaj e ri tab'al toq'ob'

¹⁷Ri Yahweh xuch'ab'ej ri Mo'ises, jewa' xub'ij chrech ri': ²Chach'ab'ej b'a' ri A'aron e ri e'uk'ojol e konojel ri e'ajisra'elita. Jewa' kab'ij chkech ri':

Are wa' ri xtaqan ri Yahweh chrech:

³Xaq apachinchike achi che ajuparachoch ri Isra'el, kuch'ol jun ama' wakax, jun alaj ama' chij, on jun k'isik' pa k'o wi ri tz'um taq ja on chrij we k'olb'al ri' ⁴e man xuk'am ta ub'ik pa ri rokb'al ri Tz'um Ja rech ri Riqoj Ib' arech kuchi'j chrech ri Yahweh chuwach ri tz'um ja, wa' we achi ri' kuya na ub'ixik ri' che xutixej ukik'el ri jun awaj ri', we jun achi ri' kesax ub'i ri' chkixo'l ri e'uwinaq. ⁵Rumal k'uwa' weri', ri e'ajisra'elita kkik'am uloq ri' chuwach ri chuchqajaw rech ri Yahweh, pa ri rokb'al ri Tz'um Ja jawi' kb'an wi ri Riqoj Ib', ri jetaq chikop che ke'kich'ol pa taq ri kulew. Kkichi'j wa' weri' chrech ri Yahweh, tab'al toq'ob' wa' rech riqoj ib'. ⁶Ri chuchqajaw kuq'ej ri' ri kik'el cho ri ab'aj tab'al toq'ob' chuwach ri Yahweh, pa ri rokb'al ri Tz'um Ja rech ri Riqoj Ib' e kuporoj ri' ri xepo arech kroror ri ruxlab' chuwach ri Yahweh. ⁷Xa jek'uri' man kkichi'j ta chi jun tab'al toq'ob' ri' chkiwach ri k'isik' che kuk' xemakunik. Weri' jun junalikaj pixab' kanoq chkech ri e'are' e chkech ri kija'lil.

⁸Xoquje' kab'ij chkech: Konojel ri achijab' che e'ajuparachoch ri Isra'el on konojel ri ekaxlan winaq che ejeqel chkixo'l ri e'are' che kkichi'j jun holokosto on jun tab'al toq'ob' ⁹k'atek'uri' man kuk'am ta uloq pa ri rokb'al ri Tz'um Ja jawi' kb'an wi ri Riqoj Ib', arech kchi'x chrech ri Yahweh, we achi ri' kesax ub'i ri' chkixo'l ri erija'al.

¹⁰Ronojel winaq ajuparachoch ri Isra'el on ronojel kaxlan winaq che jeqel chixo'l ri ix, che kutij xaq apas uwach ukik'el awaj, ri in kintz'i'laj na uwach ri' e kinwesaj ub'i ri' chkixo'l ri e'uwinaq. ¹¹Rumal rech che ri uk'aslemal ri uti'ojal, pa ri kik'el k'o wi. Ri in xinya ri kik'el chiwech arech ruk' ri are' kiloq' ri ik'aslemal. ¹²Rumal k'uwa', ri in nub'im chkech ri eralk'uwa'l ri Isra'el: «Man k'o ta jun chiwech ix kutij ri kik'el, xoquje' ri kaxlan winaq che jeqel awuk' man kutij ta ri' ri kik'el».

¹³Ronojel ralk'uwa'l ri Isra'el on ronojel kaxlan winaq che jeqel iwuk', che kukamisaj uloq pa ri ruew jun chikop on jun chikop ajuwokaj che loq' ktijik, rajawaxik ri' kuturuwisaj kan ri' ri ukik'el pulew e kumuq kan uwi' ri' chrech ulew. ¹⁴Rumal rech che ri uk'aslemal ronojel ti'ojal pa ri ukik'el k'o wi, xa jek'uri' kinb'ij chkech ri e'ajisra'el: «Man kitij ta ri ukik'el ronojel uwach ti'ojal rumal rech che ri uk'aslemal ronojel ti'ojal pa ri kik'el k'o wi, e jachin ktijowik kchup uwach ri'».

¹⁵Ronojel winaq, k'iyinaq chila' on kaxlan winaq ne' che kutij jun kaminaq chikop on che q'ajinaq kanoq, rajawaxik che kuch'aj ri jetaq ratz'yaq e katinik pa ri ja', e tz'ilob'inaq ri' kkanaj kanoq chi k'ate' b'enaq'ij na, aretaq chi' kok'ow weri' ch'ajch'oj ri' kkanaj kanoq. ¹⁶We man kuch'aj ta ri jetaq ratz'yaq e man katin taj, ri are' kreqaj ri' ri umak.

Ri awas chkixo'l ri k'ulb'an

18¹Ri Yahweh xuch'ab'ej ri Mo'ises, jewa' xub'ij chrech ri': ²Che'ach'ab'ej ri e'ajisra'el, jewa kab'ij chkech:

In ri in Yahweh Inidyos. ³Ri ix man kib'an ta jeri' jacha kb'an pa ri tinimit Egipto jawi' xixjeqi' na wi; xoquje' man kib'an ta jeri' jacha kb'an pa ri tinimit Kana'an jawi' kixink'am ub'ik. Ri ix man kiterne'b'ej taj ri jetaq kipixab' e'are', ⁴qas are chib'ana' ri jetaq nupixab' in e ri jetaq kintaqan chrech, chik'olo' pa ri iwanima' e qas are' chiterne'b'ej.

In ri in Yahweh Inidyos. ⁵Chik'olo' pa ri iwanima' ri jetaq nupixab' e ri jetaq nutzij: Jachin ri winaq che kub'an weri', kk'o'ji' uk'aslemal ri'.

In, in Yahweh.

⁶Man k'o ta jun chiwech ix kqeb' ukoq ruk' jun rachalal arech kkotz'i' ruk' e ch'analik ri ub'aqil krilo. In, ri in Yahweh.

⁷Matkotz'i' ruk' ri atat on ruk' ri anan. Ri anan, mawilo ri ch'analik ub'aqil.

⁸Mach'anab'a' ri rixoqil ri atat; weri' xas junam che kach'anab'a' ri atat.

⁹Matkotz'i' ruk' ri awanab', che umi'al ri atat on ral ri anan. Ri are' xa'lax ne' pa ri awachoch on pa ri man awachoch taj, mach'anab'a' ri are'.

¹⁰Matkotz'i' ruk' ri umi'al ri ak'ojol on ruk' ri ral ri ami'al. Rumal rech che xa junam che kach'anab'a' awib' at.

¹¹Matkotz'i' ruk' ri ral ri rixoqil ri atat, che rech ri atat. Ri are' awanab' ri'.

¹²Matkotz'i' ruk' ri ranab' ri atat, ri are' xas ub'aqil ri atat ri'.

¹³Matkotz'i' ruk' ri ixoq rachalal ri anan, ri are' ub'aqil ri anan ri'.

¹⁴Matkotz'i' ruk' ri achi rachalal ri atat; matqeb' ukoq ruk' ri rixoqil, ri are' rixoqil ri awikan.

¹⁵Matkotz'i' ruk' ri awalib'. Ri are' rixoqil ri ak'ojol, mach'anab'a' ri are'.

¹⁶Matkotz'i' ruk' ri rixoqil ri awachalal, are ri awachalal ri' kach'anab'a'.

¹⁷Matkotz'i' ruk' jun ixoq e ri ral ri are'; mak'am ri umi'al ri ral, xoquje' matkotz'i' ruk' ri ral ri ral arech ka'ch'anab'a'. Ri e'are' e'ati'ojal, e xab'an kotz'olem ri' ruk' awachalal.

¹⁸Makak'am ub'i ri rachalal ri awixoqil pa ri jun k'olb'al jawi' e'aya'om wi ri e'awixoqil, mach'anab'a' e matkotz'i' ruk' we ixoq ri' aretaq chi' k'as na ri rachalal.

¹⁹Matkotz'i' ruk' jun ixoq aretaq chi' man ch'ajch'oj taj rumal k'o ri uch'ajo'n e ri at kawaj kach'anab'a'.

²⁰Matkotz'i' ruk' ri rixoqil ri awajil atz'aqat arech kach'anab'a', we jeri' kab'ano xatz'i'laj awib' ri'.

²¹Ma'ya ri e'awalk'uwa'l arech kiporox chuwach ri Molek, xa jek'uri' makawetzelay ta ri ub'i' ri Adyos. In ri in Yahweh.

²²Makatkotz'i' ta ri' ruk' jun achi jeri' jacha kotz'olem ruk' jun ixoq. Itzel wa' weri'.

²³Chi achi, chi ixoq mixkotz'i' cho ri ch'at ruk' jun awaj; itzel wa' weri' e man at ch'ajch'oj ta chik. Muchi'j rib' jun ixoq chuwach jun chikop arech kkiriq kib'. Itzel wa' weri' e man ch'ajch'oj ta chi ri'.

²⁴Mitz'ilob'isaj iwib' ruk' we jastaq ri'; rumal rech che ruk' weri' kitz'ilob'isam kib' ri jetaq amaq' che xas chiwach ix xe'inwesaj ub'i in. ²⁵Ri amaq' xutz'ilob'isaj rib', e ri in xink'ajisaj uwach rumal ri umak, e ri loq'alaj ulew xe'uxab'ej ri siwantinimit.

²⁶Xa jeri' k'ut, ri ix, chik'olo' b'a' pa ri iwanima' ri nupixab' e ri nutzij, mib'an jun chkech we itzel ri', ri ix che xixalax waral e xoquje' ri ekaxlan taq winaq che ejeqel iwuk' ix. ²⁷Rumal rech che ronojel we itzel ri' xkib'an ri winaq che xejeqi' na pa we amaq' ri' aretaq chi' maja' kixjeqi' ix waral, e rumal k'u weri' ri amaq' sib'alaj tz'ilob'inaq kanoq.

²⁸We kib'an ix we tz'il taq jastaq ri', ¿la man kixuxab'ej ta k'u ri' ri loq'alaj ulew jacha xe'uxab'ej ri jetaq amaq' che xejeqi' waral nab'e chiwach ri ix? ²⁹Je' nak'ut, konojel ri winaq che kemakunik ruk' jun chkech we itzel ri', konojel ri' ke'esax ub'i ri' chkixo'l ri siwantinimit.

³⁰Chik'olo' b'a' ri nutzij e mib'an b'a' ri itzel che sas kb'an chik nab'e chiwach ix; mitz'ilob'isaj iwib' ruk' weri'. In ri in Yahweh Inidyos.

Nik'aj taq tzij puwi'

ri utz b'e e puwi' ri q'ijlanik

19¹Ri Yahweh xuch'ab'ej ri Mo'ises, jewa' xub'ij chrech: ²Cha'ch'ab'ej konojel ri moloj ib' kech ri e'ajisra'elita, jewa' kab'ij chkech:

Ix tyox taq winaq kib'ano, rumal rech che in, in Yahweh ri Inidyos, tyox ri nub'antajik.

³Iwonojel chinimaj utzij ri inan e ri itat. Chichajij b'a' ri taq sab'ado che wech ri in. In ri in Yahweh Inidyos.

⁴Mixka'y apan chkech ri man tzij taj edyos, ruk' ri ja'risam taq ch'ich' mi'tz'aqo jetaq dyos che man tzij taq edyos. In ri in Yahweh Inidyos.

⁵Aretaq chi' kichi'j chrech ri Yahweh jun tab'al toq'ob' rech riqoj ib', chib'ana b'a' jacha ri rajawaxik arech qas kqaj chuwach ri are'. ⁶Xas ktijow ri' ri awaj xkamisaxik pa ri jun q'ij che xb'an ri tab'al toq'ob' on chwe'q chi aq'anoq; e ri kto'taj kanoq, kporox ri' kab'ij chi aq'anoq. ⁷We k'o ktijow chrech kab'ij chi aq'anoq, man utz ta chi ri', ri tab'al toq'ob' xb'anik ma utz ta ri'. ⁸Jachin ri ktijow weri' kreqaj ri umak, rumal rech che xretzelaj ri tyoxlaj ub'antajik ri Yahweh. We jun winaq ri' kesax b'i ri' chkixo'l ri e'uwinaq.

⁹Aretaq chi' kiyak uwach ri itiko'n cho ri uwachulew, mimol ub'i chi chuchi' taq ri retal ulew. Xoquje' masik' b'i ri uwach triko che tzaqinaq kanoq, ¹⁰matzukuj ri poch'ol pa ri tikb'al uva e masik' ri uwach atiko'n che tzaqinaq uloq. Wa' weri' kaya' kan chrech ri meb'a' e chrech ri kaxlan winaq. In ri in Yahweh Inidyos.

¹¹Chixo'l ix, man k'o ta jun ri' kub'an weri' chkech ri e'uwinaq: jun elaq', uwaxik jun jas uwach, ujik'ik' ukoq pwaq che man rech taj, e tzihtal chb'il taq iwib'. ¹²Mijikib'a' ub'ixik pa ri nub'i' in jun tzij che man tzij taj; weri' kretzelaj ri' ri ub'i' ri Adyos. In ri in Yahweh. ¹³Man kab'an ta k'ax ri' chrech ri awajil atz'aqat, man katoqij ta ri' ri tojb'al uchak. Man katb'iytaj ta che utojik ri uq'ij ri apataninel, man k'ate' ta chwe'q katojo. ¹⁴Man k'o ta kayoq' jun winaq che mem e man k'o ta kaq'at ub'e ri moy winaq, xane chaxib'ij b'a' awib' chuwach ri Dyos. In ri in Yahweh.

¹⁵We at q'ataltzij, mab'an b'a' ri man suk'il taj, man xa ta rumal katoq'ob'isaj uwach ri meb'a on rumal kawil ri uje'lal ri b'yom winaq: Ruk' suk'il kab'an q'atojtzij puwi' ri awajil atz'aqat. ¹⁶Majaluj tzij pakiwi' ri awajil atz'aqat e matzukuj pa ri q'atb'altzij usachik ub'i uwach ri ak'ulja. In ri in Yahweh. ¹⁷Mana' ti'tik pa ri awanima' chrech ri awachalal. Xane

are chpib'aj ri awajil atz'aqat, e xa jeri' k'uri' man kaweqaj ta ri umak are'. ¹⁸Man katzalej ta uk'axel ri k'ax xb'an chawech e man k'o ta k'ax ri' kak'ol pa ri awanima' rumal kech ri ekalk'uwa'l ri atinimit. Kaloq'oq'ej ri' ri awajil atz'aqat jeri' jacha uloq'exik awib' at kab'ano.

¹⁹Chik'olo' b'a' pa ri iwanima' ri nupixab'. Chkixo'l ri jupuq awaj che awech at, maya' alaj che kkiriq kib' keb' awaj che ma junam ta uwach ri kija'l. Matik pa ri awulew keb' wach ija'. Makoq awatz'yaq che keb' ub'anik ri ukemik.

²⁰We k'o jun achi kkoz't'i' ruk' jun ixoq e jacha rixoqil kub'an chrech e ri ixoq umokom jun chik winaq, k'atek'uri' man uloq'om taj, xoquje' matzoqopitalik taj, ri jun achi che xkoz't'i' ruk', kutoj ri' ri xub'an chrech ri ixoq, man ruk' ta kamikal kutojo, rumal rech che ri ixoq xaq mokom, matzoqopitalik taj. ²¹Ri achi kuk'am ub'i ri' chrech ri Yahweh jun tab'al toq'ob' tojb'al makaj pa ri rokb'al ri Tz'um Ja rech ri Riqoj Ib'. Kuk'am ub'i jun ama' chij tojb'al makaj. ²²Ruk' we ama' chij ri', ri chuchqajaw kub'an puwi' ri achi ri tojb'al makaj chuwach ri Yahweh rumal ri umak xub'ano; e kkuytaj ri' ri mak xub'ano.

²³Aretaq chi' kixok pa ri amaq' e kitik jujun taq uche'al tiko'n che kuya uwach, ri uwach kuya'o man ch'ajch'oj ta ri' chiwach ix, kjunamataj ri' ruk' jun achi che man q'atom ta uwi' ri ukowil. Oxib' junab' ri' jeri' chiwach, man kuya ta ri' kktijow ri uwach. ²⁴Pa ri ukaj junab' kityoxrisaj ri' ronojel ri jetaq uwach pa jun nimaq'ij arech nim kiwil wi ri Yahweh. ²⁵Pa ri uro' junab', kuya ri' kitij ri jetaq uwach, e kuya ri' kik'ol nik'aj che taq ri uwach arech kitijo. In ri in Yahweh Inidyos.

²⁶Man k'o ta jun jas uwach kitijo che k'o kik'el chrech. Mib'an ch'ob'nik e mib'an ri itzb'al. ²⁷Miketej kanoq usokaxik ri utzam iwi' e misokaj uwi' ri iwismachi'. ²⁸Miq'atej ri ib'aqil kumal taq ri kaminaqib' e mit'iqej uwach ri itz'umal. In ri in Yahweh. ²⁹Mab'an k'ax chrech ri ami'al, ekech nim ch'uti'n kataqchi'j na k'uri' chrech; wene' ri uwachulew kenoj chrech winaq ekech nim ch'uti'n e ronojel knim kib' ruk' ri kachalal.

³⁰Kichajij ri jetaq sab'ado che wech in e nim kiwil wi ri tyoxalaj nuk'olb'al. In ri in Yahweh.

³¹Mixka'y apan chkech ri ekaminaqib' che ketzalej uloq, mixb'e che uch'ob'ik rij jun jas uwach, ruk' weri' kitz'ilob'isaj iwib'. In ri in Yahweh Inidyos.

³²Chattak'aloq chuwach jun winaq che saq chi ujolom, nim kawil wi ri nim winaq chik; chaxib'ij b'a' awib' chuwach ri Adyos. In ri in Yahweh.

³³Aretaq chi' jun kaxlan winaq jeqel iwuk' pa ri uwulew, mich'ujarisaj ri are', mib'an k'ax chrech. ³⁴Ri kaxlan winaq che jeqel iwuk', jacha jun ri' chkixo'l ri iwinaq kib'an chech e kiloq'oq'ej na ri' jacha uloq'exik iwib' ix kib'ano, xane rumal che xoquje' ri ix, ix kaxlan winaq xixk'oji' pa ri Egipto. In ri in Yahweh Inidyos.

³⁵Mib'an ri man suk' taj aretaq chi' kib'an ri q'atojtzij puwi' jun winaq, xoquje' pa ri retaxik uwach jun jas uwach, pa ri pajinik on pa ri upajik ri joron.

³⁶Tz'aqat taq ipajb'al kib'ano, tz'aqat taq iwetb'al k'olik, suk' taq ipajb'al kib'ano. In ri in Yahweh ri Inidyos che xixinwesaj uloq pa ri amaq Egipto.

³⁷Chik'olo' pa ri iwanima' ronojel ri jetaq nupixab' e ronojel ri nutzij, qas chik'aslemaj b'a' weri'. In ri in Yahweh.

Ri makaj puwi' ri q'ijlanik e ri q'atojtzij

20¹Ri Yahweh xuch'ab'ej ri Mo'ises, jewa' xub'ij chrech ri':

²Kab'ij jewa' chkech ri e'ajisra'el: Xaq apachinchike ri e'ajisra'elita on jun chkixo'l ri ekaxlan winaq che ejeqel chkixo'l ri Isra'el, kujach jun chkech ri e'uk'ojol chrech ri Molek, xas kkam ri'. Ri siwantinimit kkik'yaq na ri' cha'b'aj. ³Xas in wi kink'ule'laj ri' we achi ri' e

kinpuch' ub'i ri' chkixo'l ri e'uwinaq, rumal ri umak che xujach jun chkech ri e'uk'ojol chuwach ri Molek, xa jeri' xutz'ilob'isaj ri tyoxlaj nuk'olb'al e xretzelaj uwach ri tyoxlaj nub'i'. ⁴We ri siwantinimit kkitz'apij ri kiwoq'och arech man keka'y ta apan chrech ri achi che xujach jun chkech ri e'uk'ojol chuwach ri Molek e man kkikamisaj ta ri are', ⁵xas in wi' kink'ule'laj ri' we achi ri', xoquje' ri e'ajuparachoch. Kinpuch' ub'i ri' chkixo'l ri e'uwinaq, ri are' e konojel ri winaq che keb'e chi na aq'anoq che ri makunik chuwach ri Molek.

⁶We k'o jun kb'e che uch'ob'nik kuk' ri ekaminaqib' e kuk' ri e'ajsaqwachom arech kemakun kuk' e'are', kink'ule'laj ri' ri achi ri' e kinpuch' ub'i ri' chkixo'l ri e'uwinaq.

⁷Chityoxrisaj b'a' iwib', tyox b'a' ri ib'antajik kib'ano, rumal rech che in ri in Yahweh ri Inidyos.

Ri itzel puwi' ri e'ajupaja achalaxik

⁸Chik'olo' b'a' ri nupixab' e chik'aslemaj b'a', rumal rech che in ri in Yahweh ri xixintyoxrisaj.

⁹Rumal k'uwa' weri':

Jachin kyoq'on chrech ri utat on chech ri unan xas kkam wi, rumal rech ri yoq'oj xub'an chrech ri utat on chrech ri unan; ri ukik'el ktzaq ri' xas chrij ri are'.

¹⁰Ri jun achi che kmakun ruk' ri rixoqil ri uk'ulja xas kkamisaxik ri are' e ri ixoq.

¹¹Ri jun achi che kkotz'i' ruk' ri rixoqil ri utat, xuch'anab'a' ri' ri utat. Xas chi ekeb' ri kekamisaxik, ktzaq ri' ri kikik'el pakiwi'.

¹²Ri jun achi che kkotz'i' ruk' ri ralib': xas ekeb' ri' kekamisaxik. Ri e'are' nimalaj il xkib'ano e xkitz'ilob'isaj kib', ktzaq ri kikik'el pakiwi'.

¹³We k'o jun achi kkotz'i' ruk' jun achi e jeri' kub'an ruk' jacha ri kab'an ruk' ixoq: ekeb' ri' nimalaj il xkib'ano, xas kekamisaxik ri', ktzaq ri' ri kikik'el pakiwi'.

¹⁴We k'o jun achi kub'an rixoqil chrech jun ixoq e kub'an rixoqil chrech ri unan: weri' jun kotz'olem kuk' achalaxik. Keporox ri' ri ixoqib' e ri jun achi, arech man kb'an ta chik weri' chixo'l.

¹⁵Ri jun achi che kkotz'i' cho ch'at ruk' jun chikop: xas kkamisaxik ri' ri achi, xoquje' kkamisaxik ri' ri chikop.

¹⁶We k'o jun ixoq qqeb' ukoq ruk' jun chikop arech kmakun ruk', kkamisaxik ri' ri ixoq e xoquje' kkamisaxik ri' ri chikop. Rajawaxik kekamisaxik, ktzaq ri kikik'el pakiwi'.

¹⁷Ri jun achi che rixoqil kub'an chrech ri ranab', umi'al ri utat on ral ri unan: ri achi kuch'anab'a' ri ranab' e ri ixoq kuch'anab'a' ri uxib'al, w'a weri' jun nimalaj il kkib'ano. Kchup kiwach ri' chkiwach ri siwantinimit. Xuch'anab'a' ri ranab', rumal wa' weri' kreqaj ri umak xub'ano.

¹⁸Ri jun achi che kkotz'i' ruk' jun ixoq e kuch'anab'a' aretaq chi' k'o ri uch'ajo'n, xq'alajin chuwach jawi' kel uloq ri ukik'el ri ixoq, xoquje' ri ixoq xuk'utu jawi' kel uloq ri kik'el chrech; rumal ri xkib'ano kepuch' ub'i ri' chkixo'l ri siwantinimit.

¹⁹Mach'anab'a' ri uchaq' on ri ratz' ri anan, on ri ranab' ri atat. We jeri' xab'ano, are xe'ach'anab'a' ri' ri anan e ri atat, e kaweqaj ri' ri amak.

²⁰We jun achi kkotz'i' ruk' ri uch'utnan, rixoqil rikan che rachalal utat: are ri rikan ri' xuch'anab'a', keqaj ri' ri kimak e man k'o ta kalk'uwa'l ri' kekam ub'ik.

²¹Ri jun achi che kub'an rixoqil chrech ri rixoqil ri rachalal: Weru' xutz'ilob'isaj ri are', rumal rech che are ri rachalal ri' xuch'anab'a', man k'o kalk'uwa'l ri', kekam ub'ik ri'.

K'isb'al taq tzij

²²Chik'olo' b'a' pa ri iwanima' ronojel ri jetaq nupixab', ronojel ri nutzij, e qas chib'ana' b'a'; arech man kixuxab'ej ta ri uwachulew jawi' tajin kixik'am ub'ik e arech kixjaqi' chila'. ²³Mixb'in pa ri kib'antajik e pa ri kipixab' ri jetaq tinimit che xas chiwach ke'ink'yaq na ub'ik ri e'are', rumal rech che jewa' xkib'an ri e'are', ri in sib'al xinq'i'taj chkech. ²⁴K'atek'uri', ri in nub'im chiwech: «Ri ix kiwech'ej na ri kulew e'are', che in kinya'ow wa' chiwech, jun ulew jawi' kb'ulb'utik uloq ri leche e ri uwa'lche'».

In ri Inyahweh Inadyos che xixintas chkixo'l ri jetaq tinimit ri'. ²⁵Qas saq b'a' chiwach jachinchike ri awaj che ch'ajch'oj e jachinchike ri man ch'ajch'oj taj, jachinchike ri chikop ajuwokaj che ch'ajch'oj e ri man ch'ajch'oj taj. Mitz'ilob'isaj iwib' kumal we chikop ri', kne'b'a' chikop ajuwokaj, chikop che kujurej rib' pulew; xane xintas kiwach weri' chiwach rumal rech che man ech'ajch'oj taj.

²⁶Chib'ana' b'a' tyoxlaj ri ib'antajik chnuwach in, rumal rech che ri in in Yahweh tyox ri nub'antajik e xixintas chkixo'l konojel ri jetaq siwantinimit arech kixuxik ix wech.

²⁷Jun achi on jun ixoq che k'o chixo'l ix e kch'aw kuk' ri kaminaqib' on kuk' ri e'ajsaqwachoch: sas kek'amisax ri', kek'yaq ri' ch'ab'aj, ktzaq ri' ri kikik'el pakiwi'.

Ri tyoxlaj ub'antajik ri chuchqajaw

21¹Ri Yahweh xub'ij chrech ri Mo'ises: Che'ach'ab'ej ri echuchqajawib' ri e'uk'ojol ri A'aron, jewa' kab'ij chkech ri':

Ronojel winaq mutz'ilob'isaj rib' ruk' jun ukaminaq, ²xuwi' ya'talik ri' we ri kaminaq are ri unan, ri utat, ri uk'ojol, ri umi'al, ri ratz. ³Jun ranab' q'apoj ali che jeqel ruk' rumal rech che man xk'uli' taj, kutz'ilob'isaj rib' ri' rumal are'; ⁴jun ixoq che k'ulan chkixo'l ri erachalaxik, man kuya' ta ri' kutz'ilob'isaj rib' ri chuchqajaw rumal are'.

⁵Ri echuchqajawib' man kkisokaj ta ri kijolom, man kkisokaj ta ri uwi' kisamachi' e man kkikoj ta ketal cho ri kib'aqil. ⁶Ri e'are' tyox ri' ri kib'antajik chuwach ri Dyos e man ketzelaj ta ri' uwach ri ub'i' ri Kidyos, rumal rech che e'are' ri kkiporoj ri wa kya chrech ri Yahweh, ri tzuqb'al rech ri Kidyos; rajawaxik che ri e'are' tyoxlaj ri kib'antajik.

⁷Man kek'uli' ta ri' ruk' jun ixoq che ekech nim ch'uti'n on xb'an k'ax chrech, on jun ixoq che ya'om kan rumal ri rachajil, rumal rech che ri chuchqajaw xutyoxrisaj rib' chrech ri Udyos.

⁸Tyoxlaj winaq ri' ri are' chawach rumal rech che are are' kutzuq ri Adyos. Tyoxlaj winaq ri' chawach, rumal rech che in, tyox ri nub'antajik, in che Inyahweh ri xixutyoxrisaj.

⁹We ri umi'al jun chuchqajaw kmakunik ruk' achi, kretzelaj rib' ri' ri are', xoquje' kretzelaj uwach ri' ri utat; xas kporox wi ri are'.

Ri Nimalaj Chuchqajaw

¹⁰Ri chuchqajaw ri k'amal b'e chkiwach ri erachalal, ri are' che xokisax ri ase'ite cho ri ujolom e xuk'am ri upatan aretaq chi' xokisax ri tyoxlaj taq atz'yaq chrech, man kukiyej ta ri' ri uwi', xoquje' man kurach'aqij ta ri ratz'yaq, ¹¹man kqeb' ta ukoq ri' ruk' jun kaminaq, kneb'a' are ri unan on are ri utat, man loq' taj kutz'ilob'isaj rib' kuk' e'are'.

¹²Man kel ta uloq ri' pa ri tyoxlaj k'olb'al arech man kretzelaj ta ri uk'olb'al ri Udyos, rumal rech che ruk'am ri tyoxlaj ase'ite rech ri Dyos. In ri in Yahweh.

¹³Jun q'apoj ali ri' ri rixoqil kuk'amo. ¹⁴Man kk'uli' ta ruk' jun malka'n ixoq, ruk' jun ixoq che ya'om kan rumal ri rachajil, on jun ixoq che xb'an k'ax chrech on jun ixoq che ekech nim ch'uti'n, xane are kuk'am jun q'apoj ali chkixo'l ri erachalal.

¹⁵Man kretzelaj ta kiwach ri' ri rija'l chkixo'l ri siwan utinimit, rumal rech che in ri in Yahweh che xintyoxrisaj ri are'.

**Ri kq'ilowik, che jun,
man loq' taj kokik chuchqajaw**

¹⁶Ri Yahweh xuch'ab'ej ri Mo'ises, jewa' xub'ij chrech: ¹⁷Chach'ab'ej b'a' ri A'aron, jewa' kab'ij chrech ri':

Ri e'awija'l pa ronojel mayilq'ijsaq, man k'o ta jun kqeb' ukoq che utzuqik ri Udyos we ri are' man tz'aqat ta ri ub'aqil on k'o uyab'. ¹⁸Rumal rech che ronojel achi we k'o uyab' ri ub'aqil man loq' taj kqeb' ukoq che utzuqik ri Dyos: we moy, we ch'oko', we man ki' ta kka'yik ri upalaj on we man q'alaj taj ri uka'yab'al, ¹⁹on jun achi che q'ajinaq ri raqan on ri uq'ab', ²⁰we b'uk'ub'ik rij on tuqa'r, we tzoq', we k'o salpi'ch chrij utz'umal on we tajin kq'iy ub'aqil on we mencho'r achi. ²¹Man k'o ta jun chkech ri rija'l ri A'aron che k'o uyab' ri ub'aqil kqeb' che utzuqik ri Yahweh; we k'o uyab' man kqeb' ta che uchi'xik ri uwa ri Udyos.

²²Kuya'o kutzuq rib' chrech ri uwa ri Udyos, ri tyoxlaj taq jastaq, ²³k'atek'ut, man loq' taj kok b'ik jawi' k'o wi ri payu' e man kqeb' ta ukoq jawi' k'o wi ri tab'al toq'ob', rumal rech che okinaq uyab' ri ub'aqil e arech man kretzelaj ta uwach ri tyoxlaj taq nujastaq, rumal rech che in ri in Yahweh xintyoxrisanik weri'. ²⁴K'atek'uri', ri Mo'ises xuya ub'ixik weri' chrech ri A'aron, chkech ri e'uk'ojol e chkech konojel ri e'ajisra'el.

**Ri tyoxil pa ri utijik ri wa
Ri echuchqajawib'**

22¹Ri Yahweh xuch'ab'ej ri Mo'ises, jewa' xub'ij chrech ri': ²Che'ach'ab'ej ri A'aron e ri e'uk'ojol arech kkiq'il kib' chrech nik'aj taq sipanik che kkichi'j ri e'ajisra'el chwech, arech man ketzelaj ta ri tyoxlaj nub'i'; in ri in Yahweh.

³Chab'ij b'a' chkech: Xaq apachinchike ri iwija'al pa ronojel mayilq'ijsaq, we man ch'ajch'oj taj, k'atek'uri' kqeb' ukoq ruk' ri tyoxlaj taq sipanik che kya' ri e'ajisra'el chrech ri Yahweh, kchup ub'i uwach ri' chnuwach in. In ri in Yahweh.

⁴Ronojel achi rija'l ri A'aron che tajin kq'iy ub'aqil on che tajin saq kuchulaj, man kuya ta ri' kutij ri tyoxlaj taq jastaq we maja' kuch'ajch'ob'ej rib'. Jachin kuchap ukoq ri jastaq che kutz'ilob'isaj rib' rumal jun kaminaq, on jachin xuchulaj saq uchul, ⁵on jachin xuchap jun alaj chikop che ruk' xutz'ilob'isaj rib', on jun achi xoqanisax ri tz'il chrij rumal jun achi chik, ⁶jachin kuchap ukoq ronojel weri', man ch'ajch'oj ta chi ri' kkanaj kanoq chi k'ate' b'enaq'ij na, man ya'tal ta chrech kutij ri tyoxlaj taq jastaq chi k'ate' na kucha'jch'ob'ej ri ub'aqil ruk' ri ja'. ⁷Aretaq chi' kqaj ri q'ij, ri are' ch'ajch'oj ri' kkanajik e loq' ri' kutij ri tyoxlaj taq jastaq, rumal rech che are wa' ri tzuqb'al rech are'.

⁸Man k'o ta kaminaq chikop ri' kutijo on jun chikop che q'ajinaq kanoq, kutz'ilob'isaj rib' ri' ruk' weri'. In, ri in Yahweh.

⁹Chkik'olo' b'a' pa ri kanima' ri jetaq nupixab', wene' kiweqaj jun mak e rumal weri' kixkamik aretaq chi' kiwetzelay uwach weri', in ri in Yahweh che xintyoxrisaj weri'.

Ri winaq che man echuchqajaw taj

¹⁰Man k'o ta jun winaq, che man chuchqajaw taj, kutij na ri' ri tyoxlaj taq jastaq; man k'o ta jun rula' ri chuchqajaw on jun rajchak che kutij ri tyoxlaj taq jastaq. ¹¹K'atek'ut, we jun chuchqajaw kuloq' jun winaq ruk' ri urajil, we jun winaq ri' ya'tal chrech kutij ri tyoxlaj taq jastaq, xoquje' ri rajpatanijel che xa'lax ruk' pa ja, kuya'o kkitijo ri jetaq wa ri'. ¹²Jun umi'al jun chuchqajaw we k'ulan ruk' jun jun che winaq, man chuchqajaw taj, man loq' ta ri' kutij ri tyoxlaj taq wa; ¹³k'atek'ut, we ri umi'al malka'n chichu' kkanaj kanoq on we ri rachajil xuya kanoq ri are' e man ek'o ta ral, ktzalej ri' pa ri rachoch ri utat e loq' ri' kutij rech chrech ri uwa ri utat jacha xub'ano aretaq chi' q'apoj ali kanoq. ¹⁴Jun winaq che man chuchqajaw taj e rumal che man kuch'ob' taj xutij rech we tyoxlaj taq wa ri', kutzalej uk'axel ri' chrech ri chuchqajaw, jun uro' uchaqapil uwi' kuya b'ik.

¹⁵Miwetzelay b'a' uwach ri tyox taq sipanik ri kkiya' ri e'ajisra'el chrech ri Yahweh. ¹⁶Rumal rech we kitijo keweqaj jun makaj ri' e rajawaxik ri' ktojik. In ri in Yahweh ri xintyoxrisaj we jetaq sipanik ri'.

Ri jetaq chikop che kech'olik

¹⁷Ri Yahweh xuch'ab'ej ri Mo'ises, jewa' xub'ij chrech ri':

¹⁸Chach'ab'ej ri A'aron e che'ach'ab'ej ri e'uk'ojol e konojel ri siwantinimit Isra'el, jewa' kab'ij chkech ri':

We jun achi pa ri rachoch ri Isra'el, on jun kaxlan winaq che jeqel pa ri Isra'el, kuk'am ub'i jun sipanik rumal rech che kraj jeri' kub'ano, e kub'an jun holokosto chuwach ri Yahweh, ¹⁹arech che utz ri sipanik, rajawaxik kuk'am ub'i jun ama' chikop man k'o ta uyab', kuya ri' jun ama' wakax, jun ama' chij on jun alaj ama' k'isik'. ²⁰Michi'j b'a' jun che k'o uyab', rumal rech che man kk'am awax ta ri' weri' chiwach.

²¹We k'o jun kuchi'j jun tab'al toq'ob' rech riqoj ib' chuwach ri Yahweh rumal rech che xujikib'a' ub'ixik jun utzij on rumal rech che xk'iy uloq pa ri ranima'; kne'b'a' kuchi'j jun chom on jun alaj chikop, arech utz ri tab'al utoq'ob', rajawaxik che ri chikop man k'o ta uyab', xa jek'uri' kya'taj ri' ri toq'ob' chrech. ²²Man k'o jun chikop kichi'j chuwach Yahweh che moy, on ch'oko', on man tz'aqat ta ri ub'aqil, on nojinaq chrech ch'a'k, on k'o salpi'ch chrij, on we tajin kq'iy ri ub'aqil. Man k'o ta kich'aqapil we chikop ri' kikojo cho ri ab'aj rech tab'al toq'ob' tzuqb'al rech ri Yahweh. ²³We jun sanasik ama' wakax on jun punupik chij che man q'alaj ta ub'e'al, kuya' ri' kachi'j pa ri tab'al toq'ob' we xk'iy uloq pa ri awanima', k'atek'ut, we are kawaj kab'an jun tab'al toq'ob' rumal rech che xajikib'a' ri atzij, man loq' ta ri' kachi'j we jun chikop ri'. ²⁴Man kichi'j ta ri' chrech ri Yahweh jun chikop che pitz'tajinaq ri jetaq usaqmo'l xe'upam, che xaq'alik, on k'itim ub'ik. Mib'an weri' pa ri iwulew; ²⁵we jun kaxlan winaq kuya jun chikop jeri' chiwech arech kichi'j tzuqb'al rech ri Idyos, mik'am chrech. Man utz ta ri' ri uyab' k'olik e ri kaminaq chikop man kk'amawax ta ri' chiwech pa ri tab'al toq'ob'.

²⁶Ri Yahweh xuch'ab'ej ri Mo'ises, jewa' xub'ij chrech:

²⁷Aretaq chi' ka'lax jun alaj wakax, jun alaj chij on jun alaj k'isik' kkanaj ri' wuqub' q'ij ruk' ri unan ati't chij. Pa ri uwajxaq q'ij chi aq'anoq, we alaj chikop ri' jun k'ok'alaj wa ri' che kuya'o kchi'x chrech ri Yahweh. ²⁸Mi'ch'ol b'a' junam pa ri jun q'ij ri' ri wakax e ri alaj ral.

²⁹We ri ix kiya jun ta'b'al toq'ob' chrech ri Yahweh rumal rech che nim kil wi ri are', qas utz ub'anik b'a' chib'ana' arech kk'amawax chiwach; ³⁰ktijow ri' xas pa ri jun q'ij ri' e man k'o ta kito' kan ri' rech ri jun q'ij chik. In ri in Yahweh.

K'isb'al tzij

³¹Chik'olo' b'a' ri nupixab' pa ri iwanima' e chik'aslemaj b'a'. In ri in Yahweh. ³²Miwetzelaj uwach ri tyoxlaj nub'i', arech kch'ob'tajik chkixo'l ri e'ajisra'el che tyox ri nub'antajik in; in ri in Yahweh ri xixintyoxrisaj. ³³In ri xixinwesaj uloq pa ri rulew ri Egipto arech kinnuxik Inidyos. In ri in Yahweh.

Ri ub'anik ri q'ijlanik

pa taq ri nimaq'ij pa jun junab'

23¹Ri Yahweh xuch'ab'ej ri Mo'ises, jewa' xub'ij chrech: ²Che'ach'ab'ej ri e'ajisra'el e jewa' kab'ij chkech:

Ri jetaq nimaq'ij rech ri Yahweh jawi' ke'imulij wi ri winaq, weri' jun tyoxlaj moloj ib' ri'.

Are w'a ri jetaq nimaq'ij che wech in.

Ri q'ij Sab'ado

³Waqib' q'ij ri' rech chak, k'atek'ut pa ri uwuq q'ij nimalaj uxlanem, jun q'ij rech tyoxlaj moloj ib', man k'o ta jun chak ri' kib'ano, xaq jawije' k'olb'al ne' ixjeqel wi, ri Sab'ado uxlanem chech ri Yahweh.

⁴Are wa' ri jetaq nimaq'ij rech ri Yahweh, ri tyoxlaj taq moloj ib' aretaq chi' ke'imulij konojel ri e'ajisra'el, pa ri jetaq q'ij che ch'ikatalik.

Ri Q'axeb'al (Pasku'a)

e ri Kaxlanwa che man k'o ta uch'amilal

⁵Pa ri nab'e ik', pa ri kajlajuj q'ij chrech ri ik', chaq'ab', kb'an ri Uq'axeb'al ri Yahweh, ⁶e pa ri jo'lajuj q'ij chrech we ik' ri', kb'an ri nimaq'ij rech ri Asimos che rech ri Yahweh. Wuqub' q'ij kitij ri' ri jetaq kaxlanwa che man k'o ta uch'amilal. ⁷Pa ri nab'e q'ij jun tyoxlaj moloj ib' ri' kib'ano; man k'o ta jun chak ri' kib'ano. ⁸Wuqub' q'ij ri' kichi'j sa'om k'ok'alaj taq wa chrech ri Yahweh. Pa ri uwuq q'ij, kib'an jun tyoxlaj moloj ib' ri'; man k'o ta jun chak ri' kib'ano.

Ri nab'e taq uwach salwa't

⁹Ri Yahweh xuch'ab'ej ri Mo'ises e xub'ij chrech: ¹⁰Che'acha'b'ej ri e'ajisra'el, jewa' kab'ij chkech:

Aretaq chi' ri ix, ix okinaq chi pa ri ulew che kinya' in chiwech, aretaq chi' kib'an ri q'atoj triko, ri ix kik'am ub'i joytaj ri' chrech ri chuchqajaw k'utb'al rech ri nab'e uyakik uwach itiko'n. ¹¹Ri are' kusilob'isaj ri' ri uq'ab' che uchi'xik chrech ri Yahweh e jeri' utayik ri' ri toq'ob' kub'an piwi' ix. Ri usilob'isaxik arech kchi'xik chrech ri Yahweh, kab'an ri' chwe'q chi aq'anoq chech ri Sab'ado, ¹²e pa ri jun q'ij ri' che ksilob'isaxik ri joytaj sipanik chuwach ri Yahweh, kichi'j ri' pa jun holokosto jun chij che jun ujunab' e man k'o ta uyab'. ¹³Ruk' we sipanik ri', kichi'j ri' keb' chrech ri lajuj uch'aqapil utzalaj k'aj che yob'om ruk' ase'ite, kporox wa' weri' chech ri Yahweh jacha jun sa'om wa che kyoror ri ruxlab'. Ri amaja' ksipaxik, jun ukaj seti'er (jun ukaj pajb'al joron) ri'. ¹⁴Ri ix man kitij ta kaxlanwa, man kitij ta k'ilim triko on rax triko pa taq ri q'ij aretaq chi' maja' kik'am uloq ri sipanik

chrech ri Idyos. Jun junalikalaj pixab' wa' weri' chkech ri iwija'l pa ronojel mayilq'ijseq e pa ronojel k'olb'al jawije' kixjeqi' na wi.

Ri nimaq'ij rech ri Xmano

¹⁵Pa ri jun q'ij che k'o chi aq'anoq chuwach ri Sab'ado, aretaq chi' xik'am uloq ri joytaj triko che ksilob'isax chuwach ri Yahweh, ri ix kewejalaj ri' wuqub' xmano. ¹⁶Pa ri jun q'ij chi aq'anoq chuwach ri sabado, aretaq chi xejalatajik iwumal wuqub' sab'ados, kiwejala ri' kawinaq lajuj q'ij, k'atek'uri' kichi'j chi k'uri' chrech ri Yahweh jun k'ak' sipanik. ¹⁷Arech ksilob'isaxik ri uchi'xik chuwach ri Yahweh, kik'am ub'i ri' pa ri iwachoch keb' kaxlanwa, che b'anom ruk' keb' upajb'al utzalaj k'aj e che yob'om ruk' ucha'milal, kya chrech ri Yahweh jacha nab'e uwach tiko'n. ¹⁸Ruk' ri kaxlanwa ri' kichi'j na ri' wuqub' ama' alaj taq chij che jun kijunab' e man k'o ta kiyab', jun ama' wakax e keb' ama' chij, weri' rech ri holokosto kya chrech ri Yahweh, weri' e ri jun sipanik chik e ri sipanik ruk' ja', are wa' ri sa'om wa che kyoror ruxlab' chuwach ri Yahweh.

¹⁹Xoquje' kich'ij ruk' weri' jun ama' k'isik' rech tab'al toq'ob' rech sachb'al mak e xoquje' keb' ama' alaj taq chij che jun kijunab', tab'al toq'ob' rech moloj ib'. ²⁰Ri chuchqajaw ke'uchi'j ri' ruk' ri usilob'isaxik, kuchi'j ri' ruk' ri kaxlanwa rech nab'e taq tiko'n e ruk' ri keb' ama' alaj taq chij; ktyoxrisaxik wa' weri' chech ri Yahweh e weri' rech ri chuchqajaw.

²¹Pa we jun q'ij ri', ri ix ke'imuluj ri' ri winaq pa jun tyoxlaj moloj ib', jun nimaq'ij nak'uri' e man k'o ta jun chak ri' kib'ano. Weri' jun junalikalaj pixab' wa' chkech ri e'iwija'al pa ronojel mayilq'ijseq e pa ronojel k'olb'al jawi' kixjeqi' wi.

²²Aretaq chi' kiyak ri uwach ri triko, miyak ub'ik chi k'ate' pa ri uk'isb'al ri retal awulew, xoquje' man katzukuj ta ri poch'ol. Weri' kaya' kanoq chrech ri meb'a' e chrech ri kaxlan winaq. In ri in Yahweh Inadyos.

Ri nab'e q'ij pa ri uwuq ik'

²³Ri Yahweh xuch'ab'ej ri Mo'ises, jewa' xub'ij chrech: ²⁴Che'ach'ab'ej ri e'ajisra'el e jewa' kab'ij chkech:

Pa ri uwuq ik', pa ri nab'e q'ij chrech we ik' ri' jun nimalaj uxlanem ri' chiwech; ke'imulij ri' ri winaq ruk' ri roq'b'al ruka' wakax. ²⁵Man k'o jun chak ri' kib'ano e kichi'j ri' chuwach ri Yahweh sa'om taq wa.

Ri q'ij rech tojb'al makaj

²⁶Ri Yahweh xuch'ab'ej ri Mo'ises, jewa' xub'ij chrech:

²⁷Xoquje' pa ri lajuj q'ij chrech we uwuq ik' ri', are uq'ij ri tojb'al makaj. Kib'an jun tyoxlaj moloj ib' ri'. Kixmewajik ri' e kichi'j jun sa'om wa ri' chrech ri Yahweh. ²⁸Pa we jun q'ij ri' man k'o ta jun chak ri' kib'ano rumal che uq'ij ri tojb'al imak chuwach ri Yahweh Idyos. ²⁹Jachin ri man kmewajik taj kesax ub'i ri' chkixo'l ri e'uwinaq; ³⁰Jachin kub'an jun chak pa we jun q'ij ri', in ri' kinkamisaj ub'i chkixo'l ri e'uwinaq. ³¹Xa jek'uri' mib'an b'a' jun chak, weri' jun junalikalaj pixab' chkech ri iwija'al pa ronojel mayilq'ijseq e pa ronojel k'olb'al jawi' kixjeqi' wi. ³²Jun nimalaj uxlanem ri' we jun q'ij chiwech e kixmewajik ri'; b'enaq'ij chrech ri b'elejeb' q'ij chrech ri ik', kixuxlan ri', kimajij ub'i ri' b'enaq'ij che ri jun q'ij chi k'ate' b'enaq'ij chrech ri jun q'ij chik.

Ri nimaq'ij rech ri tz'um ta ja

³³Ri Yahweh xuch'ab'ej ri Mo'ises, jewa' xub'ij chrech:

³⁴Che'ach'ab'ej ri e'ajisra'el, jewa' kab'ij chkech.

Pa ri jo'lajuj q'ij chrech we uwuq ik' ri', wuqub' q'ij kib'an nimaq'ij chrech ri Yahweh rech ri tz'um taq ja. ³⁵Pa ri nab'e q'ij kib'an ri tyoxlaj moloj ib' ri', man k'o ta jun chak ri' kib'ano. ³⁶Wuqub' q'ij kichi'j ri' sa'om taq wa chrech ri Yahweh. Pa ri uwajxaq q'ij kib'an jun tyoxlaj moloj ib' ri' e kichi'j sa'om taq wa ri' chrech ri Yahweh. K'o jun tyoxlaj moloj ib' ri'. Man k'o jun chak ri' kib'ano.

Utz'aqatib'al tzij puwi'

ri nimaq'ij rech ri tz'um taq ja

³⁷Are wa' ri nimaq'ij rech ri Yahweh, jawi' rajawaxik kib'an ri tyoxlaj moloj ib' arech kichi'j sa'om taq wa chrech ri Yahweh, kichi'j jetaq holokosto, kichi'j ri sipanik, ri tab'al taq toq'ob', ri sipanik rech ja', chjunal pa ri q'ij kuriqo, ³⁸man kiwejalaj ta ri' ri jetaq sab'ados rech ri Yahweh, man kiwejalaj ta ri' ri sipanik kiya'o, man kiwejalaj ta ri ujikib'axik itzij kib'ano e ri sipanik che kk'iy uloq pa ri iwanima' kiya chrech ri Yahweh.

Keb' oxib' tzij chik puwi'

ri nimaq'ij rech ri tz'um taq ja

³⁹Pa ri jo'lajuj q'ij chrech ri uwuq ik', aretaq chi' xyaktajik uwach ri jetaq tiko'n cho ri uwachulew, kib'an wuqub' q'ij nimaq'ij rech ri Yahweh. Ri nab'e q'ij rech nimalaj uxlanem ri' e xoquje' ri uwajxaq. ⁴⁰Ri nab'e q'ij kich'up uwach ri je'lik taq uche'al tiko'n, kiq'ip ub'i jujun taq uq'ab' palmeras, jujun taq uq'ab' che' che je'lik taq uxaq, e uq'ab' taq tz'oljche' rech nimaja', e nimal kixki'kot ri' wuqub' q'ij chuwach ri Yahweh ri Idyos. ⁴¹Kib'an unimaq'ij ri' ri Yahweh wuqub' q'ij pa jun junab'. Weri' jun junalikaj pixab' chkech ri iwija'l pa ronojel mayilq'ijjaq.

Pa ri uwuq ik' ri' kib'an we nimaq'ij ri'.

⁴²Wuqub' q'ij kixkanaj ri' pa tz'um taq ja. Konojel ri e'ajisra'el kekanaj ri' pa ri tz'um taq ja ri', ⁴³arech keta'maj ri iwija'l che ri in xe'injeqib'a' pa tz'um taq ja ri e'ajisra'elita aretaq chi' xe'inwesaj uloq pa ri rulew ri Egipto. In ri in Yahweh ri Inidyos.

⁴⁴Ri Mo'ises xuya' ub'ixik chkech ri e'ajisra'el ri nimaq'ij che rech ri Yahweh.

Utz'aqtisaxik ub'anik nik'aj taq q'ijlanik

Ri junalikaj q'aq'

24¹Ri Yahweh xuch'ab'ej ri Mo'ises, jewa' xub'ij chech:

²Chattaqan chkech ri e'ajisra'elita arech kkik'am uloq chawech utzalaj ase'ite rech olivo arech pa taq b'iq'al kaq'ejexik ukoq ruk' ri uq'aq' ri chajab'al. ³Ri A'aron, kusuk'umaj ukoq ri' chuwach ri upayu' ri Tz'ib'atalik, pa ri Tz'um Ja rech ri Riqoj Ib' arech amaq'el knikowik chuwach ri Yahweh chi kmajtaj ub'ik b'enaq'ij tza k'ate' na aq'ab' chik. Weri', jun junalikaj pixab' chkech ri iwija'l. ⁴Are ri A'aron kukoj ri q'aq' puwi' ri ch'ajch'ojalaj chajb'al, che k'o ukoq chi pa junalik chuwach ri Yahweh.

**Ri je'likalaj taq kaxlanwa kya cho
ri mexa che b'anom ruk' q'an pwaq**

⁵Kak'am ukoq jub'iq' utzalaj k'aj e kachaq'ejsaj kab'lajuj kaxlanwa ruk' weri', chjunalak' am ub'i keb' ulajuj rech ri pajb'al. ⁶Kacholej we kaxlanwa ri' pa keb' cholaj, waqib' kaxlanwa chjunal cholaj, kaya cho ri ch'ajch'ojalaj mexa chuwach ri Yahweh. ⁷Puwi' chjunal cholaj kakoj ch'ajch'ojalaj k'ok' q'ol; are wa' ri kb'anowik che weri' jun na'tisab'al, jun sa'om wa rech ri Yahweh. ⁸Pa junalik, chjunal sab'ado kokisaxik chuwach ri Yahweh. Ri e'ajisra'elita, kkiya wa' weri' pa ri ub'i ri junalikalaj chapb'alq'ab'. ⁹Weri' rech ri A'aron e kech ri e'uk'ojol e kkitij wa' pa jun tyoxlaj k'olb'al; rumal rech che jun tyoxlaj wa weri' chawach, tyoxlaj wa chuxo'l ri wa che kya chrech ri Yahweh. Weri' jun junalikalaj pixab'.

**Ri k'axalaj tzij chuwach ri Dyos
e ri pixab' rech k'ajisab'al wachaj**

¹⁰Elenaq ub'i kuk' ri e'ajisra'elita jun ral jun ixoq ajisra'el, che ajegipto ri utat, e xch'o'jinik chi ruk' jun achi ajisra'el. ¹¹K'atek'uri', ri ral ri ixoq ajisra'el k'ax xch'awik e xyoq'on chrech ri b'i'aj. Xk'am ub'i ri are' chuwach ri Mo'ises. Selomit ub'i' ri unan, ral ri Dib'ri, jun pa ri ujuq'at ri Dan. ¹²Utz uchajixik xkib'an ri are' chi k'ate' na kchomax ri q'atojtzij puwi' jacha ktaqan ri Yahweh.

¹³K'atek'uri', ri Yahweh xuch'ab'ej ri Mo'ises, jewa' xub'ij chrech:

¹⁴Chawesaj ub'ik pa ri tz'um taq ja ri jun achi che k'ax taq tzij xch'awik e xyoq'onik. Konojel ri xetowik chkikojo' ri kiq'ab' cho ri ujolom, e konojel ri komon chuk'yaqa' cha'b'aj.

¹⁵K'atek'uri', jewa' kab'ij chkech ri e'ajisra'elita: Xaq apachinchike achi che k'ax kch'aw chrech ri Dyos, kreqaj ri' ri ra'lal ri umak. ¹⁶Jachin kyoq'on chrech ri Ub'i' ri Yahweh, xas kkamisaxik ri', konojel ri komon kkik'yaq ri' cha'b'aj, kne'b'a' kaxlan winaq on alaxinaq waral, we kyoq'on chrech ri b'i'aj, xas kkamisaxik ri'.

¹⁷We jun achi kamikal uch'ayik ktaq chrech jun achi chik, xas kkamisaxik ri'.

¹⁸We jun achi kamikal uch'ayik ktaq chrech jun chikop, kutoj uk'axel ri': kuya k'aslemal pa uk'exwach k'aslemal.

¹⁹We k'o jun winaq k'ax xtaq chrech ri rajil utz'aqat, jacha ri xub'an are' jeri' kb'an chrech: ²⁰we xq'ajinik kq'aj ri' ri are', jun woq'ochaj pa uk'exwach jun woq'ochaj, jun wareyaj pa uk'exwach jun wareyaj. Jacha ri k'ax xub'an chrech ri rarajil utz'aqat jeri' ri k'ax kb'an chrech ri are'. ²¹Jachin kamikal ch'aykil ktaq chrech jun chikop, kutoj uk'axel ri'; k'atek'uri', jachin kamikal ch'aykil ktaq chrech jun winaq, kkamisaxik ri'. ²²Junam q'atb'altzij kb'an pakiwi', kne'b'a' jun winaq xa'lax waral on jun kaxlan winaq ne', rumal rech che in ri in Yahweh in Idyos.

²³Aretaq chi' xb'itaj weri' rumal ri Mo'ises chkech ri e'ajisra'el, xkesaj uloq pa ri tz'um taq ja ri jun achi che k'ax xch'awik e xkik'yaq cha'b'aj. Xkib'ano jacha xtaqan ri Yahweh chrech ri Mo'ises.

Ri tyoxlaj taq junab'

25¹Ri Yahweh xuch'ab'ej ri Mo'ises cho ri juyub' Sina'i, jewa' xub'ij chrech: ²Che'ach'ab'ej ri e'ajisra'el e jewa' kab'ij chkech:

Aretaq chi' ix okinaq chik pa ri ulew che kinya na in chiwech; ri ulew kuxlanik na ri' rech uq'ijil ri Yahweh. ³Waqib' junab' ri' katik uwach ri awulew, waqib' junab' ri' kachoy

uwi' ri uche'al a'uva e waqib' junab' ri' kach'up uwach. ⁴K'atek'ut, pa ri uwuq junab', jun nimalaj uxlanen ri' chrech ri ulew, jun sab'ado ri' rech uq'ijil ri Yahweh: man katik ta ri' ri awulew e man kach'up ta uwach ri' ri awiña, ⁵man kach'up ta chi ri' ri ktuxnik uloq chech ri atriko, man kach'up ta ri' ri joytaj uwach ri a'uva we man xachoy ta ri uwi' uche'al. Jun junab' nimalaj uxlanem chrech ri ulew. ⁶Pa ri jun junab' che nimalaj uxlanem chech ri ulew, kixutzuq na ri' ri at, ri achi apataninel, ri ixoq amokom, ri awajchak, ri awula', konojel ri xejeqi' kan awuk'. ⁷Ke'utzuq ri' ri jetaq achikop ek'o cho ja, xoquje' ri chikop ek'o pa juyub'.

Ri junab' toq'ob'isab'al wach

⁸Kawejalaj na wuqub' xmano pa jun junab' (ri jun junab' jun q'ij, jun xmano wuqub' q'ij, wuqub' xmano pa jun junab' kub'ana' kawinaq b'elejlajuj junab'), wuqub' mul wuqub' junab', weri' kub'ij che wuqub' xmano pa jun junab', kub'ana ri' kawinaq b'elejeb' junab'. ⁹K'atek'uri', pa ri uwuq ik', pa ri lajuj q'ij chech ri ik' kawoq'esaj ri' ri ruk'a' wakax; pa ri q'ij rech ri tojb'al makaj kiwoq'esaj na ri' ri ruk'a' wakax pa ronojel ri uwulew.

¹⁰Kiya' nimalaj ub'ixik ri' che tyox ri kawinaq lajuj junab', xoquje' kiya nimalaj ub'ixik ri' che ketzoqopixik konojel ri winaq esiwantinimit. Weru', jun junab' toq'ob'isab'al wach wa' chiwech; konojel winaq ktzalex ri' chrech ri rechb'al, konojel ketzalej ri' pa ri kijuq'at. ¹¹We jun kawinaq lajuj junab' ri' jun junab' toq'ob'isab'al wach ri' chiwech: man kixawexan ta ri', man kich'up ta ri' ri ktuxnik chi uloq chech ri itriko, man kich'up ta ri' ri uwach ri uva che man xichoy ta ri uwi'. ¹²Ri nimalaj nimaq'ij rech mulin ib', jun tyoxlaj junab' wa' chiwach. Are kitzuqb'ej iwib' ruk' ri xaq are ri ulew kuya'o.

¹³Pa we junab' ri' che rech nimalaj nimaq'ij, chijujunal ix ktzalex ri' chiwech ri iwechb'al. ¹⁴We k'o kak'ayij on k'o kaloq' chrech ri awajil atz'aqat, qas kawilo, mab'an k'ax chech ri awachalal. ¹⁵Are kawejalaj janipa' junab' ok'owinaq chi ri junab' toq'ob'isab'al wach aretaq chi' kab'an ri aloq'omik ruk' ri awajil atz'aqat; are kejalaxik janipa' junab' ktik na uwach ri ulew, e are wa' ktak'b'asanik ri rajil ri ulew. ¹⁶We k'ya taq junab' na ktikik uwach ri ulew kpaqi' ri' ri rajil, we ma k'ya ta chi ri junab' ktik uwach, kqaj ri rajil, rumal rech che are ri utikik e ri uyakik ri uwach ri ulew kuk'ayij chawech.

¹⁷Man k'o ta jun ri' chixo'l ix kub'an k'ax chrech jun uwinaq, xane chixib'ij b'a' iwib' chuwach ri Yahweh, rumal rech che in ri in Yahweh Inidyos.

Ujikib'axik ri junab' toq'ob'isab'al

wach rumal ri Dyos

¹⁸Qas chib'ana' b'a' ri nupixab' e ri nutzij, chik'olo' b'a' pa ri iwanima' e qas chik'aslemaj b'a', xa jek'uri' kijikib'a' ri ik'aslemal pa we ulew ri'. ¹⁹Ri ulew qas kuya ri' ri uwach, kitij na k'uri' ri uwach chi k'ate' na kixnojik e kijikib'a' ri' ri ik'aslemal pa we ulew ri'.

²⁰We ri ix kib'ij: «¿Jas k'u kaqatij ri' pa ri uwuq junab' we man kujawexanik e we man loq' taj kqayak uwach ri qatiko'n?».

²¹Ri in kintaq uloq ri' ri nutewchi'nik chiwech pa ri uwaq junab' e xa jek'uri' kuya' uwach ri' ri ulew rech oxib' junab'; ²²Kixawexan ri' pa ri uwajxaq junab', k'atek'uri' are kitij na ri' ri rech ri jun junab' kanoq chi k'ate' na kpe ri ub'elej junab'; aretaq chi' maja' kpe ri uwach we jun junab' ri', ri ix are kitij na ri' ri uwach ri jun junab' kanoq.

Ri uloq'ik chi jumul ri ulew

che xk'ayixik rumal jun rajawaxik

²³Ri ulew man kuya taj che pa junalik xk'ayixik, ri ulew wech in, rumal rech che chnuwach in, ri ix, xa ix kaxlan taq winaq, xa ix ok'owel. ²⁴Ronojel ulew k'o piq'ab', taqalik che kloq' chi na jumul.

²⁵We ri awachalal kuriq jun k'ax e rajawaxik kuk'ayij ch'aqap rulew, ri jun rachalal che naqaj k'o chrech are', kopan ri' pa ja che uloq'ik ri ulew che xuk'ayij kan ri rachalal.

²⁶Jachin jun man k'o ta jun uwinaq kub'an toq'ob' chrech arech kusuk'umaj weri', chumolej b'a' urajil pa rech wi ri are', arech kkowin chi jumul che uloq'ik ri rulew, ²⁷chrejelij b'a' ri junab' q'axinaq chik aretaq chi' xuk'ayij kan ri rulew, e chutzalej b'a' chrech ri winaq xloq'owik, ri rajil rech taq ri junab' kraj na che kopan chi jumul ri junab' toqob'isab'al wach. ²⁸We man kuriq ta ri pwaq rajawaxik, arech kuloq' chi jumul ri rechb'al che xuk'ayij kanoq, kkanaj kan ri' pa uq'ab' ri winaq loq'ominel chi k'ate' na pa ri jun junab' che nimalaj nimaq'ij. Pa ri jun junab' ri', kel uq'ab' ri' ri loq'ominel chrij ri ulew e ri winaq che xka'yin rech ktzalej ri' pa ri rechb'al.

²⁹We jun winaq kuk'ayij jun ja che k'o pa jun tinimit che sutul rij pa tapya, loq' ri' kuloq' chi na jumul chi k'ate' na ktz'aqat jun junab' che xuk'ayij kanoq, xas jun junab' kuq'i'o arech kuya'o kuloq' chi jumul, ³⁰we man kb'an kowinem che uloq'ik chi jumul aretaq chi' ktz'aqat jun junab' che xk'ayix kanoq, ri jun ja che k'o pa jun tinimit che sutul rij pa tapya, xas kkanaj kan ri' puq'ab' ri xloq'ow rech e kechb'al kan ri' ri erija'al e man loq' ta chi ri' ktzoqopixik pa ri junab' toq'ob'isab'al wach.

³¹K'atek'ut, ri jetaq ja che ek'o pa taq juyub' pa jun tinimit che man sutul ta rij pa tapya jacha ri ek'o pa taq ri nimalaj tinimit, kb'an ri' jacha kb'an chrech ri ulew pa ronojel ri amaq', kuya ri' kloq' chi na jumul, e kel ri' puq'ab' ri xloq'owik pa ri junab' toq'ob'isab'al wach.

³²K'atek'uri', ri jetaq tinimit che kech ri e'ajlevita, ri jetaq ja che kech ri e'are' pa ri jetaq tinimit ri', ya'tal ri' chkech che kkiloq' chi jumul ri jun ja che kech e'are'. ³³Kne'b'a' man xb'an ta kowinen che uloq'ik chi jumul ri ja che k'o pa ri kitinimit ri e'ajlevita, we jun ja ri' che k'ayim kanoq, kel ri' puq'ab' ri jun che xloq'owik pa ri jun junab' rech nimalaj nimaq'ij; rumal rech che ri ja k'o pa taq ri kitinimit ri e'ajlevita, kechb'al ri' ri e'are' chkixo'l ri e'ajisra'el, ³⁴xoquje', ri ulew ktikik, che ko chunaqaj ri jetaq kitinimit man ya'tal taj kk'ayixik, rumal che pa junalik kechb'al ri e'are'.

Ri uloq'oqexik ri ajil tz'aqat

³⁵Ri awachalal che jeqel awuk', we kuriq k'ax e kawilo che man kkowin taj kutoj ri uk'as ub'anom awuk'; kawilij na ri' ri are' jeri' jacha jun kaxlan winaq on jacha jun awula' e kjeqi' kan ri' awuk'. ³⁶Mak'am chrech ri are' ral pwaq on jun uchak, xane chaxib'ij b'a' awib' chuwach ri Adyos e chaya' b'a' alaj chrech ri awachalal arech kkanaj kan awuk'. ³⁷Maya' pwaq chrech ri are' arech k'o ral kariq chrij, e maya' ri tzuqb'al taq awech chrech arech k'o ach'akoj chrij kariqo; ³⁸in ri in Yahweh Inidyos che xixinwesaj uloq pa ri rulew ri Egipto, arech kinya' chiwech ri rulew ri Kana'an, e arech kinuxik Inidyos.

³⁹We ri awachalal kb'e pa k'as awuk' e kuriq k'ax pa ri uk'aslemal, k'atek'uri' kuk'ayij rib' awuk', machakun awuk' jacha jun loq'om patanijel; ⁴⁰kk'o'ji' ri' awuk' jacha jun ajchak che katoj uq'ij on jacha jun winaq che xruqxa'nij rib' awuk', kchakun ri' awuk' chi k'ate' kopanik ri junab' toq'ob'isab'al wach. ⁴¹K'ate nak'uri', kel uloq' awuk', ri are' e ri eralk'uwa'l e ktzalej ri' pa ri ujuq'at uwinaqil e pa ri rechb'al che xkiya kan ri unan utat

chrech. ⁴²Rumal rech che ri e'are' enupataninel ewech in, che xe'inwesaj uloq pa ri rulew ri Egipto; man loq' taj kek'ayixik jacha uk'ayixik jun pataninel. ⁴³Man ko taj katak'ab'a' awib' chuwach, kab'an ta k'ax chrech, xane chaxib'ij awib' chuwach ri Yahweh.

⁴⁴Ri e'apataninel e ri e'amokom kek'oji'k, kepe ri' pa taq ri tinimit che ek'o naqaj chiwech; xas pa taq we tinimit ri' kixkowinik kiloq' ri epataninel e ri jetaq imokom. ⁴⁵Xoquje' kuya'o kiloq' chkixo'l ri ekalk'uwa'l ri kuqxa'nib' kib' iwuk' e chkixo'l ri ekalk'uwa'l e'are' che ek'o chixo'l, weri' kub'ij che kuya'o kiloq' chkixo'l ri winaq che xaq e'alaxinaq pa ri iwulew; ri e'are' kuya'o kib'an iwech chkech, ⁴⁶k'atek'uri', kuya'o ke'iya' kanoq pa kiq'ab' ri e'ik'ojol chiwach chi aq'anoq ri ix, arech pa junalik ekechb'al kekanaj kan pa kiq'ab'. Ri e'are', kuya'o ke'itaq jacha kitaqik ri epataninel, k'atek'ut, pakiwi' ri e'awachalal e'ajisra'el, man loq' taj ruk' choq'ab' kattaqan pakiwi'.

⁴⁷We ri jun kaxlan winaq on ri jun che ruqxa'nim rib' awuk' pa ri awachoch k'o chi kel wi ruk' ri umeb'il, k'atek'uri' ri awachalal kb'e pa k'ax ruk' ri are' e kuk'ayij rib' chrech ri jun kaxlan winaq che uwuqxa'nim rib' awuk' ri at, on kuk'ayij rib' ruk' jun chkech ri erachalal ri jun che jeqel awuk', ⁴⁸ri awachalal kuya ri' kresaj rib' pa ri k'ax: kuloq' ri' jun chkech ri erachalal. ⁴⁹Kuloq' ri' jun rikan che rachalal ri utat, on ri uk'ojol ri rikan che rachalal ri utat, on jun chik rachalal, on we k'o kel wi ruk' ri urajil kkowin ri' xas are are' kuloq' rib' arech kresaj rib' puq'ab' ri jun kaxlan winaq.

⁵⁰Junam ek'olik ruk' ri xloq'owik, kejalaj ri' ri jetaq junab', kmajtajik ub'i rejalaxik aretaq chi' xuk'ayij rib' chi k'ate' kopan pa ri junab' toq'ob'isab'al wach; ri rajil kchomaxik ri' puwi' ri jetaq uq'ij rumal ri chak xub'ano. ⁵¹We k'i junab' na kraj; ri pwaq kutzalej, kchomaxik ri' ruk' ri jetaq junab' na kraj. ⁵²We man k'ya ta chi ri junab' kraj kopan ri junab' toq'ob'isab'al wach, kchomaxik ri' ri pwaq kutzalej puwi' we jetaq junab' ri' e kutoj ri' ri tojb'al rech are', ⁵³jeri' nak'uri' jacha jun ajchak che kachakunik e ktojik chi junab'. Xaq mawilo we kb'an k'ax chrech ri awachalal chawach.

⁵⁴We man k'o ta jun kloq'owik arech kresaj rib' pa ri k'ax, pa ri junab' toq'ob'isab'al wach ktzoqopitajik ub'i ri', ri are' e ri eralk'uwa'l. ⁵⁵Rumal rech che ri e'ajisra'elita enupataninel in; ewech in che xe'inwesaj uloq pa ri rulew ri Egipto. In ri in Yahweh Inidyos.

Unitz'arisaxik ri tzij e k'isb'al taq tzij

²⁶Mitz'aq b'a' ri man tzij taj edyos, mikoj b'a' jetaq wachb'al, miwa'lisaj b'a' jetaq tz'aq on mital b'a' rij nik'aj taq che', mikoj b'a' talom rij taq ab'aj pa ri iwulew arech kixqaj che uq'ijilisaxik, rumal rech che in ri in Yahweh Inidyos. ²Ri ix, kichajij ri' ri jetaq nusab'ado e nim kiwik wi ri' ri tyoxlaj nuk'olb'al. In ri in Yahweh.

Ri jetaq tewchi'nik

³We kixb'inik pa ri nupixab', we kik'ol pa ri iwanima' ri jetaq nutzij e we kik'aslemaj, ⁴ri in kintaq uloq ri' ri jab' chiwech pa ri q'älaj, arech ri ulew e ri jetaq tiko'n kuya uwach, ⁵ri ix tajin kipoch' na triko ri' aretaq chi' kpe chi ri uch'upik uva e tajin na uch'upik ri' ri uva aretaq chi' kopan chi ri awex. Kixwa' ri' chi k'ate' na kixnojik e kixjeqi' ri' pa ri iwulew ruk' nimalaj ja'maril.

⁶Kinjikib'a' ri' ri nimalaj utzil cho ri awulew e kixqaj ri' chrech ri waram e man k'o ta jun ri' kb'anow k'ax chiwech. Cho ri iwulew, kinchup kiwach ri' ri jetaq awaj eb'anal taq k'ax. Ri ch'ich' rech ch'o'j man kq'ax ta ri' cho ri iwulew. ⁷Ke'iwoqataj ri' ri e'ik'ulel e ri

e'are' kekam ri' chuxe' ri ich'ich' rech ch'o'j. ⁸Job' chiwech ix kekoqataj na ok'al winaq ri', ok'al kekoqataj na lajuj mil winaq; ri e'ik'ulel xas chiwach ix keqaj chuxe' ri ich'ich'.

⁹Ri in kinya nuwach ri' iwuk' ix. Kinb'an na ri' arech ri ix kpoq' iwach, kixk'yarik e kinjikib'a' iwuk' ri nuchapb'alq'ab'.

¹⁰Kitij na ri' ri uwach tiko'n rech junab'ir kanoq, k'atek'uri' rajawaxik ri' kiwesaj ub'ik ri rech junab'ir kanoq arech kijam uk'olb'al ri k'ak' chik.

¹¹Kinjeqeb'a' na ri' ri wachoch chixo'l ix e man kixink'yaq ta ub'i ri'. ¹²Ri in kinjeqi' ri' chixo'l ix, in kinnux ri' Inidyos e ri ix, kixux ri' ix Nusiwantinimit. ¹³In ri in Yahweh Inidyos ri xixinwesaj uloq pa ri Egipto, arech man ix kipataninel ta chik pa k'ax taq chak; ri in xinq'ip ri taq che' k'o chrij iqul arech suk' ri ijolom kixb'inik.

Ri kyaqsaq

¹⁴K'atek'ut, we man kitatab'ej ta ri nutzij e man kik'aslemaj ta ronojel we jetaq pixab' ri', ¹⁵We kisetej ub'ik ri jetaq nupixab' e we kitz'ilaj ri jetaq nutzij e kitukij ri nuchapb'alq'ab' rumal rech che man kib'an taj ri kintaqan chrech, ¹⁶xoquje' jeri' kinb'an in iwuk'.

Kinpetisaj na ri' ri xib'irib' chiwech xoquje' ri molem taq yab'il e ri nimalaj q'aq', arech kub'an k'ax chech ri iwoq'och e kuchup ri iwuxlab'al. Man k'o ta upatan ri' kitik ri' ija' rumal rech che are ri e'ik'ulel ri' ketijowik. ¹⁷Ri in kixink'ule'laj na ri' e kixsach ri' pa kiq'ab' ri e'ik'ulel. Ri man kiya'om ta kiwach wuk' kicha'kan ri' piwi', xoquje' kixanimaj ri' aretaq chi' man k'o ta jun winaq tajin kixroqataj.

¹⁸K'atek'uri', we ruk' weri', ri ix man kitatab'ej ta ri nutzij, rumal ri imak, ri in kink'ajisaj iwach wuqub' mul chi na chuwach ri nab'e. ¹⁹Kinqasaj ri' ri nimal kinna'o ruk' ri ikowinem e kintaqan ri' chrech ri kaj arech jacha jun ch'ich' kub'an iwuk' e ri ulew jacha jun saq ch'ich' kub'an iwuk'; ²⁰kik'is ri' ri ichuq'ab' e man k'o ta upatan ri', ri iwulew e ri jetaq tiko'n man k'o ta chi uwach ri' kuya'o.

²¹K'atek'uri', we ruk' weri', ri ix kixk'ulela'n na chwech e man kiwaj taj kitatab'ej ri nutzij, rumal ri imak kink'ajisaj iwach wuqub' mul chi na chuwach ri nab'e'. ²²Ke'intzoqopij ub'i ri' chiwij ri jetaq chikop che eb'anal k'ax, kekik'am ub'i ri' ri e'iwalk'uwa'l, kekik'is b'i ri' ri jetaq jupuq chikop iwech ix e kixkikamisaj kan ri' ri ix e man ix k'ya ta ri' kixkanajik kanoq, xa jek'uri' tz'inalik ri' kkanaj kan ri jetaq ib'e.

²³K'atek'uri' we ruk' weri' ri ix man kik'ex ta iwib' chnuwach e wene' kinik'ule'laj na, ²⁴xoquje' ri in kixink'ulelaj na ri', kixinch'ay chi na wuqub' mul ri' chuwach ri nab'e kanoq rumal ri imak. ²⁵Kink'am na uloq chiwij ri ch'ich' tojb'al rech uk'axel ri chapb'alq'ab'. Kimulij k'u iwib' ri' pa taq ri itinimit, k'atek'ut, ri in kintaq ub'i ri' chixo'l ri b'innelyab'il, e kixqaj ri' puq'ab' ri ik'ulel. ²⁶Aretaq chi' ri in man kinya' ta chi ri kaxlanwa chiwech, elajuj ixoqib' ri' kkichaq'ejisaj ronojel ri kaxlanwa xa pa jun tuj, e kejalaj ri' ri ujachik chiwach, kitij na k'uri' we kaxlanwa ri' e man kixnoj ta ri'.

²⁷K'atek'uri', we xoquje' ruk' weri', man kitatab'ej ta ri nutzij e kinik'ule'laj na, ²⁸ri in kixink'ulela'j na ri' ruk' ri woyowal, kink'ajisaj iwach ri' wuqub' mul chi na chuwach ri nab'e kanoq rumal ri imak. ²⁹Kixok ri' chkitijik kiti'ojal ri e'ik'ojol e ri e'imi'al. ³⁰Kink'is tzij ri' puwi' ri tyox taq ik'olb'al ek'o ajsik, kintukij ub'i ri' ri jetaq ab'aj rech tab'al toq'ob' rech k'ok' q'ol, ke'inmulb'a' ri' ri jetaq ekaminaq puwi' ri ekaminaq taq ab'aj rech ri man tzij taj edyos e ri in kixink'yaq ub'i ri'. ³¹Kink'is tzij ri' puwi' ri jetaq itinimit, kinwilij ub'i ri' ri tyoxlaj taq ik'olb'al e man kinsiq ta chi jumul ri' ri jororisab'al taq ikunab'al. ³²Ri in, tol ri' kinb'an kan chrech ri ulew, e ri e'ik'ulel che kepetik arech kejeqi' chila', kmayow kik'u'x ri' chrilik! ³³Ri in kixinjub'uj ub'i ri' chkixo'l ri jetaq amaq'. Kinwesaj ri' ri ch'ich' pa rij chiwij

ix. Ri iwulew, tolonikalaj ulew ri' kkanaj kanoq pa nuq'ab' e k'isinaq kan tzij ri' kkanaj kan ri jetaq itinimit.

³⁴Kutoj na k'u ri' ri ulew ri jetaq sab'ado, pa ronojel ri jetaq q'ij che kuq'i'o ri k'ax ri', aretaq chi' ri ix, ix k'o pa ri kulew ri e'ik'ulel. K'atek'uri', qatzij nak'uri' che kuxlan ri ulew e kkwon na ri' kutoj nak'uri' ri jetaq sab'ado. ³⁵Ronojel jampa' kuq'i'o ri k'ax, kuxlan ri' ri ulew, ri ma loq' taj xub'ano pa ri taq sab'ado aretaq chi' ri ix ixjeqel jela'.

³⁶Ri jachintaq keto'taj kan chiwech ri ix, kinkoj xib'rikil ri' pa ri kanima' aretaq chi' ek'o pa ri kitinimit ri ekik'ulel, ke'animaj ri' chuwach jun uxaq che' aretaq chi' kkito' ktzaq uloq, ke'animaj ri' jacha kanimaj jun chuwach ri ch'ich' e ketzaq na k'uri' e man k'o ta jun ri' tajin keroqataj. ³⁷Kch'ikmala' kib' jeri' jacha uch'ikmaxik ib' kab'an chuwach ri ch'ich' rech ch'o'j kne'b'a man k'o ta jun tajin kixoqtanik! Ma kixkwin ta ri' kixtak'i' chkiwach ri e'ik'ulel, ³⁸kixkam ri' chkixo'l ri jetaq amaq' e ri kukew ri e'ik'ulel kixub'iq' ub'i ri'.

³⁹E ri jachintaq keto'taj kanoq chiwech ix, keq'iy ri' pa ri kulew ri ek'ulel rumal ri kimak e'are' e rumal ri kimak ri kitat xoqan chkij. ⁴⁰K'atek'uri', kkisol kib' ri' e kkisol ri' ri kimak ri kitat, ri kimak che man xkiya ta kiwach wuk' in, e xinkik'ule'laj ne'.

⁴¹Xoquje' ri in ke'ink'ule'laj na ri' ri e'are' e ke'ink'am ub'i ri' pa ri kulew ri ekik'ulel. K'atek'uri', ri jun kanima' che man q'atom ta uwi' kuqasaj rib' ri' chnuwach, e kkik'am uq'ab' ri' ri k'ajisab'al kiwach rumal ri kimak. ⁴²Ri in kna'taj ri' chwech ri nuchapb'alq'ab' xinb'an ruk' ri Jakob', ri nuchapb'al q'ab' xinb'an ruk' ri Isa'ak e ri nuchapb'alq'ab' xinb'an ruk' ri Ab'raham; kna'taj ri' chwech ri ulew.

⁴³Aretaq chi' maja' weri', ri ulew kutoj ri' ri jetaq sab'ado, kuxlanik aretaq chi' tolonik kkanaj kanoq. K'atek'ut, ri e'are' rajawaxik ri' che kkitoj uk'axel ri kimak, rumal rech che xkik'yaq kan ri nutzij e xketzelaj ri nupixab'.

⁴⁴Kne'b'a' xkib'an ronojel weri': Aretaq chi' ek'o pa rulew ri ekik'ulel, ri in man xas ta ke'ink'yaq ub'i ri' e man chi ta ke'intz'i'laj chi k'ate' na uk'isik na kiwach e'are' e che kint'oqopij ri nuchapb'alq'ab' kuk' ri e'are', rumal rech che in ri in Yahweh in Kidyos. ⁴⁵Ri in kinna'taj ri', rumal utoq'ob'isaxik kiwach, ri chapb'alq'ab' xinb'an kuk' ri kimam, che xe'inwesaj uloq pa ri rulew ri Egipto chkiwach ri jetaq amaq', arech kinuxik in Kidyos, in ri in Yahweh.

⁴⁶Are wa' ri utaqanik, ri utzij e ri upixab' xukoj ri Yahweh chkixo'l ri e'ajisra'el puwi' ri juyub' Sina'i, xas rumal ri Mo'ises.

Ri k'isb'al utz'am tzij

Utojb'alil pwaq

27¹Ri Yahweh xuch'ab'ej ri Mo'ises, jewa' xub'ij chrech: ²Che'acha'b'ej ri e'ajisra'elita, jewa' kab'ij chkech:

We k'o jun winaq kraj kub'an ri toq'ob' chuwach ri Yahweh, kub'an ri tzij che xujikib'a' ub'ixik puwi' ri rajil jun winaq, ³ri achijab' che juwinaq kijunab' e ke'opan pa oxk'al kijunab', ri kajil kawinaq siklos saq pwaq ri' -siklo rech ri tyoxlaj k'olb'al- ⁴k'atek'ut, we ixoq, ri rajil juwinaq lajuj siklos ri'.

⁵Aretaq chi' job' kijunab' chi k'ate' ke'opan pa ri juwinaq kijunab': ri ala rajil juwinaq siklos e ri ali lajuj siklos.

⁶Aretaq chi' jun kik'lal chi k'ate' ke'opan pa job' kijunab': ri ala rajil job' siklos saq pwaq e ri ali oxib' siklos saq pwaq.

⁷Aretaq chi' oxk'al kijunab': ri achi rajil jo'lajuj siklos e ri ixoq lajuj siklos.

⁸We k'o jun winaq man kkowin taj kutoj we rajil ri', kuk'am ub'i ri' ri winaq chuwach ri chuchqajaw. Are ri are' ri' kuchomaj ri rajil ri winaq, k'atek'ut are kril ri' ri jastaq rech ri winaq che xujikib'a' ub'ixik ri utzij.

Ri jetaq awaj

⁹Jun awaj che kuya'o kchi'x chrech ri Yahweh, ronojel awaj che kya chrech ri Yahweh, tyox ri'. ¹⁰Man loq' taj kjal uwach ri awaj on kokisax jun chik chuwach jun chik, jun utz chuwach jun chik che man utz taj on jun man utz taj chuwach jun utz awaj. We kjal jun awaj pa uk'olb'al jun chik awaj, ri jun che xjal uwach e ri jun awaj chik, chi ekeb' etyox taq awaj ri'.

¹¹We jun awaj che ma ch'ajch'oj awaj taj, jun chkixo'l ri man loq' taj kchi'x chrech ri Yahweh, kk'am ub'i ri' ri jun awaj ri' chuwach ri chuchqajaw, ¹²e are are' ri' kb'inik ri rajil ri awaj, are kril ri' we utz on man utz awaj taj; ktoj ri' ri rajil jacha ri kub'ij ri chuchqajaw, ¹³k'atek'ut we k'o jun kraj kuloq' chi na jumul ri sin awaj, kutoj chi na jun uro' uwi' chrech ri rajil.

Ri jetaq ja

¹⁴We jun achi kuchi'j ri rachoch chrech ri Yahweh, are ri chuchqajaw ri' kb'inik janipa' ri rajil, kril ri' we paqalik on man paqal taj. Jeri' na k'uri' ri rajil kkanajik jacha ri xub'ij ri chuchqajaw, ¹⁵k'atek'uri', we ri jun achi ri xchi'n ri ja, kraj kuloq' chi na jumul ri ja, kutoj chi na apanoq ri' jun uro' uwi' ri rajil e rech chi jumul ri' ri ja.

Ri jetaq ulew

¹⁶We jun achi kuchi'j jun rulew chrech ri Yahweh, arech kokisaxik ri rajil are kil ri' ri ija' ktik chuwach: rumal chjujunal eqa'n salwa't ktikik ktoj kawinaq lajuj siklos saq pwaq ri'.

¹⁷We uchi'm we jun ulew ri' pa ri junab' toq'ob'isab'al wach, man kk'extaj ta ri' ri rajil; ¹⁸k'atek'ut, we kuchi'j chi aq'anoq aretaq chi' q'axinaq chi ri junab' toq'ob'isab'al wach, are ri chuchqajaw ri' kb'in ri rajil; arech kub'ij ri rajil are kril ri' janipa' taq junab' na kraj kopan chi jumul ri junab' toq'ob'isab'al wach e kuqasaj ri' ri rajil.

¹⁹We kraj kuloq' chi jumul ri ulew, kutoj chi na apanoq jun uro' uwi' ri rajil e krechb'ej chi jumul ri' ri rulew. ²⁰K'atek'ut, we man kuloq' ta chi jumul ri ulew e kk'ayix ub'i chrech jun chik winaq, e ri are' ma chwe'q kab'ij man kkowin ta chi ri' kuloq'o; ²¹e pa ri junab' toq'ob'isab'al wach, ri winaq che xloq'owik we ulew ri', rajawaxik kel puq'ab', e kchi'x ri' chrech ri Yahweh jacha jun ulew rech kamikal: ri rechb'al we achi ri' kok ri' rechb'al ri chuchqajaw.

²²We k'o jun kuchi'ij jun loq'omik ulew chrech ri Yahweh, k'atek'ut, man rechb'al taj, ²³are ri chuchqajaw ri' kb'inik janipa' ri rajil; arech kub'ij ri rajil are kril ri' ri junab' kraj na kopan chi jumul ri junab' toq'ob'isab'al wach, e ri jun achi kutoj ri' ri pwaq pa we jun q'ij ri', we pwaq ri' tyox pwaq kkanaj kan chrech ri Yahweh. ²⁴Aretaq chi' kopan ri junab' toq'ob'isab'al wach, ri ulew ktzalej ri' chrech ri winaq ri xk'ayin ri ulew, ri are' che rechb'al ri' ulew pa ri amaq'. ²⁵Ri rajil ronojel jastaq kb'an ri' ruk' ri taq siklos che rech ri tyoxlaj k'olb'al: juwinaq geras ri kok pa jun siklo.

Nik'aj taq pixab' chik puwi' ri loq'omik

²⁶Man k'o ta jun winaq kkwonik kuya'o pa tyoxrisanik chrech ri Yahweh ri nab'e'al taq kal ri uchikop, rumal rech che pa ri pixab' we jetaq chikop ri' xas erech chi ri Yahweh; kne'b'a' nim on ko'lik chikop, erech chik ri Yahweh. ²⁷We jun chikop che man ch'ajch'oj taj, kkwon ri' kuloq' chi jumul jacha ri rajil xb'ixik, k'atek'ut, kuya chi na apanoq jun uro' uwi'. We makuloq' chik, kk'ayix ub'i ri' ri chikop jacha ri rajil xb'ixik.

Keb' oxib' tzij puwi' ri kamikal

²⁸Ronojel ri jastaq, che jun winaq, pa anatema xutyoxrisaj chuwach ri Yahweh: man loq' taj kk'ayixik on man loq' taj kuloq' chi jumul ri xk'ayin rech -kne'b'a' winaq, chikop on ulew che xrechb'ej kanoq- Ronojel jastaq rech anatema, tyox ri' chuwach ri Yahweh.

²⁹Jun winaq che ya'om pa anatema, man loq' ta ri' kuloq' chi jumul ri jun winaq ri xya'ow pa anatema, rajawaxik ri' xas kkamisaxik.

Puwi' ri jetaq u'lajuj kya'ik

³⁰Ronojel ri u'lajuj kya'ik rumal ri ija' rech ri ulew on rumal ri uwach ri jetaq tiko'n, weri' ktyoxrisaxik chrech ri Yahweh. ³¹We k'o jun winaq kraj kuloq' chi jumul ri u'lajuj xuya'o, kuya chi na apanoq jun uro' uwi'.

³²Ronojel u'lajuj ya'om ruk' nim on ko'lik chikop, ktyoxrisaxik ri' chrech ri Yahweh, are na k'uri' ronojel ri u'lajuj che kq'ax chuxe' ri che'. ³³Man kb'an ta rilik ri' we utz on man utz taj ri chikop, xoquje' man kjal ta chik jun chikop ri' pa uk'exwach jun chik; we kjal uwach jun chikop, ri jun che xjal uwach e ri jun chik, ketyoxrisaxik ri' chrech ri Yahweh e man loq' ta chi ri' keloq' chi b'i jumul.

³⁴Are wa' ri jetaq pixab' xtaqan ri Yahweh chrech ri Mo'ises puwi' ri juyub' Sina'i, arech kuya' ub'ixik chkech ri e'ajisra'elita.